


嘉道六家絕句

唐駝署








民國八年校印

嘉道六家
絕句

掃葉山房發行



國民小學印



總發行所
上海北市棋盤街
 掃葉山房

PL
2539
C45X
V.1

嘉道六家絕句目錄

卷一

瓶水齋詩

二百九十九首

卷二

香蘇山館詩

三百二首

附

六首

卷三

青芝山館詩

二百七十首

卷四

天真閣詩

四百四十四首

卷五

尚絅堂詩

四百二十首

卷六



是程堂詩

二百四首

嘉道六家絕句卷一

瓶水齋詩

舒位字立人號鐵雲直隸大興人乾隆五十三年舉人有瓶

水齋詩集

陳文述撰舒鐵雲傳君誕之夕母沈夢一僧手折桂花稱從峨嵋來故小字犀禪十歲下筆成章年

十四隨父官粵之永福讀書署後鐵雲山因以自號君性情篤摯好學不倦尤喜觀仙佛恠誕九流稗官之書一發之於詩國子祭酒法式善以君與嘉興王曇常熟孫原湘為三君作三君詠善書各體皆工雖倉卒點畫不苟能吹笛鼓琴度曲不失分折所作樂府院本脫稿老伶皆可按節而歌君之為詩專主才力每作必出新意嘗言自漢魏至近人詩鮮不讀者非盡其才無以立也不作可也作而不傳猶不作也故君所作瓶水齋詩不沿襲古法而精力所到他人百思不能及乾隆嘉慶之際詩人相望歸愚守宗法隨園言性靈學之者眾未有能盡其才者君獨以奇博淑獲橫絕一世余所識詩人眾矣必以君為巨擘焉蔣寶齡墨林今話鐵雲兼明畫理山水花鳥人物草蟲俱師青藤老人有奇氣張維屏聽松廬詩話舒鐵雲詩出筆則雷霆精銳運思則冰雪聰明使事則觸手成春用書則食古而化

題柳

一絲楊柳一梭鶯費許天工織得成已是春愁無片段峭風猶作翦
刀聲

翠幔高樓定幾家封侯夫壻隔龍沙飛揚春夢三千里直到天涯捉
柳花

空谷

空谷佳人絕世姿鴟媒一去苦相思天寒修竹娟娟靜翠袖蒼茫獨
立時

記得紅鐙待曉初春痕深淺十眉圖問渠小麝丁香印銷盡宮螺五
斗無

東鄰卻扇夜催妝艷絕金釵十二行等是離鸞故鄉恨輸他情願嫁
王昌

三年風月夢行雲腸斷金泥蛺蝶裙一串明珠留不得雙題紅淚寄

還君

流黃明月漾秋深
錦字雲機一片心
織到天衣無縫處
些些鍼線本難尋

鎮日青簾一桁垂
鴛鴦繡出下堦遲
不須金線年年壓
自有春蠶五色絲

小游仙詩

清淺蓬萊阿母家
春流一鏡漲桃花
無因風馬雲車路
歸向銀河借客查

碧落抽簪遠叩扉
粲然玉齒啟靈妃
含情欲說他生事
正好金籠放雪衣

七寶清虛證上仙
秋風一樹倚嬋娟
費他斧鑿痕如許
纔到彎彎月子圓

別館承霄卻贅秦三聲橫玉破紅塵分明烟霧乘鸞去未信蕭郎是
路人

紫泥小海別經時青綺疎窗忽見之如此紅泉不能渡十年春夢采
華芝

南西門楊柳枝詞

春城風雨路旁枝郎馬青驄去幾時放下珠簾三十里一時楊柳盡
成絲

古鏡詞

冷月蒼蒼暈一規未知肝膽況鬚眉如何乾德年間物惆悵銅官沒
字碑

倚鳳盤龍舊夢孤一言擬問鏡當初水精簾下梳頭影曾照佳人絕
代無

書劍南詩集後

魏闕江湖夢未忘
白頭射虎意飛揚
他年家祭淒涼甚
又見中原作戰場

將軍西第頌誰傳
丞相南園記可憐
爭似江東楊轉運
一官一集自編年

小樓深巷賣花聲
七字春愁隔夜生
較可尚書詞絕妙
一晴一雨唱紅情

誰遣鴛鴦化杜鵑
傷心姑惡五禽言
重來欲唱釵頭鳳
夢雨瀟瀟沈氏園

雪夜雜詩

秋老關山唱采薇
刀鏐無恙遠人歸
舊時楊柳芳菲盡
一朶瑤花繡鐵衣

絕塞丁零使節摧誰傳鴻雁上林回年年大嚼天山雪不記銅盤露一杯

相思合在洛陽邨烟火蕭條雪打門容可橫陳三日卧不知人世有奇溫

谿山雪月兩佳哉柔艣蒼茫近夜來興盡還家無限好不須親見主人回

偷將鶴氅等閒披雙屐行吟冷最宜似此神仙應不少相望祇隔一層籬

天女初聞一咲拈楊花晴撲謝家簾何因滴粉搓酥手解唱華奴析析鹽

對影聞聲走蠹魚清寒相映一帷虛如何天祿青藜杖只助劉郎校秘書

最憶襄陽孟浩然夜窗松月未成眠似渠忍凍禁寒去不為梅花亦可傳

半夜開關萬馬鏖蔡州門外陣雲高歸來風大花如席照見將軍錦戰袍

破帽蒙頭策蹇行灞橋流水悄無聲人間此境應愁絕纔著詩人便有情

掃來鸞尾試茶煙難得佳人手自煎一樣銷金春帳底不曾消渴但酣眠

園林清絕傍孤山招隱詩成晝掩關消受寒威應未了花纔半樹鶴初還

偶思白戰聚星堂此亦平生古戰場誰識邊兵四十萬園林鐘鼓白尤強

鼠齒枯藤險韻填西風吹轉釣魚船忽聞米桶有人語強似會稽朱
百年

夜坐聞落葉

葉落應難認故叢四山風雨酒瓢空憑誰溝水東西去流出人間一
瓣紅

秋聲如此夢難成遙夜涼蟬咽玉笙略記年時春院晚送人滋味落
花聲

井上梧桐有暮鴉門前楊柳不飛花不知碧樹紅泥閣春色明年又
幾家

梅花水仙曲

客有自吳門餉此二
花來者因紀其事

春船一笑送花來四百紅橋昨夜開便喚礬梅是兄弟故應桃李作

輿臺

翠羽飛還近酒家朱陵玉笛渺天涯參橫月落誰惆悵瞥目闔門萼
綠華

鄂君繡被舟中夜湘瑟神弦江上峰腸斷蘇州女兒曲明珠一串負

情儂

金任詢詩蘇州
女兒嫩如水

種作寒花迴不群吟殘春恨香難分十年綺語三錢筆書破雙鬟白
練裙

真孃墓詩

北雪南花太等閒美人一去冷空山誰知化作身千億多在紅船六
柱間

歌舞蕭涼怨不勝危巒一角浪千層若為燒作鴛鴦瓦黃土青山兩
莫憑

紫蘭香徑愁蘇小青草荒原憶漢妃等是千秋好顏色烏啼花落濕

人衣

舟次別稚川

醉和狂歌醒便行中流相送水無情再遲一夕匆匆話唱到陽關第四聲

金閨門外好烟波酒盡移船奈若何隔是傷春復傷別不應仍著柳絲多

題張子善孝廉芍藥倡和詩後

南西門外即豐臺繡轂長衢殷晚雷咲殺熏香蕭館客題詩爭似看花回

九十春光一酒卮吟情艷裔惱花枝朱門日費中人賦但買春愁不作詩

伯父倣唐子畏富春山圖一角命題

桐江詰曲好烟波隱隱青山響權歌纔展谿藤似相識十年前向畫
中過

疎簾清簟夢初醒下直凝香晝掩屏比似六如三丈卷未妨縮本寫
蘭亭

五代十國讀史絕句三十首

係履歸來汗一身朱三本是碭山民全家作賊偷天下忽有投杯捉
賊人

廣字編年已去唐公符傳讖竟稱梁少師自愛楊風子上將可憐王

鐵槍

後梁

遂有雕窠獨眼龍生兒亞子果英雄那知別撰伶官傳流水聲中一
曲終

妝具銀盆入晉陽新磨銅鏡本無光卻除菩薩留生鐵又向宮中看

射狼

後唐

割取燕雲十六州火光飛上洛陽樓鐵穿石爛匆匆甚紅殺僧堂一樹榴

更無十萬劍橫磨可惜陽城一索駝獨向封邱門外去路旁紗帽已無多

後晉

不事南朝不北朝紀年改國兩無聊洛陽焚牒緣何事寒食難容麥飯澆

二威不死一威生草草匆匆作此行卻受虛名收實禍四年兩世不

分明

後漢

劉子陂前戰血流瓦橋關外路悠悠黃旗裂後黃袍出了却梁唐晉漢周

匆匆五代劫灰餘割據紛綸且未渠直到世無長樂老華陰居士正

騎驢

後周

江北楊妃唱步虛
笛家三孔怨何如
匆匆不記廬州釣
東海青天一鯉魚

十圍官燭淚猶紅
難抵金奴馬廐中
腸斷丹陽迎奉使
更無三十六

英雄

吳

碧落宮開笑女牛
南朝天子例無愁
不知江上黃花水
肯向銀河一處流

鴛鴦寺主幾時還
金屑燒槽譜未刪
留得數峯青峭在
曲中猶唱念

家山

南唐

玉女初開半面妝
難營三窟到金牀
可憐一段琉璃下
祇有繒山皂莢香

宣華池上月華新
定子當筵一抹春
但記宮妝成小醉
酒杯不到絕

癡人 前蜀

蟋吟鷓鴣自春秋四十花城作浪遊忽訝征西車馬至為誰風雪賜
貂裘

雪香團扇宴摩訶玉骨清涼怨綺羅解道流年暗中換宮詞翻入洞

仙歌 後蜀

內殿傳呼女侍中紅雲宴散太匆匆髮香人夢無尋處腸斷花田一

畝宮

無復雞人候曉窗青春祕戲一王降如何瘦燕肥環外別有橫陳大

體雙 南漢

晉陽玉座紀年新三品黃駟間道塵自有一生惆悵事雕青天子亦
真人

黃蠟封書夜刺閨摧殘鐵騎澤州圍無因重捉香如意城下三衣肉

祖歸

北漢

草風山雨會春園
比似江南錦洞天
觸迂參軍舊歌曲
齊州九點已如烟

宮衛銀槍細漏分
夢回猶記鬱金裙
不愁花謝禪心寂
自有西堂一片雲

楚

開門節度閉門王
一角湖山是故鄉
卻遣夫差水犀手
亂潮如雪下錢塘

通宵警枕憶眠時
身後風流絕妙詞
一路花開人緩緩
玉璫緘札寄相思

吳越

金仙一笑夢中來
雙樹誰家傍水開
較可他年三昧宴
玉缸花雨撲春回

隔著荷花路不通
回船惟見水屏風
三郎白馬無消息
隊隊鴛鴦入

鏡中

閩

荆南節度舊名昌曾是朱三異
姓王却笑當年李天下誇人十指太
荒唐

一身鶴氅護烟霞卜築荆臺小
隱家老眼不堪東北望秋禽啼殺渚
宮花

荆南

夜看瓶中辛夷花有詠

香鐙一穗落銀盤瓊樹分明夜
夜看乞與軍持散花手春陰三日水
猶寒

細漏丁冬入夢雲夕熏初換雨
花紛若為化作青鏤去偏寫羅虬九
錫文

黃梅花詩

何處初逢綳樣花曲廊迴合亞
欄斜宮妝一抹能相似愁殺紅綃與

綠華

昨夜金波看月明今朝山色夕陽晴紅閨少婦釵梁上記取黃香是
小名

雪徑風亭底樣寒懷人千里思漫漫定知陸凱江南使封寄梅花是
蠟丸

黃面參禪事可知拈花太早散花遲一年一度羅浮夢又是橫陳嚼
蠟時

曩為疊韻詩寄胡石翁附陳髯家書中以達遲日石翁書來知前詩
已浮湛夜航髯有西洋錢一枚侑函者亦隨僕詩俱去矣今髯還家
祀竈乃備錄前詩及札央渠轉致石翁并自題三絕句於後不欲
使船家者流竟為魏公藏拙也臘月二十二日微雪石門縣齋書

青錦香囊手自擎三朝三暮夜行船中流定有蛟龍得詩價分明直

一錢

重題翠鯉未嫌遲歸及黃羊祀竈時卻似草堂人日後今年人見去年詩

問訊東橋埽北臺雪花明處墨仍催者回不是洪喬篋親見陳琳記室來

上元詞

十三已過上鐙期雪未全消月到遲試問春寒誰管領梅花八十一胭脂

語兒中涇春水吹衫青牖口權歌回不知鐙火樓臺上今夜開窗是阿誰

花生日詩魏塘道中作

等到東風第幾番買絲來繡護花幡平生恥作公家語但為花神撰

壽言

啼鶯如夢送歸艎
月子平分夜未央
願取鴛鴦湖裏水
釀成春酒寄花嘗

雨落風開事偶然
青春初度有情天
無因細算花年紀
今日分明又一年

題韓偓香奩集

紅箋小疊寄天涯
挽力偏難草白麻
若使當年真作相
箇詩何異宋梅花

泰安道中絕句

遺藁誰求封禪書
千秋猶陋馬相如
如何衮衮咸平相
不及孤山處士逋

碧霞宮殿望崔嵬
海日扶桑曙色開
一朵山桃花插鬢
側輪車上進

香來

石子玲瓏當路生，
穀三十幅感長征。
明朝去宿開山廟，
直指平原縣裏行。

湖上

湖上明波綠似苔，
菱花兩岸雪然開。
刺船人在花深處，
疑是山陰子夜來。

奉懷宋助教楓橋寓居

鄧尉山頭踏雪來，
巫咸谿上棹船回。
相逢三萬六千頃，
欸乃一聲花亂開。

春間余歸自虞山，助教從香雪海來相遇。吳門舟次誦其游詩，有梅花香五湖句。

春船瞥負五湖期，
鐵笛西風怨別離。

助教嘗為余作鐵笛歌。

更為酒人吹一遍。

畫眉橋外露青旗。

畫壁曾經唱竹枝，
雙鬟都記使君詞。
無端別譜三姑曲，
腸斷吳儂本

事詩

助教曾以長慶體為武林彈詞盲女作王三姑曲歷述盛衰為此題絕唱

江楓漁火近寒山城外鐘聲客未還今夜梧桐鄉裏月又隨秋夢到

吳關

宋助教寄龍井茶

南屏茶事妙謙師禪榻花風感鬢絲未負青春狂杜牧喫君新茗報

新詩

來書云是靈隱詩僧手焙

題蘭亭帖後

明何運使井欄本

暮春禊事敘臨河落紙煙雲晉永和解道脫胎金谷引便知真本已

無多

世說新語注所載臨河敘與今帖文互異

匆匆繭紙閉昭陵白石蒼苔雜愛憎似此花開殘帖裏直須愁殺趙

吳興

野鴨家鷄雨不妨采旄猶賸十三行誰知新樣元和脚却在淮南汲

井床

冰花初泮玉蟾蜍一束青縷夢不如便有春風來腕底故應玳瑁與
裝書

過江雜詩

揚子津頭春霧開瓜洲城外渡江來孤篷無物輸闕吏昨夜江南雪
一堆

樓上神仙到欲迷曲中公子唱猶低君王才盡惟看鏡不許空梁落
燕泥

清夜西園遭箇春珠簾玉箔記來真匆匆便向聊城去咲殺胭脂井
底人

殿脚三千土一坵烟花猶戀古揚州司勳但寫阿房賦那不傷心到
玉鈎

豆蔻梢頭事惘然一生紕繆杜樊川揚州薄倖還如此況有湖州十
四年

平山誰復記歐蘇城向參軍賦裏蕪十里春風二分月不宜繁露董
江都

媼神猶自祀蕃釐一卷經消兩鬢絲解道韋郎正年少江東羅隱有
題詩

現宰官身作雅遊奚囊伎扇自風流阮亭去後云亭去此地官名也

合休

王漁洋孔東塘皆嘗
為揚州府推官今裁

河橋燈火蕩春槎衣際鴛鴦鬢際鴉韓綽不來何遜去夜深誰唱後
庭花

才過淮南水拍天別離心似此湖然不知今夜江關夢去趁誰家下
水船

水際靈旗祀女郎不須更辯鹿筋梁問渠寶帳重重霧可占人間一
辦香

十日春寒一破裘沿隄寶應接高郵泊舟風雨開船月腸斷流人水
調頭

淮水東流繞郭門昔人於此飯王孫分明拋了漁竿去却是冤仇不
是恩

碧霞宮外萬煙波舴艋初辭見橐駝一事記來真齒冷也曾騎馬過

黃河

戊申
年事

趙北口作

南垂北際幾題詩來自無聊去較遲彷彿江南好風景暮鴉啼殺綠

楊絲

烟波無恙釣魚船此柳依依似昔年若唱曉風殘月句桓司馬是柳

屯田

女牀山人書問寓居近味雜寫家書尾答之

無端搖出畫眉橋鶯脰湖邊正落潮惟有別離難忘記開船時候是
花朝

韻字紗題錦字書鐙花消息比何如歸期愁殺秋池漲不憶鱸魚憶
鯉魚

官街三日雨淒淒十丈塵消一斗泥略似江鄉春去後冬青花破鶻
鵲啼

冷布當窗碧似紗濛濛一半有烟遮不知織錦秦川女幾處空房聽
暮鴉

書堂斜展北窗新夾竹桃開露半身日暮媽香雨無語湘夫人對息
夫人

萋菲但有青蠅集，吟喝曾無白鳥羞。長日垂簾宵卷帳，憐蛇見蝎又

防秋。

都下多蠅而絕無蚊子，惟蠍與蜈蚣入秋甚夥。

丁香芍藥都開過，杏花櫻桃價漸平。金剪乍收銅盃響，賣花聲換賣冰聲。

仲瞿再試禮部報罷將歸意不自聊，乃乞河間公多作書致江東諸大夫，薦為醫公既許之，而皆余為屬稿。幾蒙濶匾之誚，忽憶東坡有言：學書者紙費，學醫者人費。然則爾我將分任其咎乎？相與喁喁，仍為三絕句解嘲。

讀破靈樞一種書，杖頭從此挂胡盧。不知被放年年去，消得文園渴也無。

不須瑤草勸龍耕，何必華芝采鶴齡。願得紅紗雙眼豁，人間何處覓空青。

折肱可似巖三點妙手無過溫八义累我封題頻咄咄費人費紙各
擔差

碧桃曲

爭將殘月唱楊枝瞥過東風賣杏時三十六天春露重碧桃花底話
相思

最關情處易銷魂紅翠霏霏映此門我是隨藍風裏客看花先感種
花恩

沅州書所見

長橋一里卧晴虹虹背人家兩岸通絕似秀州門裏見樓窗開在水
當中

玉屏山看晚霞

水上屏山山下池暮雲樓閣映參差中間一抹紅霞影小李丹青小

謝詩

施秉道中

覓得雲根五漏泉宮商一部意冷然水經箋註茶經帖恨不携來此處煎

梔子花開四面風山坳蝴蝶草根蟲無人解贈同心者亂插紅籐笠子中

盤江

且蘭江上小徘徊江水年年漲一回纔送柁船莊躋去又迎麾扇武侯來

鐵鎖橫江替畫橈綠碑殘薛詔前朝摩挲直上金鼇背二百年前舊

板橋

盤江鐵索橋明布政使朱家民所建並撰碑記朱又嘗於橋成日賦詩有云人從蜃氣樓中過我在金鼇背上

雨行安南道中

濃烟潑墨霧籠鬟百首詩新濕未刪一角青天鋪作紙分明題到米
家山

郡齋始春桃花盛開

花開纔過試燈風借得燈花一色紅多謝東君難忍俊青春先到細
腰宮

那消羯鼓苦相催閒處飄零冷處開略似江鄉修禊後綠萍堆裏酒
船來

十日春寒一日晴隔牆惟見此花明深山那有閒蜂蝶雨雨風風別
有情

屋角嫣然又一枝花神好好要題詩浣花箋紙偷春格寫寄江梅尚
覺遲

午陰匝院懶猶眠孤負紅妝又半天便合移他水晶枕淺蓬萊下小

遊仙

疏雨先生屬題紅藥便面久而未報歲云暮矣驪駒在門啟筭
得筭率占二絕句錯書諸花間葉底既補畫之不足且留情之
有餘剪燭操觚為之惆悵

錄一

懷袖朝雲瞥歲寒題詩容易別離難分明疊作陽關譜那買胭脂畫
牡丹

登滕王閣眺望雜詩

重向仙人舊館遊濃春烟景又新秋不知蝴蝶飛何處萬水千山百
尺樓

南昌戰艦歎雄藩妃子墳邊綠草翻當日此風真跋扈不曾卓一護
花幡

極望潯陽九派分琵琶亭子隔江雲善才弟子商人婦傳到今朝只

有君

灌園織履舊農夫強被將軍指姓蘇
蘇繭綠亭前一相認當年曾識此人無

水底潛蛟岸上童黃牛洲畔浪殷紅
孝侯長劍澹臺壁未抵真人一剪功

將抵長沙偶作絕句擬於寄書日寫付女牀山人

看偏吳山又越山楚雲都作妙華鬢
中間一髮青螺影猜是湘娥第幾鬟

星沙作客第三回山認峰尖水認湄
歸夢自隨流水去行人却向亂山來

似勝從軍六詔鄉依然結客九歌場
寒衣漫向秋深寄自采芙蓉集作裳

二喬墓

秋草中間蛟蝶肥
美人黃土是耶非
一時豪傑銷沈盡
賸有香魂夜夜飛

隻雞斗酒死殷勤
失笑銅臺夢裏雲
畢竟東風春不鎖
也留七十二疑墳

年少英雄玉樹埋
可憐姊妹雨花開
江東豈是無閒地
却傍湘君廟下來

除夕泊衢州城外

夢想青霞好洞天
重來飄蕩又今年
載人夫壻還鄉少
腸斷江山縣裏船

三衢燈火水粼粼
鬢影衣香隔夜春
今夕連檣江上泊
世間大有未歸人

鶯脰湖舟中逢雨憶意園師詩有吳江二月真堪畫柳暗花明
鶯脰湖之句正此景也時方作張掖書寄師因即事奉懷云

向晚扁舟聽鷓鴣十年鐙影落江湖那從暗柳明花處補寫吳江二
月圖

隴首飛雲隔幾塵梅花羌笛弄青春杜陵舊雨還惆悵況是當年載
酒人

詠史絕句

絲竹東山且漫論青青小草謝公墩香囊綺旆圍綦劣惟見先生履
齒痕

炊粱殘夢記邯鄲纔得升天又降壇小說神仙麻樣列似渠進士出
身難

成佛生天定有因六州難鑄利名身不知地獄從何設正好容卿一

輩人

雜詩

選佛場連造勝天春風人海引虛船故廬若在南山下何必襄陽孟浩然

一分太短一分長玉尺從頭細細量畢竟曹交能食粟何曾飽死漢東方

千金馬骨水猶寒付與司風令史看如此陶潛纔五斗故應代米要人肝

四十纔當舉孝廉種鬚方法頗三添只知公喜公還怒絕倒參軍一片髯

擬向西京賦夢華金釭二等卜燈花先生莫厭牛心炙尚有盧同七碗茶

論語曾藏半部無年來考据太疎蕪李聃彭祖老難死錯認商朝賢大夫

三策生吞董仲舒一篇謬薦馬相如漢書盛在龔蘆裏且向龔蘆讀漢書

爛熟蕭樓半秀才天臨海鏡重徘徊者番名士真如餅畫出空空一腹來

舜典原從堯典分古文稍稍異今文可憐歐九未嘗學如此僻書休

誤君

歐陽公知貢舉日有士子問堯舜一人抑兩人公徐語之曰此等僻典君既疑心不用亦可

題昭明閣內史畫蘭扇子

絕代佳人老畫師空山臭味不差池費他一滴金壺水寫到花歌葉舞時

半窗朱鳥閣春陰深寫梅梢淡寫心絕憶湘人詞賦裏雪花如片夜

彈琴

楔事纔修扇影多
天花香散墨池波
阿儂家近蘭亭子
吹慣春風晉永和

詩派

詩派圖成有別裁
江東羅隱又空回
雲英已嫁方干老
送出開門節度來

雨夜書李家莊壁

分明避雨入山行
行盡山阿雨不晴
何必人間望天上
只消七十里郊城

昨渡沂河水到腰
東首馬首意猶驕
再添一夕風雷雨
濕過桃花第幾橋

山莊雞黍話綢繆
老屋三弓火半篝
收入王維圖畫裏
鬱輪袍曲下

場頭

是夜仲瞿寫
東山聽雨圖

初僑禾中汪翠亭甥倩與甥女蘭若俱至於其迴棹後作詩寄懷

情話西窗夜剪燈論詩已在最高層三年夢斷梅花社又與青山打

葛藤

蘭岩誦其遊龍井詩中如下瞰西湖船似鴨夕照雷峯不見塔皆近宋人句法余別西湖至此又三年矣

梧桐鄉裏纔移具楊柳灣前亦比鄰容易三間茅屋底太平世界苦吟身

為人題豆棚閒話圖

清淺茶鐺濁酒杯秋聲香送豆花開不須更糴桃花米蒜友瓜朋日
日來

水天閒話隔重簾未抵涼陰四面添償盡人間言語債夜深殘夢一
鄉甜

田園雜興儲太祝裙屐風流晉右軍些子韶光阿堵裏桑麻雞犬亦紛紛

留髧送客太荒唐野鳥山花此擅場只要一年天氣好三家邨裏話農桑

三千說法諸天碧廿一彈詞野史青等我南樓清興發也來搬與大家聽

虎邱竹枝詞

不須別館起芳名何苦扁舟載遠行只有東山王主簿二千年裏做人情

春堤風嫩草纖纖綠上裙腰一道黏不信山塘真七里弓弓量過繡鞦尖

茉莉花開蝴蝶飛湖船女兒買花歸北人不識簪花格了髻山前雪

一園

五月龍船八月燈綺羅簫鼓水層層阿誰讀破鴛鴦譜只有巢雲閣
上僧

韋蘇州後白蘇州僥倖香山占虎邱四面紅窗懷杜閣一甌花露仰
蘇樓

埋骨青山隔幾春英雄沾盡女兒巾五人之墓千人石為活千人死
五人

纔施脂粉態生嬌偶弄絲絃韻易調定有風流衣鉢在真娘顏色伍
胥簫

平山堂雜題

歐蘇迢遞接漁洋中隔元明一瓣香若使詩翁都入社不應遺漏孔

東塘

三賢祠祀歐蘇兩文忠及王文簡也當時語云王阮亭見壁題詩孔東塘逢人分韻

妙品倪黃出自然殘山賸水也堪傳分明界畫樓臺樣金碧飄零直

甚錢

兩岸園亭
皆就傾圮

芍藥開時賽牡丹居人艷指此花欄豈知身是豐臺客未必纔從此
地看

吹簫乞食古風存一笑看囊似少思誰寫紅橋修禊卷故應留待鄭

監門

巧者甚夥
殊減遊興

錦帆何事不思家真個垂楊有暮鴉記得懷中留一刺譬如來訪玉
鈎斜

仲瞿屬其內史雲門氏寫留待山居圖圖成索余為記先題四

絕句

華嚴樓閣指輕彈一例烟雲過眼看若作四十年後想買山容易畫

山難

胡盧舊樣餅虛名兩姓荒莊笑耦耕留得武陵源一記花紅水綠太分明

不畫長眉畫遠山螺烟粉本互增刪書生心計佳人手都在須彌芥子間

便有柴門傍水開田園勤灌樹親栽笑他風雨催租者不到三都賦裏來

月夜出西太湖作

風來雲去月當頭銷夏灣邊接素秋如此烟波如此夜居然著我一扁舟

瑤娥明鏡澹磨空龍女烟綃熨貼工倒卷銀潢東注海廣寒宮對水精宮

去揚州日書贈嗇生教授

保泰

泌不神仙廣不侯蕭蕭白髮住揚州平生思御龍門李不道相逢屋打頭

離堂翦燭話前宵又趁扁舟唱早朝算是重來應隔歲春風吹老一枝簫

題士女歸佩珊

懋儀

蘭皋覓句圖

分明翠袖倚風裁佳句蒼茫拂緒來占盡人間詩境界萬山深處一花開

儷雪青琴一曲閒湘人門巷月彎環定知得句還家早夢到都梁縣裏山

花朝

青鏡年華碧海籌五分春色十分愁東風夜夜吹人鬢只有花神未白頭

連日得梧門祭酒仲瞿孝廉兩書

北雁南魚次第催天涯海角重徘徊尋常愛見加餐字況有新詩得
得來

孫郎才調似王郎各自題詩寄草堂記得舊年三四月風斜雨細夜
聯床

松江郡齋聽俞五山人琵琶記去年吳門贈詩忽已改歲再書
三絕句付之

皋橋夜雨舊相聞剪得吳淞水半分卻向雲間指吳會黃梅時節又
逢君

重取琵琶信手彈英雄兒女各沈瀾分明不是琵琶語若是琵琶聽
更難

闌紅羅墨雨茫然第五之名第四絃曲羅不愁君別去此聲長在耳

中邊

卻寄味莊先生

春申浦外棹船行
銷夏灣頭聽雨聲
回首龍門似天際
一雙蝴蝶眼
中明

笛鈿弦索畫堂風
比似旗亭鬪句工
別有紅霞春一抹
自修簫譜唱
玲瓏

宛轉新詩被酒催
綢繆芳訊與花開
不愁孤負鱸魚約
會遣分司御

史來

謂秋浦先生
時至滬上

夜雨

昨撲流螢冷一紉
疏鐙吹雨釀輕寒
不知秋夢如何做
窗外蕭蕭竹
數竿

題鄭純人州牧美人說劍圖

一轉秋波出匣中華嚴法界倚崆峒他生願作芙蓉室斜傍裙腰半
角紅

玉貌珠衣弟子行十年霜雪字春坊不如磨得甌如鏡照見佳人絕
代妝

妙蓮華裏團雲隊酸棗林中色界天放下花枝無一語英雄兒女各
神仙

秦淮偶題

桃葉桃根打漿遲渡頭流水鬢邊絲不知懷袖西風急猶唱青團扇
子詞

綠蘋橋礙板橋低斜掩紗窗小閣西誰種千條萬條柳悄無一箇暮
雅棲

六月二十四日荷花蕩泛舟作

吳門橋外蕩輕艫流管清絲泛玉鳬應是花神避生日萬人如海一
花無

揀花風老意闌珊難覓吳王銷夏灣腸斷采蓮人去後鴛鴦飛過洞
庭山

書潘榕皋農部水雲笛譜後

子夜燈花手自挑水香雲影夢迢迢分明風月三千外別有閒情記
洞簫

梅花殘雪菊花霜漁譜賞洲笛裏香搖徧姑蘇城外路一枝柔艫亦
宮商

樂天好為新樂府伯時能畫古陽關若向旗亭沽酒去定將井水換
名山

綠梅花圖為子茗題

紫府仙人隔絳紗
黃姑天漢冷
秋槎倩誰管
領春消息只有閨門萼
綠華

羅浮山外月如弓
翠羽飛來一笑濃
容我題詩寄花片
分明勝似碧紗籠

吟處難消昨日愁
畫成也得幾生修
自從黃鶴樓中笛
漢水年年似鴨頭

疎影填詞細似塵
消寒圖裏詠花人
不須更乞閒螺黛
但買胭脂便是春

儲向之秋林讀書圖

青山紅樹白雲晴
破許工夫寫得成
三十年來無一字
天風吹老讀書聲

圖成於乾隆乙未宜興路學宏寫無一人題者

經畬堂對畫山樓
陽羨文章第一流
阿大中郎群從在
撫鬚抱鄰自

千秋

畫畫溪山老畫師夢中綵筆此傳之風樵烟網都相識定有田園雜興詩

皋橋廡下帳盤桓船入荆谿夢未寒欲向坡公理前說讀書容易買田難

題吳興沈芥舟所畫潯陽琵琶圖

商人例不解琵琶罰向浮梁去販茶留取青衫兩行淚調鉛殺粉寫蘆花

不似灣頭馮小憐却如江上李龜年畫師詞客都愁絕難得佳人老大傳

舟過山塘聞笛

紅穗疎燈水上樓笛聲纖遠指痕留定知吹笛人雙髻可惜湘簾不

上鈞

惆悵詩即用香巖韻

畫壁殘詩付福娘

唐孫榮有題王福娘墻詩謂僕所作海紅瀟碧之圖

情懷飄瞥恨微茫誰知

人面桃花白又觸春愁隔歲忙

分明蘭夢美人圓一刹微塵色界天萬戶千門關不住章臺街上柳

如綿

從此紗窗掩畫樓梅花也要幾生修果然本事詩成識名士佳人不

到頭

去年寄聲香巖有但有人嫁厮養何曾名士悅傾城之句彼時別有所感云然香巖誤會其旨今則轉成詩識矣奇哉

通詞猶與託微波天上張星隔絳河一樣蘇州女兒曲今年水少去

年多

任詢詩蘇州女兒嫩如水

那堪日日見群鷗但覺言愁始欲愁留得人情半張紙銷除十萬錦

纏頭

書東坡石塔寺詩後

飯後鐘聲亦偶然，紗籠何事艷相傳。
山僧若是無情者，未必留詩二十年。

中書伴食黜朝列，君子素餐歌國風。
我為蘇詩下轉語，陝郊寺裏寇萊公。

飢來驅去報恩賒，市上簫聲塞外笳。
失笑東塗西抹慣，碧紗不見見紅紗。

荏平三詩

齊石歌喉一曲低，羅襦香澤醉如泥。
如何狗盜鷄鳴外，別有風懷到

滑稽

淳于髡

黃犬東門事可憐，不如黃鵠海東邊。
始知戰國無人物，一箇波臣魯

仲連

魯仲連

鳶肩火色豈蹉跎一紙功名逆旅過畢竟世間皮相者不曾心相到

常何

馬周

湯雨生騎尉

貽汾

笠釣圖

瞥向紅塵影裏看淩烟閣外舊勛官相逢彼我應相笑三寸毛錐七尺竿

神仙黃白易蹉跎富貴丹青一剎那賴是棄官來作客不然何處畫漁蓑

夜坐欲雪仲瞿來借漢書既檢付之仍為絕句與之論史並書
范史班固傳後

風雪蕭蕭逼歲除瓠蘆一卷且藏諸有人細嚼梅花者半夜敲門借漢書

奉詔蘭臺一劫塵司徒掾亦漢功臣可憐叙傳中篇外半出刑餘半

婦人

狩麟畢竟異雕蟲
晉韻文章枉自工
張轉鄭樵二人皆崇遷黜固非解事雌

黃何與汗青功

英雄東閣事闌珊
白虎諸儒亦等閒
何不燕然投筆去
尚能生入玉

門關

張伯治自寫姬人杜者為憐影圖索題乃取玉谿金荃詩句以

為緣起凡四首

對影聞聲已可憐

義山句

花飛釵動本天然
分明綵筆朝雲夢
難得郎

君手自傳

曾謂無雙今兩身

飛卿句

影中人對畫中人
畫中遮莫銷魂者
況箇銷

魂是當真

小姑居處本無郎

義山句

十樣圖惟一面妝
似此娉婷嫁張碩
前身必

是杜蘭香

一夕橫塘是舊遊

飛卿白

桃花潭水水潭頭如何已載西施去更向西

湖寄玉鈎

伯冶頃來杭州即寄此圖還吳水潭頭則杜所居也

晚歸湖上看雨有作

錢塘門外水粼粼細雨斜風趁釣輪若把西湖比西子湖心亭是捧心人

遠山一角尚斜陽咫尺陰晴未可量若把西湖比西子者邊麓服那邊妝

題霍小玉小像

一代紅顏一曲釵朝雲樓閣夕陽街誰知好夢蘇姑子賸欲將身作錦鞵

定情主簿太恩恩腸斷青門老玉工十二萬錢容易得一鬟無價此

圖中

櫻桃花下新婚別
豆蔻梢頭薄倖名
昨日黃衫今紫襖
英雄兒女各吞聲

人間外傳里中娘
往事重尋勝業坊
此是紫烟新樣子
銷魂顏色返魂香

白櫻桃詩

未輸崖蜜十分甜
一曲櫻桃是甚鹽
可笑軟紅塵幾丈
不曾飛上水晶簾

牡丹難與買胭脂
女樣珊瑚絕世姿
比是白家樊素口
夜深私語淡妝時

論曲絕句十四首並示子筠孝廉

千古知音第一難
笛榰琴爨幾吹彈
相公曲子無消息
且向伶官傳

裏看

苦將詞令當詩餘有句無聲總不如一部說文都注徧無人歌曲換中書

天寶梨園有舊風湘潭紅豆老伶工莫將一段霓裳序闌入元人北九宮

連廂司唱似妃稀蒼鶻蒼軍染綠衣比作教坊雷大使歌衫舞扇是耶非

笛色旋宮忽變聲京房纔死馬融生要知人籟還天籟歸北歸南一串鶯

便將樂句贈青棠腰鼓零星有擅場協律終憐魏良輔安絃定讓陸君暘

綠繡笙囊侑笛家十三簧字鳳開花提琴搖曳雙清撥更與歌天作

綺霞

蕭寺迎風記會真銅弦鐵板苦傷神雖然減字偷聲慣十丈耀瑜要此人

邛邛搬演蔡中郎樓上燈花是瑞光一曲琵琶差可擬玉人初著白衣裳

玉茗花開別樣情功臣表在納書楹等閒莫與癡人說修到泥犁是此聲

流水青山句自工桃花省識唱東風南朝無限傷心事都在宣娘一笛中

一聲檀板便休官誰向長生殿裏看腸斷逍遙樓梵字落花時節女兒彈

若向旗亭賞酒還黃河只在白雲間只愁優孟衣冠破絕倒當筵李

義山

中年絲竹少年場
直得相逢萬寶常
他日移情何處是
海天空濶一山蒼

青林寺

一樹冬青抵白楊
人間天上各滄桑
不知降表如何寫
却捨天魔作道場

茂陵金盃變浮雲
蝴蝶飛來記錦裙
難得招魂唐義士
可憐晞髮謝參軍

犬年羊月淚連絲
親拾寒瓊有夢思
何處青山可埋骨
袈裟猶挂萬年枝

誰遣攀髯五國城
蓋棺消息一燈檠
青衣已敝紅兒出
馬角何曾便得生

居然飲器用頭顱偷得驪龍領下珠浪受虛名傳道學南朝一劫一
浮屠

題卧雲傲陸復紅梅卷子

疎影修簫白石詞變宮八十一胭脂祇應賞酒羅浮去月落星橫頗
頗時

題寶夫泰山獨眺圖

有此蒼茫獨立時分明雲在意俱遲會當絕頂杜子美莫作懸崖韓
退之

五岳圖成祕未傳生平雙屐意蕭然與君婚宦粗能了自有齊州九
點烟

只輸一事馬相如心陋龍門封禪書願得崇朝雨天下絕無依傍再
躊躇


題子山樊邨草堂

詩人例有草堂存樹繞書樓水到門絕妙盛唐詩本事藍田別業浣花邨

樊邨涇在古婁東百里吳關一汭通乞食簫聲春米價平分伍員與梁鴻

海內論交最數君六經三史老紛紜等身著書無不可切莫更為封禪文

水郭山邨新結構畫師詞客舊因緣蕭夫子與錢公子錢七叔美作圖夜夜滄江虹月船



嘉道六家絕句卷二

香蘇山館詩

吳嵩梁字子山號蘭雪江西東鄉人嘉慶五年舉人有香蘇

山館詩集

洪亮吉北江詩話吳孝廉嵩梁詩如仙子拈花自

蔣茗生後二十餘年蘭雪繼之詩如天風海濤蒼浪浪足
以推倒一世豪傑袁隨園曰如一足雲錦滿目妍華恰尋不
出一縷跳絲年未三十而天才學力一至於斯且用筆能放
能收可華可朴王夢樓曰才湧如潮情艷於月音節之妙可
被管絃又曰嘗以音樂論詩蔣心餘朱子穎如大鼓洪鐘袁
子才如琵琶蘭雪以哀艷之思發清壯之響其鐵笛乎洪雅
存曰詩必有珠光劍氣始信其不可磨滅蘭雪詩珠光七分
劍氣三分仲則亦然吾詩劍氣七分珠光三分船山亦然
李元度國朝先正事略蘭雪詩才與黃仲則埒弱冠入都王
述菴翁覃溪法梧門諸公咸稱之袁簡齋亦心折其詩所著
香蘇山館詩集傳播外夷朝鮮吏曹判書金魯敬以梅花一
龕供奉之稱為詩佛日本賈人斥四金購其詩扇其名重若
此墨林今話吳蘭雪姬人岳綠春從汪沔春侍御學寫蘭
出筆即具清秀之致齊梅麓太守偕董小槎編修雨中詣蘭
雪齋觀其畫蘭作五言長古一篇好事者傳誦之綠春所居
聽香館湯雨生屠琴鴻嘗於其館中為合作聽香館圖又為

寫梅於蕉布帳蕉布為蘭雪琉球
門人毛俊義所贈潔滑與絹等

題謝筠岩明府滇行詩草

春暖初乘使者槎
片帆飄忽到天涯
臘脂湖上東風峭
吹落仙官仗外花

嚴裝萬里候人催
新向雲州督餉回
馬背尋詩秋色早
碧天如水雁聲來

旅懷蕭爽付吟箋
纔弔坡仙又謫仙
莫怪騷人頭易白
黃州風月夜郎天

夕陽山下亂流明

筠岩夢
中句

佳句飛來夢亦清
春草池塘同妙悟
前身

可是謝宣城

題王香南

澧

州倅柑酒聽鶯圖

輕黃手擘洞庭柑
百轉枝頭語漸酣
不聽鶯聲聽簫管
箇儂孤負好

江南

索句頻分玉板箋更番花鳥送流年才人一例成飄泊紗帽龍頭亦
可憐

寄宋澹思進士

聯吟曾記坐苔磯月滿東湖醉不歸仙蝶睡醒花影薄暗風吹上越
羅衣

南園梨花盛開追念昔遊惘然賦此

洗妝舊事已天涯何處青旗賣酒家香雨暖風籬院閉一春詩夢在
梨花

為張星海丈題顧姬校書小照

碧簫曾喚小紅拈一串明珠抵百縑歌罷自將新譜校月波涼透水
晶簾

紗帽涼生載酒餘可將清夢到匡廬扁舟合並紅妝去千朵芙蓉伴

讀書

時星海丈將
主講鹿洞

素雲女弟畫杏花雙燕圖贈行同內子蕙風氏作

社日纔過燕早回濃春著樹錦成堆簪花記奉花前酒雙剪捎紅拂
袖來

如今憔悴舊烏衣雨細風斜各自飛心事却傳丹粉外一園花鳥共
春暉

折枝題贈句重酬倦羽差池感昔游十一年來燕市夢賣花聲裏卧
詩樓

別來應寄大雷書酒醒江船聽笛初正是謝庭吟絮日暮鴉殘雪太
蕭疎

預擬繁枝壓帽偏曲江何日醉瓊筵歸來重倩吳綾畫十里紅雲到

馬前

再題杏花雙燕圖後

新枝和露買剛回，供向瓶銀恰半開。
惆悵故園寒食近，一簾紅雪燕歸來。

聽雨依然卧小樓，一春詩夢澹於秋。
花開又是分飛日，說與紅衿也

替愁

是日得蕙風閣詩有不及畫中雙燕子花開一度一歸來之句故以奉答

詩龕夜話同梧門學士

松樹街前地數弓，蒼苔上砌葉堆紅。
袖詩來剪寒燈看，春在風帘紙帳中。

梧門學士以曹墨琴夫人書洛神十三行易季妹素雪所畫秋芳圖并屬賦詩

吾家女弟亦能文，少小閨中說左芬。
閒對鏡花臨粉本，一枝斑管欲

生雲

偶寫秋光上折枝裁紅暈碧總相宜冰綃一卷同芳榭

余與蕙風女士讀書處

題徧蘭兄蕙嫂詩

大家墨妙貯奚囊鴻影初驚鶴未翔却與詩龕添本事一叢花換十
三行

花朝日得王鐵夫孝廉曹墨琴夫人詩翰賦此奉酬

記共簪毫傍翠華嬉春句好定籠紗東風不道如彈指紅過秦淮十
度花

細雨昏燈奈爾何匆匆春事已無多劍花斫地成秋水重聽王郎被
酒歌

傳得新詩壓玉臺茶煙影裏誦千回烏絲雙畫櫻桃館不向西山跨
虎來

辨歸無計理征驂忍負芳華月二三蝴蝶成團鶯對語百花生日憶江南

褚河南書隨清娛墓誌銘帖為司馬達夫中翰作

嬋娟夢斷永徽秋紅袖青山紀俊游長樂亭前碑一片斷腸烟月是同州

銀鈎妙蹟浣蒼苔響榻人間費麝煤恰似蘭亭偷展處萬花一霎放春來

江南道中雜詩

臨水人家欲閉門亂蟬鳴咽近黃昏笠檐簔袂皆堪畫牛笛吹過寄寶村

山風拂袂暗涼生月黑空林更獨行一路野花開似雪但聞香氣不知名

題嚴歷亭

守田

司馬秋臯試獵圖

騎向秋原試獵回
騰驤誰辨老龍媒
使君特賞千金骨
曾到天南破陣來

草檄歸來競鼓笳
江南好雨更隨車
一翎孔翠君恩重
勝看春風得意花

新傳麗句出蛾眉
種玉量珠遇亦奇
妬殺香山老居士
桃花叱撥擁楊枝

又是西風攬轡初
江雲江樹雨蕭疎
此鞭我讓君先著
但跨黃牛讀漢書

題徐閔齋芙蓉湖上讀書圖

芙蓉愛說湖名好
想見秋深爛漫開
夢裏溪雲紅不斷
花邊二十四鷗來

此境回思味最長
千金難買好滄浪
花時誰載看山酒
直到門前下釣航

瘦策寬鞋舊侶疎
倦遊我亦病相如
十年待借樓中榻
讀徧尚書手

校書

謂君祖健菴司寇

題羅价人

允紹

寄暢園尋石圖

漪瀾堂外草如烟
綠到尋春步屨邊
小徑重來尋昔夢
梅花瘦似十年前

莫將傲骨擬嶙峋
此石前生是美人

介石本名美人峯

尋到松陰先下拜

白雲吹上苦吟身

酒醒步月偶書

林塘幽絕似山家
臨水闌干卅字斜
僂鶴一雙都睡著
冷香吟遍綠梅花

莫愁湖權歌為李松雲

堯棟

太守作

一奩明鏡落銀灣
漂絮漂花去不還
絕代蛾眉誰畫出
新螺染遍六朝山

朱門畫戟擁笙歌
半局殘碁奈汝何
留得佳名艷湖水
英雄不及女兒多

採桑織綺總嬌柔
十六生兒字阿侯
一例紅妝都早嫁
人間何地著春愁

鬱金堂裏燕雙棲
重入盧家路欲迷
樓上花枝樓下水
風光占斷石城西

別金陵寄諸同好

白下東風柳萬條
春愁纔著已魂消
早鶯未出儂先去
孤負江山是六朝

題玳梁女士畫梅兼呈夢樓太守

嫩寒薄暝最相宜
明月初橫女字枝
一種澹妝偏絕代
風神全似阿翁詩

湖山夜歸呈夢樓太守兼柬賓谷都轉

驚鴻照影總翩翩
檀板重携桦燭前
聽到歌喉千百轉
明珠如雨落江天

鏡光十頃浸樓臺
垂柳陰中畫槳迴
湖上二更涼月滿
芙蓉齊化美人來

簪珮天然入畫圖
玉山傾倒倩人扶
當年若秀行觴地
海國琪花似此無

公從冊使至琉球其主出貴公子歌舞侑觴號為若秀事見集中

戟門深夜不曾關
待我狂歌擁楫還
說與使君應妬殺
萬花管領又湖山

過倚虹園

碧陰樓閣散餘霞行過名園又繫楂
白月一天風十里夜深涼殺滿
湖花

為吳山尊題南樓卻扇圖

紅牆碧漢路迢迢誰護雲驂過鵲橋
聞道堦才天上少仙人只願嫁
文簫

南樓如畫月初華羅幔風微燭影斜
纔倚紅鸞先一笑春衫繡滿並
頭花

攜琴小住借揚州司馬年來亦倦遊
花裏酒樽賒不得雪晴新典驢
裘

茗話團圞記綠天助妝新寄夜飛蟬
鹿門頭白能偕隱一樣風懷惜

少年

山尊方為余夫婦
畫蕉陰茗話圖

憶梅詩

平生風味共誰親
一樹梅花一故人
相憶時多相見少
年年孤負柘溪春

憶梅曾喚西泠渡
放鶴亭空片月斜
一種孤芳同愛惜
禁寒來看未開花

憶梅曾上梅花樓
元墓銅坑許縱遊
香水半篙春雨後
百花生日到蘇州

憶梅曾陟梅花嶺
門掩斜陽閣部祠
一株偃卧冰霜底
恐是蒼龍化後枝

憶梅曾下瞻園榻
萼綠僊人最有情
小院雪深雙鶴睡
花前守歲到天明

憶梅曾載隨園酒
酒畔紅妝照白頭

謂袁子才先生

烟月六朝花萬樹
夢為

蝴蝶也風流

用東坡詩意

憶梅曾撰藏園杖扶病吟詩尚倚欄笛裏一生知己淚空塘老樹怕

尋看

謂蔣定甫先生

憶梅曾訪焦山寺山半晴雲翠拂窗臨水鐵枝偏兀傲萬花倒影入

春江

憶梅愛飲梅花泉塵味銷除二十年便欲西溪西畔住栽花圍屋種

成田

憶梅昨得羅浮信月落參橫夢欲迴綠鳳一聲天似水扣門誰見縞

衣來

春信明朝到敝廬溪橋香偏十三株滿身風雪當花拜別後清狂憶

此無

蘭溪權歌

九姓漁娃各樣船妹同年喚嫂同年新妝若個臨春水一面紅潮最可憐

蘭谿谿水膩於羅夾岸花開照綠波蘭漿一搖風十里鴛鴦多處美人多

柳枝婀娜橘枝秋才撥湘絃便解愁天上明珠拋作雨珠聲一串是歌喉

歡有因緣妾有情並頭花朵記前生桐江此去無多路只願無風緩緩行

雨後頗憶故園幽事步筆成詩

名園小住亦清涼夾竹桃開梔子香却憶蘇山新雨後芭蕉青到讀書床

野水縱橫入稻田直浮鶯鴨到門前垂楊半樹根全沒恰與鄰翁繫

釣船

葛衫狼籍浣蒼苔
野老同游更不猜
團飯自臨溪水坐
沙鷗一喚盡飛來

紉雨斜陽萬柳條
雪衣公子太風標
自看影入沙泉裏
緩步如人過小橋

隔溪雲樹有千層
幽徑深深到未曾
行過橋西香更遠
水花開徧鶯鷓藤

霜鐘詩元初蕭性淵鄱陽人家蓄一琴為宋南渡時物名曰霜鐘

家世能琴亦可憐
姓名冷落付湘絃
履霜一操天俱凍
淒絕芝陽蕭性淵

落葉蕭條紅樹枝
秋聲先向指邊吹
南朝花裏深深夢
響徹華鯨也

不知

花石綱邊良岳秋朝廷雖小尚風流金徽莫奏當年曲紫塞天寒雁亦愁

半壁東南又夕陽哀絲豪竹總淒涼請看三尺枯桐尾中有銅僊淚萬行

村居雜詩

畫橋連日漲溪波天意陰晴苦未和一網斜陽疎雨後落花紅較白魚多

題倪文正公小桃源詩真蹟後

鷹遊門外水雲寬海運才通劫已殘誰說花源無路入求仙容易救時難

清時有味是閒身只看桃花不避秦却笑漁郎緣分淺仙雲紅誤再

來人

詠竹掃帚

籜龍迸雨記前身束縛奇才亦苦辛
不許參天甘掃地落花堆裏有
仙人

極樂寺看並頭牡丹因憶同芳榭有並蒂蘭書家信後

福慧前生願豈奢雙修讓汝占清華
寒閨亦有同心種不是人間富
貴花

送韓樹屏

鼎晉

侍御乞假歸四川

夢裏峨眉翠掃天思親萬里買歸船
遠難迎養官為累貧解承歡婦
亦賢

聖世拾遺無諫草故鄉供祀有谿田
知君進退俱無負再出山來豈
暮年

綠春詞 有序

筠姬姓岳氏字曰綠春山西文水人隨母僑寓京師姿性慧麗能左手書授以詩輒倚聲誦之妙合音節余初詣姬居值曉妝貽碧桃一枝姬受而簪於髻俄有奪以重聘者姬恚甚謂其母曰兒已簪吳氏花矣遂於嘉慶十一年四月八日歸余年甫十五余得蕙風閣書因持示姬姬曰妾年小不能持家累君有內顧憂願宜人早來妾亦有所恃也余嘉其意遂寵以詩

晉祠流水綠於春曾照吹花掠絮人三五年華如滿月團樂影裏話前因

曾聞重聘却豪家此意量珠報未奢露朵親簪雲髻重定盟先受碧桃花

琉璃街畔駐鈿車銀燭花開照雨初妝閣三間吟榻在半安奩鏡半藏書

曉檻粧成合助妍故人昨貺夜飛蟬蛾眉淡掃原風韻畧畫春山更可憐

才離阿母性嬌柔教誦新詩浣別愁自倚聰明貪強記花陰亭午不梳頭

繡絲未與補宮袍料理文奩亦小勞却愛天生雙腕俊右持金翦左湘毫

簾櫳如水樹陰移滿靨紅潮就枕時生怕鬢邊花易損明妝小卧亦矜持

夜涼閒坐掩雙扉螢火穿叢倦蝶稀一院玲瓏花葉影月明繡上白羅衣

玉笛參差檀板輕扶風帳有女門生背人學按花前譜半是歌聲半
讀聲

冷官風味不曾嫌生計零星較米鹽一事未循居士約畫叉錢為買
花添

清眉終日笑常開為拆家書髻影迴自說小年心計少持家早望女
君來

花院秋期奉板輿望孫先勸覓清娛吾家蘇蕙憐應重添寫蕉陰茗
話圖

風雪三更紫禁遙應官聽鼓太無慘女兒香細籠烟暖纔得熏衣待
早朝

寂寞雲扉曉尚扃隔窗誰動小金鈴白頭京兆偏風致迴避花間夢

未醒

謂秦少
峴先生

朱郎傳箋到薜蘿畫圖爭擬小鷗波侯門歌舞承新寵翻羨寒閨韻
事多

早涼

小檻玲瓏護碧紗庭寬難得葦棚遮正愁避暑無方法天與微陰替
養花

落紅一徑掩苔痕高樹濃陰似水村昨夜雨涼貪美睡賣花人到未
開門

題綠春畫蘭雜詩

學寫清蘭只自娛芳名未敢匹曼殊冷官風味偏相似筆下纖穠一
點無

一叢嫩綠早含春小影嬋娟自寫真不向燕支借顏色畫花原是素
心人

種成九畹亦尋常
蕭艾人間各自香
才授離騷經一卷
畫花只愛畫瀟湘

露眼盈盈欲笑秋
閨中生未解離愁
新開一種殊風韻
花是同心蕊並頭

蔗山園消夏次韻酬秦小峴司寇

追涼昨到鷺絲家
風雨離披萬葉斜
我是鏡湖仙博士
頭銜只配管蓮花

鄉思如雲澹不收
漁家簑笠酒家樓
碧溪何日同吟社
六月江南夢亦秋

饒綺峯駕部以佳茗乞綠姬畫蘭次韻奉答

小團月換折枝花
愛看亭陰點筆斜
却憶故園蘭信早
才臨穀雨便抽芽

題綠姬為內子畫蘭

朶朶幽花壓露枝
墨波影裏見蛾眉
吳興夫婦能偕隱
弄筆旁添小仲姬

趙子固畫蘭

十分蕭散此丰神
矮紙餘香墨未湮
不浣北風塵一點
幽花標格似遺民

宮禁移栽罷異常
蓬萊紫又御袍黃
美人獨入離騷傳
能抱秋心死亦香

為覃谿師題王漁洋秋林讀書圖

江鳥江花共唱酬
一尊介雅亦風流
著書知有名山約
特為先生畫錦秋

寒雲落葉滿空庭
辛苦倪寬隴帶經
誰道故山蠶尾色
百年猶為雨

翁青

葉詠卷題句有云兩翁跋脚西窗語其一蓋西樵也

滄海無風瀾自迴仙山彈指出樓臺杜陵下筆神光接萬卷曾經讀破來

海內論詩得髓真石帆衣鉢孰前因桃花偈子參三昧許我蓮洋作替人

常州唐孝女名素賣畫養親矢志不字年已七十有二矣余見綠姬偕游惠山親至其家各贈一畫而別並紀以詩

蛾眉生小謝鉛華粉墨流傳自一家門掩惠山蒼翠裏慈烏啼上女貞花

三絕誰誇老鄭虔白頭歸養已無田冷官不及寒閨女賣畫承歡五十年

吾家侍女有清娛學寫丹青恐不如若買二泉亭畔宅為君滌硯掃

風鑪

書隨園先生題佑之丈泛月理琴圖詩後

一葦依然不繫舟
冰絃彈近秣陵秋
故人只有倉山叟
華月傷心記庾樓

戟門沉醉夜如何
日日傳箋到薜蘿
爭怪門生揮老淚
受知深比受恩多

烟水江南最有情
舊游我亦愴平生
松濤昨夜翻秋雨
猶認成連指上聲

白公祠小集同徐嬾雲鈕匪石郭頻伽董琢卿追憶錢竹汀袁簡齋諸公舊游愴然有作

紙醉金迷二十年
美人如月水如煙
木犀風過香無隱
頭白來參病後禪

紛紛黃葉點青莎
晚蝶寒蛩奈汝何
一盞莫辭花下酒
江南耆舊已無多

悼春雜詩

旅泊經年一棹還
故園隨分有柴關
忍飢只願餐蛾綠
鏡裏春痕斷
遠山

啼粧病態畫難成
才掩芳華已隔生
蘭氣一絲腰半束
風神未減雪聰明

一領深紅夾繡衣
玉釵同殉翠成圍
村姑莫太誇於寵
曾向春明質庫歸

牙籤錦軸善收藏
草稿零星牘墨香
身後才知無長物
除多書畫即空箱

庭樹陰陰蘚砌青
游絲飛絮入窗櫺
一方繡榻無人掃
匹似春寒睡

未醒

一作墨梅花帳無人捲 注曰琉球蕉布質輕如絹為
姬製帳甫成湯雨生騎尉將之粵為留一日畫梅而去

斷夢如烟不可尋 簾波燈影共沈沈 幽花零落餘枯樹 離緒誰知比

病深

余初卧病聽香館夢中得句云幽花
貧女淚枯樹老夫心 姬為篝燈錄之

黃茅丹橘佐春杯 緘寄重煩驛使催 天上人間同此恨 玉環仙去荔

枝來

沒後陳石士編修寄南豐晚橘曹駿耕郡
丞寄京師黃茅菜至以供靈席不勝泫然

一卷金經識夙因 觀空閱世總酸辛 靈風忽漾爐烟裊 不見當時繡佛人

博士頭銜註籍無 俸錢閒擲酒千壺 種花畢竟偕仙隱 讓汝先歸領

鑑湖

蓮花博士第三圖中有綠姬
小影汪浣雲儀部所作也

石谿梅館

綠姬初歸嘗扶病一至花下低徊
不去花尚未開惟愛其影而已

臨水柴門久不開 寒香漠漠點蒼苔 傷心一樹梅花影 曾上仙人綈袂來

題畫蘭冊

花含風露月生波 曾費妝臺墨幾螺 游戲當時皆妙繪 畫蘭廢紙補

窗多

真跡而今得已難一莖一葉也尋看可憐絕筆吳篷裏淚入秋花未肯乾

芳草塘上冢詞

寒食風光穀雨茶年年芳草隔天涯誰知舊日嬉春地一朵先埋並蒂花

斷腸春色似青陵蝴蝶前身化未曾欲施墓田修佛事桐陰廢寺久無僧

千載亭誰建六如朝雲往事一欵歔踏青女伴尋仙塚爭吊蓮花女侍書

落日空山哭杜鵑梨花吹雪柳成煙吟魂莫遣銷都盡難得春風有閏年

閑行詩五月十三日作

終日焚香坐小齋
閑行也要暢幽懷
雨餘試踏門前路
芳草青青已沒鞋

落紅漂盡卧谿藤
臨水柴扉叩未應
風過忽聞花氣味
筠籃香透賣茶僧

桐子桐孫長出林
鄰翁手種也沈吟
隔牆便是儂書屋
日日開簾借綠陰

閒身寄在水雲中
飲啄相忘睡亦同
我與沙禽成道侶
白頭翁喚信天翁

由九曲歸武夷宮舟中有述

一櫂樵風引路還
可憐身又落人間
十三仙亦添惆悵
親駕虹橋送出山

吹笛前來夜正中月明三十六芙蓉孤亭今在層霄裏背指天游第一峯

接筍峯高石戶扃似聞茶洞有餘馨御園新墾田多少穀雨年年一樣青

小將嶺

鐵馬秋風幾戰場金鷺峯下話南唐英雄老去歸仙籍始信胡麻飯最香

郡齋桃花盛開同馮百史太令話舊別後却寄

世事如雲雪滿顛一樽難得又花前誰知桐帽棕鞋客曾是春明使少年

故人纔飲花前酒酒未醒時已落花寄語東風須愛惜剛辭樹杪即天涯

九峯雜詩

庾樓回首已人間一笠飄然未肯還
莫笑書生緣分淺幾人冒雨入廬山

莽莽雲濤萬頃寬石船終古泊蒼寒
武夷靈跡分明在只少仙人一釣竿

天花井在最高峯聞道泉源海暗通
采得仙芽雲霧裏煮茶還就翠微中

一峯雨意一峯晴斜日荒荒又不明
遮斷青松三萬樹浮雲飛瀑共縱橫

百道飛泉樹杪斜寺樓多被嶺雲遮
却因一夜天池雨流出黃龍澗裏花

一笑看山悟夙因多應瘦島是前身
連朝游屐都沾溼半是青苔半

白雲

滄浪說法老猶能味外酸鹹得未曾今日拈花付衣鉢九峯雲裏一

詩僧

寺僧慧朗自稱九峯詩弟子有雲濃暗湮游山屐雨細微侵聽水人之句

題吳可之栽竹種梅二圖

六琴館外午陰涼新筍枝枝愛出牆聞道斜川題句後粉痕鐫破字

猶香

一鋤明月破蒼苔幾日香風爛漫開惆悵無人畫踈影禁寒我亦種

花來

題昆明錢生

若舟

詩卷

清襟如水字霏香年少風華已擅場不道老夫衣鉢舊門生門下有

冬郎

生受業於劉生于岡

萬蕊千花不易開春風醞釀費心裁願收繁艷歸根柢管領江山要

異才

老學菴中憶昔游愛才心苦共千秋我非譚語如甌北此筆終須讓

出頭

趙甌北觀察見贈詩我讓出頭非譚語世無敵手始奇才之白生為觀察外孫婿故以移贈

范文正公蜀錦亭

在饒州府舊有公手植海棠

大節高情兩不妨一亭花影幾斜陽相公憂樂關天下也有餘閒種海棠

陳秋河太令贈詩有聞道相如人盡識可曾負弩有臨邛之句
奉答二章

車馬臨邛倦欲還當鑪紅袖笑緣慳少年曾買長門賦悔擲千金未買山

牛背前朝吹笛地布帆明日浪花中馬當山色青無恙或借書生一櫂風

清江浦聽箏

秦箏別調是誰傳
小撥檀槽亦黯然
一種落花芳草地
傷心又值李龜年

菊部飄零踏市塵
繁絃急奏總酸辛
胡琴碎擲長安客
何況天涯老病人

一曲離歌聽漸酣
拋殘紅豆滿江南
春風忽憶纖纖手
雁柱華年正十三

平原道中杏花

黃河一渡即風沙
柳未搖青草正芽
偏是杏林春信早
十分顏色半開花

小樓聽雨夢如煙
綺陌風光又馬前
惆悵一枝才入手
紅妝孤負十三年

雙燕呢喃話別愁，絨書應寄大雷秋。如今縱有簪花分管領，春風已

白頭

女弟素雲嘗畫杏花雙燕圖送余入都

題徐又淑女史畫蘭

玉臺嬌小擅才名，愛寫幽香亦性情。記向花陰看落墨，鷗波自署女

門生

華年妙墨略相同，擊節當時荷上公。林下如今成獨秀，一枝斑管領

春風

女史與吾姬綠春年甫十五俱能畫蘭嘗合作一冊為思元主人所賞各贈以詩綠姬下世今五年矣

再題漁洋山莊圖後送陳伯芝歸里

蠶尾山中有舊莊，幽棲卻愛借漁洋。詩人有例名山癖，儂亦匡廬畫

草堂

予有黃巖詩屋圖

雲樹中田

君所居村店

接香冥香蘇約畧似棲靈

山名

輸君高枕殘書卧看

飽家山一桁青

題張穀園別駕問梅圖

驢背詩情苦未銷
亂山飛瀑路迢迢
不知何樹花開早
只為尋香渡石橋

平生風味記梅顛
畫裏相逢亦惘然
青笠紅衫吾故態
滿身風雪拜

花前

余有拜梅圖

江上送別圖王子卿侍御屬為胡華川題

白鷺洲前退晚潮
蘆花漠漠柳蕭蕭
峭帆一夜風吹去
愁滿江南廿四橋

一笛斜陽兩鬢絲
櫓聲搖曳渡江遲
酒醒莫更推篷看
只有青山似舊時

題王太史藕塘游五蓮峯詩卷二首

奇峯何處忽飛來
生面因君特地開
參透詩家無上諦
能空倚傍是

天才

層霄削出翠芙蓉握手應登第一峯海日三更雲萬重人天都在佛

光中

刺花

小朵濃花也自開誤因顏色暫低徊折來纖手嫌多刺分付園丁別處栽

余有山水癖念昔賢多同調者輒紀以詩

采石危磯捲怒濤詩樓只合畫離騷青山明月今猶艷曾見先生宮

錦袍

李太白

巨斧摩天孰敢勝峨眉天半雪峻嶒後來蘇陸探奇徧第一開山讓

少陵

杜子美

五字超然思不羣襄陽絕唱更誰聞幽尋徧愛王摩詰行盡青谿看

白雲

王摩詰
孟浩然

萬壑千巖各異姿
蘇州澄澹柳州奇
江山妙處憑誰領
都似幽人卷

裏詩

韋應物
柳子厚

山水文章似性情
詩篇蘊藉入琴聲
醉翁一操堪千古
夜夜風泉瀉

月明

歐陽永叔

嶺雲江月句誰能
一代雄才管廢興
健筆鬱蟠龍虎氣
看山只合住

金陵

王半山

樊口西湖最有情
嶺南游興冠平生
海天空濶同胸次
萬里仙槎泛

月行

蘇東坡

生平涉世是虛舟
醉眼公然槩九州
閱盡人間奇險處
月明原不流

黃流

黃山谷

巫峽雲深神女祠
成都錦瑟萬花圍
夢中偏渡桑乾磧
戈馬如雲破

賊歸

陸放翁

講學游山妙悟參武夷九曲恣幽探採芝恐受神仙謗知己平生陸

渭南

朱子

酷愛蓮花又愛山羅浮廬阜浩歌還欲知道妙無窮處只在光風霽

月間

周子

歸卧高齋德未孤溫山就養老堪娛天台雁宕游蹤徧一鶴隨身似

舊無

趙閱道

戎裝駿馬載雙鬟洞府春風幾日間學道龍邱偏跌宕遍携紅袖看

青山

陳季常

記坡公軼事

悽於秋夜悅於春明月何曾有舊新花影簫聲堪一醉閨中語妙似

詩人

王夫人

瘴海相隨亦可憐維摩天女共參禪六如亭子今無恙合種梅花買

墓田

王朝雲

石室携家愴昔游冰車鐵馬奏涼州胡琴一去無消息再看桃花已

白頭

胡琴婢

烏臺詩案費消磨遷客餘生又網羅窺客猶傳都監女美人畢竟愛

才多

鄭女

明月笙歌在翠微扁舟每到夜深歸西湖一別花如雨記得金籠放

雪衣

周韶

笠風屐雨大飄零海外江南似昔經不是阿婆能棒喝先生春夢待

誰醒

春夢婆

移泊後五更復睡忽夢循溪而行沙明水淺東風暫來落花如
綺此身已化蜻蜓坐花瓣上飄然若舟仙乎仙乎人生一切幻

境皆由心造業海浮沈備諸苦惱自達者觀之險夷同致物我俱忘則任天而動亦安往而不自得耶

寒谿沙水太清冷何處飛紅點斷萍笑坐仙舟花一瓣不知是我是蜻蜓

花鵝

別苑笙歌記盛時萬花如海擁蛾眉而今剩水殘山裏只有人家種荔枝

花田

風月誰聞笑語譁晚香吹偏素馨斜可憐栽滿閒田地都是珠娘壓鬢花

雙榕社

一夕風雷替主盟連枝從此擅佳名幽花合種鴛鴦社惆悵紅蘭是

寄生

集蘇寄懷胡香海郡丞

他年夜雨獨傷神
雲海相望寄此身
飽噉荔枝三百顆
東坡也是可憐人

讀白香山上陽宮女詩感馬嵬事有作

金鈿繡轡亂離中
天上人間飲恨同
一種梨花墳上月
淒涼曾照上陽宮

新柳補和葉翁花谿韻三首

細雨絲絲染未成
沿隄漸有賣花聲
青簾影裏鶯黃樹
斜拂春人眼倍明

楚楚新條換舊條
淺於眉黛瘦於腰
不知歌舞岡前種
管領春風是幾朝

乳鶯恰恰聽嬌啼紅板橋東畫舫西怕說春深騎馬路落花如雪襯
香蹄

庾嶺梅花大開文獻公祠紅梅尤盛手折一枝而去

庭梅佳句少人知感遇沈吟又一時千樹寒香花夾路忍寒重拜曲
江祠

幽姿多恐世緣慳小著燕支態亦閒惆悵天風吹太急又飄紅雪下
仙山

寒花爛漫雪成堆此日谿園也自開取折一枝上歸權嶺南春色渡
江來

紅梅灘寄棲霞寺僧

棲霞山翠冷於冰古寺清遊記昔曾落月荒灘今夜夢紅梅花裏欸
詩僧

桐江舟中

烟鬟低漾水風柔
夾岸春山笑不休
詩夢卅年無覓處
畫眉聲裏又嚴州

題奚鐵生梅花

探梅曾到故人家
買屋西泠願太奢
瘦影疎香今夕夢
一菴明月又冬花

顧橫波小影

龔芝麓詩有句云秦樓應是春風誤
未遣羅敷嫁使君當是初贈之作

紈扇慵拋繡榻偏
羅衣剪水帳籠烟
蛾眉一代憐飄泊
猶是雲英未嫁年

湘毫香透畫蘭初
逸韻河東恐不如
身世滄桑花裏換
風流占盡兩尚書

笠耕太守饋歲戲謝

簫鼓連朝沸鳳城峭寒獨自掩柴荆誰知米券煤逋外尚有新詩和
未成

白雲朝出暮飛還道是閒身却未閒避債難尋空濶地借人亭子看
西山

自書澈翁詩後

浮雲世事掃都空此老頭銜換澈翁却借詩禪參妙諦天花雨徧苦
吟中

秋史之弟山泉進士書來謂以梅花一龕供養吾詩賦此寄之
詩佛誰將瘦鳥參海東迢遞接天南雞林近日傳新句吾與梅花共
一龕

書覺生詹事題鄭板橋畫蘭詩後

淨室空山氣味長百年榮悴祇尋常人間何地無荆棘不礙幽蘭自

在香

為竹嶼題夕陽春影圖

草草穠華委逝波
閒愁無復上修蛾
妝臺一霎燕支雨
爭及傷春淚點多

畫舫鈿車往又迴
夕陽無數好樓臺
驚鴻瞥見凌波步
曾向西湖照影來

絮果蘭因各自憐
東風催送兩嬋娟
渡江略晚驂鸞早
多住人間祇一年

吾姬綠春工畫蘭年十五來歸十九下世尊寵歸亦五年及笄而歿

香草難尋隔世盟
玉簫恩重記前生
韋皋近日頭俱白
暗淚逢君又一傾

涼夜

細雨空庭繡綠苔
疎簾一桁晚晴開
移床恰就蘭陰坐
華月亭亭樹

杪來

愛月何妨睡略遲
粉牆偏愛影參差
天然妙墨何人畫
肥是芭蕉瘦竹枝

散髻斜簪喜乍涼
白雲如水瀉虛廊
秋花秋草含風露
沁入詩脾一味香

掛起南窗徹夜明
秋心一枕又三更
夢中不識西湖路
只傍荷花撥櫂行

吳玉松太守以虎邱雜咏見寄感舊述懷即次其韻

一篙春水到門深
斟酌橋邊幾判襟
昨夜仙詩忽吹到
扁舟搖夢綠桐陰

綺席明粧照晚霞
江南耆舊擅風華
青衫當日年猶少
新句流傳偏

笛家

乾隆甲寅五月五日潘榕皋丈邀同袁簡齋錢辛楣王夢樓諸公燕集水榭余詩先成

白公俎豆又蘇公飯顙誰來老杜窮奇福偏於身後享湖山管領又

春風

懷杜閣陳東浦方伯所建以白配蘇二公祠

天葩十丈白于銀紅袖携來影亦新明日城中傳異事看花昨見謫

仙人

玉蘭一株相傳為南宋所植花時其白照天予與劉松嵐携女郎著紅衫坐樹間吹笛觀者艷之

桐橋十里接山塘日日笙歌沸廣場偏愛幽人著書地茶烟一榻偕

僧房

嘉慶庚午予寓孫子祠吳子華偕居山寺嘗偕胡城東詣譚終日忘倦

花意紅酣柳碧毵樽前羅袂捲雲藍才人落魄狂游徧天遣飄零郭

十三

頻伽邀余屢游花市跌宕不羈末韻即用汪宜秋贈君句

閒園供養病餘身難得移尊有故人手折一花持見佛白荷風裏悟

前因

池蓮晚花家穀人文以蓮花白酒見貽且邀山尊同賞

洞天樹石愛蕭森除却焚香便鼓琴惆悵琅嬛舊仙館風蟬鳴咽露

蛩吟

孫淵如題所築洞室曰小琅嬛

歸心萬里白雲馳投老看花醉不辭生作寓公死才鬼秋墳爭唱鮑

家詩

張船山寓治芳砵最久雪中別余曰得一覲老母即埋骨於此亦無憾矣

秋海棠巢手種存買山無地妥吟魂閒鷗曾識簪花字塔影何人訪

廢園

金纖纖嘗游塔影園有詩題壁劇佳繼擬卜築此山不果秋海棠巢其所居也

幾度香車擁碧油花枝掩映下簾鉤玉釵一墮無尋處莫更傷心憶

舊遊

余携岳姬綠春訪劉碧媛墓失玉釵一枝惘然而歸

結鄰早有誅茅約却讓先生早退居想見閉門高卧日萬梅花擁一

床書

移巢病鶴倦難飛夢想巖芳與澗菲何日尋君池上屋一筇黃葉踐

寒暄

本事詩成墨未殘又傳佳話遍詞壇不知賣扇鄰家女可有冰紈繡

墨蘭

山塘女子以綠春畫蘭繡於紈扇輒得倍值下世後為余述之滋然流涕余紀以詩有云誰知賣扇寒閨女也是傷心春夢婆

今又十
年矣

夢中自題石谿漁隱圖

茶具書奩坐卧俱全
家笑語出菰蘆一竿
秋影斜陽外只有閒鷗認
老夫

題琴香閣畫梅寄秋史山泉各一幅

曾寫春風桃李姿
重將瘦影畫南枝
梅龕深處花如海
想見禁寒覓句時

益園當日記題襟
松雪風流照古今
不識鷗波亭子上
可傳妙墨到雞林

茶農為山泉作梅龕圖再用前韻寄答

橫枝影裏妙香參
詩法從今得指南
萬里一輪心月印
鏡天花海即同龕

題楊雪淑比部金陵策蹇圖

壯游曾陟雨花臺
葉葉風帆樹杪迴
今日江山真入手
始知生面為君開

丁字簾前泊畫橈
小樓夜夜聽吹簫
秦淮故事無人記
只與黃鸝話六朝

落紅幾點上春衫
楊柳陰陰綠漸酣
風雪灞橋吟太苦
詩人畢竟愛江南

莫愁湖少小倉山
四十年中往復還
誰信開元舊詞客
白頭飄泊尚人間

緩步游山老亦能
脩然一杖倚紅藤
何年再入棲霞寺
同訪梅花樹下僧

書秀楚翹侍郎悼梅詩後

莫將命薄怨紅顏
天語褒稱詎等閒

上諭有捐軀明志語

妾自成烟心是月照

君歸度玉門關

玉簫再世定如何
梅影吟成月未波
頭白看花牽舊恨
一梢香雪淚

痕多

余悼亡姬綠春有傷心一樹梅花影曾上仙人縞袂來之句又題其畫梅遺墨詞云賸墨痕慘愴無多了一梢香雪扶鸞者謂

姬再生言氏小名月姑當復歸余因作佇月樓以待之今十有五年矣

題王石谷載竹圖卷

有序

圖為素菴太僕索芳作素菴性愛竹其友黃尊古自江南買竹數千竿以船載入京師石谷圖此紀之蓋在康熙戊寅四月後至乾隆戊寅四月歸益齋主人卷中有李鐵君處士沈歸愚尚書題詠今為臨川李春湖副憲所得屬余賦詩

扁舟滿載未嫌貪
愛竹心情舊雨諳
難得高人傳韻事
一篷烟月畫

江南

宿土深根遠更移此君沈醉不曾知龍孫一怒穿林出剛及傾盆雨
到時

團茅小結三間屋隙地寬鋤一畝園添種雜花籬落徧綠陰如水瀉
黃昏

林榭荒涼二百年檀欒相對尚依然借山題句颼零盡只記霜鐘落

枕圓

五字為僧借山句
事見李鐵君記中

戊寅先後隔三朝諸老風流未寂寥今日晴窗披畫卷一叢寒碧又

蕭蕭

李樸園太守留別黃州唱和詩冊題詞

清銜舊領紫薇天五馬雍容又一年難得詩名兼政蹟雪堂俎豆有
坡仙

穿雲裂石裊餘聲赤壁重來倍有情為奏鶴南飛一曲綺裘腰笛悟

前生

洞簫吹罷月如霜羽客曾偕楊世昌却笑了緣緣未了後身今又託

柴桑

道士陶光斗自署了緣道人和詩先成

官情已似白鷗閒兩袖清風一櫂還何事臨歧更回首俊游難畫此

江山

邁過才名世所稀同年擢第讓郊祁稱心樂事如君少一榜簪花二

妙歸

哲嗣伯仲同領是科鄉薦

倦游我亦苦思家買屋桐江願太奢天乞餘年容課子白頭安分守

梅花

惆悵

長安住久漸如家酒可零沽米暫賒一事今年最惆悵典衣無分購

唐花

戴雲帆悼蕙圖

渺渺星橋隔絳河清愁一夕掩雙蛾白頭偕老尋常事偏是才人缺
陷多

殘年風雪記辭家一紙泥金望豈奢底事孤山成夢識巢居先已聘
梅花

八載光陰半別離萬行清淚幾篇詩天涯風雨縱橫甚不許飛花上
故枝

幽花小影畫瀟湘纔讀離騷已斷腸便許蘭因能再種黃門青鬢恐
成霜

題朝鮮朴童子臨茶農所畫梅龕圖

南枝消息報東風向背橫斜態不同慚愧黃金鑄詩佛一龕深坐萬
花中

月中疎影水邊枝想見含毫得意時傳得海東香一瓣茶農畫法澈翁詩

嘉慶六年富驛莊有蜀中女史鵲紅題壁詩六首趙君野航而和之且為譜鵲紅記院本八齣屬題其後

故鄉遙隔馬嵬坡兵火飄零奈汝何題到小名知是識萬行紅淚子規多

飛英狼籍偏天涯怪雨盲風去路賒翻羨寒閨春晝永膽瓶安穩供梅花

一枝玉笛譜清愁藉甚才名趙倚樓可惜未尋埋玉地墓碑親與刻

蘇州

杜宇聲中夜月高十分哀怨寄檀槽倚聲爭似西泠女自畫青衫誦

楚騷

杭州吳蘋香女史自製飲酒讀離騷新曲有喬影一折甚工

藝蘭圖為樹齋編修作

一蒲團地慧香多微笑拈花意若何能借畫禪參妙諦老夫門下有

甌波

蘭為浣雲女史所畫
門人余芝衫淑配也

題小紅雪樓圖即送蔣小榭之官粵中

詩壇海內奉藏園我愧論交祖及孫四十六年詩弟子梅花相見也

銷魂

南海曾經艤釣槎葛洪投老未移家夢騎仙蝶從君去飽看羅浮萬

樹花

雪晴見杏花感賦

綺陌春深柳色遙新晴漸覺馬蹄驕風光一倍增妍麗紅杏枝頭雪

未消

雙燕圖成寄日邊寒閨韻事早流傳穿花又聽紅襟語似訴春愁已

卅年

余舊有杏花雙燕圖

聽雨年年夢小樓賣花聲裏憶前游春風管領今無分猶倚紅妝送

白頭

辛未入都題壁云如今縱有簪花分管領春風已白頭今又二十年矣

上林回首憶清華帽影鞭絲日又斜惆悵黯西春色晚亂山紅徧刺

梨花

三月二十五日紅橋內集

細雨連朝放嫩晴扁舟才上已身輕柳花夾岸吹成雪猶有黃鸝百
轉聲

吳霜雨鬢已蕭蕭連日看花負雅招不是金尊擎翠袖老夫忘却
生朝

十里紅橋蕩槳迴聲歌隱隱出樓臺筆床茶具團圞坐偏向游人少
處來

詩情蘊藉畫清新點染湖山駐好春
難得鷗波傳韻事蛾眉都是辦

香人

謂陳蘋香許
定生兩女士

沅陵舟中雜詠

奇礪無數捲驚瀾冰雪雷霆夏亦寒
見說危灘三百六不知今過幾重灘

亂泉聲裏聽淙潺細石平沙又幾灣
一過黔陽灘漸少緩搖柔櫓看

西山

山如眉黛水如羅欸乃聲中一櫂過
日暮煙深花窈窕更無人見倚湘娥

看花雜詩

李花開偏又桃花晴雪枝枝映晚霞
中隔菜花田一段鏤金錯采是誰家

紅杏梢頭破蕊先風光綺麗嫩晴天帽檐却讓門生插花事低徊四

十年

謂周生際雲初成進士

玉蘭古樹記前朝

樹在虎邱傳為宋人所植花時其白照天曾携女郎艷妝纖游於此

曾倚紅妝聽洞

簫今日俊游如斷夢尋香又過水西橋

緋桃紅淺絳桃深人面春風笑不禁爭似碧桃標韻好一枝照水有

仙心

香國頻年許寄家海棠時節最清華平生宦味寒于水第一難拋是此花

微雨廉纖為洗妝青旗沽酒趁斜陽梨花一樹明於雪詩夢吾懷舊

草堂

余家舊有梨花詩夢草堂其額為王夢樓太守書

臨水人家樹十圍午風香暖透羅衣折花驚起雙蝴蝶陌上隨人緩

緩歸

園西池荷盛開侵曉往觀折枝而返

大葉高花水一方園西信步即荷塘老夫拄杖侵晨出風露全身透
冷香

一畝全開一半開清芬艷影共低徊綠蜻蜓與黃蝴蝶都為尋花歛
歛來

博士前身夢有無俸錢曾領酒千壺放翁歸計渾難定翻就人家乞
鏡湖

附

屠琴塢仁弟太守以三十六峯之六屬韻

玉女窗

雲窗窈窕薄於紗鏡裏雙鬟照影斜惆悵洗頭人不見天風吹落
妙蓮花

百結連環

碧玉連環絕世姿誰憑百結寄相思一峯影卧空江月應見湘靈

解佩時

是程堂集中有湘靈峯詩

半卧松

數峯殘雪明初霽一塢流雲入杳冥曾是夢中尋句處依然松氣

塞天青

掩冉數峯外微露半截松松氣塞空青到天皆其集中佳句也

天風海濤

萬里風煙島嶼昏水仙一操最銷魂笑携東海歸吾袖壓倒坡公

雪浪盆

玉辟邪

能馴猛氣卧烟霞道似神羊解觸邪我與初平原道侶洞天昨夢

入金華

珊瑚網

七尺珊瑚不易裁
丹霞照影徹蓬萊
英雄海內知多少
曾入千絲鐵網來

右六首余祭詩龕所藏吳蘭雪真蹟也其香蘇山館集中逸之
因錄於此

嘉道六家絕句卷三

青芝山館詩

樂鈞初名宮譜字元淑號蓮裳江西臨川人嘉慶六年舉人

有青芝山館詩文集

郭麐靈芬館詩話余有病起懷人詩琴塢太史為補圖樂元淑題絕句云離群

病鶴強昂頭半憶鷓鴣半鷺鷥報道沈郎腰帶緩藥煙千縷是新愁聽松廬詩話江西詩家蔣荅生後當推樂蓮裳吳蘭

雪兩人同為江西人同為孝廉同為翁覃溪先生弟子同以才名遨遊王侯公卿間蓮裳久居幕府蘭雪久居京師晚歲

詩名吳盛於樂然合兩集觀之香蘇應酬投贈外心較多不如青芝多內心也聽松廬文抄蓮裳少日喜為奇麗之文

曾撰耳食錄一書壯歲韻語益工兼工駢體既登賢書屢試不第憶辛未春聞後訪余於萬明寺既而彼此報罷出都遂

不復相見聞其橐筆江湖為諸侯客鬱鬱不得志竟佗僚以終才士偃蹇自古歎之然其詩文足以傳世珠光劍氣詎受

塵埋以之位置於蓉裳笑初之間允堪伯仲

冶仙詞

三十二首

光碧堂深月未高三千玉女醉蟠桃何人誇說崔婆酒可及瀛洲白

嘉道六家絕句

卷三

一 掃葉山房石印

玉膏

金風輕拂絳河涼
鸞杼無心弄七襄
剪取妬羅雲一片
為牽牛製錦衣裳

青雀低飛背彩霞
侍兒扶上紫鸞車
罡風只在珠簾外
吹落飛瓊鬢上花

白環瑤幹久成林
神籟蕭蕭響夜深
誰駕飈車浮弱水
細聽花外落霞琴

月殿清虛冷素娥
當時青桂已婆娑
天風吹下霓裳曲
傳與梨園按譜歌

龍月城中罷宴歸
醉眠忘解六銖衣
瑤臺一夜春寒峭
碧柰花前紺雪飛

簫聲嗚咽繞蓬山
何用金丹駐玉顏
一霎秦樓荒草合
忍騎飛鳳到

人間

邏谷春風十里香馬頭迎拜玉卮孃神仙亦有憐花癖怪得南園蛺蝶忙

金精山半紫雲多石上千年石鼓歌紈扇光於金鵲鏡至今留得照青娥

珠幢翠葆過紛紛微見交龍鬪鳳裙袖裏天花俄散盡餘香猶作妙鬢雲

身是梅花住九疑仙心端不為情癡羊權已隸東王籍金玉雙環却贈誰

水佩輕搖杜若風明珠相贈入懷空可憐神女都遊戲更賺襄王到夢中

芙蓉花發滿秋城白馬青驄向玉京館主是仙何待說王郎一夢抵

長生

香草種成都五色華蠶出後已三眠生涯自有同功繭不借天公下
禮錢

來時悄悄去怱怱頃刻琅璈斷碧空北燭仙人腸斷久不應歸向紫
蘭宮

晝長深院共彈碁露溼門前玉樹枝香氣從風通下界仙人原自要
人知

倏爍雷鞭拂紫綃八方風雨夜迢迢那知玉女招天笑投過蓮花幾
百驍

玉蕊院中香未歇金莖花外語猶新分明萬里消魂路碧海青天思
殺人

少入秦宮字玉姜朱顏未改見秦亡童男童女空浮海柏子松脂那

得嘗

金粟香濃夜色晴
繡襦甲帳起秋聲
仙人亦怕瓊臺冷
却下西山看月明

帳角金鈴墮曉風
驚回塵夢了無蹤
劉郎莫歎朱顏杳
洞口桃花卽是儂

洛水波平暖霧開
飛鳬還向鏡中來
神光恰許分明看
要盡陳思八斗才

年少非將狡獪誇
偶來擲米作丹砂
滄桑三變無人信
池裏紅蓮放白花

斷愁已佩揮精劍
悟道曾吞駐景丸
朱履一雙化為石
儘人持向繡牀看

三生石畔過雲翹
搗盡元霜鬢欲凋
仙侶也須人世物
要將玉杵到

藍橋

碧玉闌干白玉墀青礬勿勿近花枝星娥月姊長相過只避封家十

八姨

偶隨鸞鶴下空山行過招靈一笑還白燕未歸春夢遠玉釵遺落在
人間

漫言金格姓名垂一撫雲璈已別離空贈仙樞龍席訣爭教心死不
相思

玉板金槌落九天何人臨水盜青蓮佳期暗遣雙鬟代了却塵間一
笑緣

被謫湘江十載餘青靈提挈上清都何緣却憶包山客贈與登真玉
唾盂

神梨火棗勝金丹不與人間長史餐莫怨仙家無皂白早將名字注

仙壇

琪花瑶草空淒麗
海雨天風自杳冥
圖畫崑崙焉得似
眼中五岳失真形

古怨

一紙軍書破百城
羣公疊表賀昇平
長安少婦偏垂淚
夢聽沙場鬼哭聲

艷情

小園三面綠闌干
日暮風輕縞袂寒
曾見海棠花上蝶
燈前繡出與郎看

釣臺

天不容人竟隱淪
買山何處絕紅塵
巢由未許逃名姓
况復君王是故人

柳枝詞

御河如帶柳隄斜
楊樹楊花繞妾家
但願郎身似楊樹
莫猜儂性似楊花

寄內子二首

深悔秦嘉上計飛
白雲何處是親闈
長江又隔三千里
截竹生魚寄不歸

春風吹斷別時腸
內子句轉眼金臺見
雪霜帶得羊裘猶未典
不須搗練寄衣裳

澹思進士杜陵春院本題詞三首

樂府爭傳太白狂
杜陵野老又登場
詞人每愛談天寶
水綠山青易斷腸

澆愁還借八仙歌
雲夢胸中作酒波
我合傷心君含笑
詩人從古不

登科

偶吟戲蝶與嬌鶯黃四娘家寄遠情遂使浣花添本事紅牙重譜艷
歌聲

消寒第二集題消寒圖三首以題為韻

風信初來煖尚遙客寒同借酒盃消一分花事三分雪留與詩人次
第描

冷蕊踈枝水墨乾宮梅正暖野梅寒故園驛路三十里籬落何年放
眼看

月地雲階影不孤尋詩得句笑相呼他時合有傳神手續寫仙宗十
友圖

題紅拂圖二首

可憐富貴逼人遑餘氣尸居復幾時回首侯門歌舞伴沈香塵裏葬

蛾眉

絕代才兼絕世情
英雄兒女盡輸卿
剪燈記讀虬髯傳
片月當窗照膽明

春遊雜詩五首

錄三

碧油幢引高軒過
紅餞竿牽矮馬來
尋得遊人稀處立
始知羅綺在塵埃

御柳搖風早燕來
玉河堤上望瀛臺
晴波照我清於鏡
太液輕冰昨夜開

白桃一樹艷西鄰
紅杏東牆亦自春
夜半月明風露冷
花間誰是惜花人

渡河詞三首

錄二

悄悄西風渺渺波
雙橫玉筋瀉明河
洗車昨夜滂沱雨
不及今宵灑

淚多

片月西沈碧海秋
人間好夢正悠悠
夜深幾點歸鳥影
飄墮誰家乞巧樓

除夕見唐花

頃刻花開千萬枝
人工奇幻奪天時
春風自有真消息
除却紅梅總不知

雪遊草橋即景偶成

茅屋松棚絕四隣
賣花翁媪髮如銀
迴香亭下紅橋尾
少箇當壚賣酒人

橫煙一縷是雲汀
蘆管如鍼刺水青
風約釣絲搖不定
游魚來往避蜻蜓

蓮葉西頭晃翠翹
星妃來起水仙招
迴波三折無人見
一蝶斜飛過

短橋

題畫橋

碧烟芳草冷青陵千古相思怨未勝今日癡魂太無賴一枝花上一
韓憑

幻出滕王畫裏身零星金翠了前因若教繡上紅羅袖愁煞西家却
扇人

蘭雪偶學作蘭戲題其後

素蕊幽香總絕塵是花是葉是前身現身自寫臨風照莫認揮毫又
一人

同蘭雪崇效寺看海棠二首

幾日東風漸漸狂關心都在碧雞坊流鶯已怪遊人晚啼得春愁滿
寺廊

商量詩句坐花茵紅雨紛紛各滿身
賴有玉人簪鬢去不教全樹盡成塵

浩然閣下梨海棠秋日各開數花

梨花又白海棠紅開向煙涼露冷中
往日芳心元未了故將餘艷補春風

芳陰別業夜坐

棲鳥啼月上觚稜樹杪星河隔幾層
漸覺夜涼風葉響掩窗先護讀書燈

蝶二首

五色衣裳製作成萬花含笑欲相迎
蠹魚空食神仙字竹素園中了一生

琅邪情死奈情何輸與秦宮樂事多
惆悵南園芳草歇一春仍是夢

中過

九日呈霞軒王子

長安今過五重陽
歲歲秋花潦草黃
不敢更登高處望
白雲天末總他鄉

又是劉蕡下第初
王孫相慰感何如
恐傷白髮慈親意
為我商量作報書

燭花剪盡淚頻傾
遊子私心忍自明
慈母如天終諒我
十年低首向科名

詩魔

詩魔瘦煞賈長江
却喜愁魔賴爾降
好句成時常獨笑
冷雲寒月過西窗

題余伯扶孝廉

鵬年

曹州牡丹譜次覃溪先生韻

錦作晴天繡作陰滿城蠶蝶盡關心客窗閒續廬陵譜花姓花名取次尋

艷壓天彭妬洛陽曹南山色借紅黃家家傳寫花王傳更費膠東紙萬張

劇憐風雨誤芳時

譜云花時多風雨

卷尾空添懊惱詩換得養花天一片衣

裳五色鬪花枝

見月

半規明月一窗寒又向齊州客舍看別後故人惟汝在隨余千里出長安

歷下雜詩

九陌風寒蝶信遙今年幸有兩花朝歷城城外春無價費盡黃金鑄柳條

寒食今年正鵲山
賣錫聲裏憶鄉關
六年未掃東郊墓
每見梨花一
愴顏

青山城郭綠楊街
處處泉名刻石牌
還讓城西誇絕勝
家家流水繞
庭階

蛾英春水碧溶溶
合與城東舜井通
幾點蒼梧斑竹淚
可能流到此
泉中

金碧新祠祀鐵公
當年城上舞梯衝
燕王自合榆川死
鐵板難收第
一功

我聞賢劫成千佛
誰信齊州石亦靈
無草無花無樹木
山頭都是佛
頭青

杜康泉水次中冷
二十三銖重一升
我飲千鍾猶不醉
人間安得酒
如澠

野客盆池蓄錦鱗
餐香啜影意相親
長河正有桃花水
多少游魚上釣綸

濟南名士數華泉
司寇稱詩又百年
秋柳一時榮艷極
只今憔悴古亭邊

奇絕芝英夢裏情
先教夫壻識才名
一溪柳絮門前水
猶作青閨漱

玉聲

李易安故宅在西門外柳絮泉上易安有漱玉集

即目

溪頭野草青於麥
屋角晴山淡入雲
自過歷城沿路看
江南風物見三分

寶應雨後舟行甚疾

半日寒陰半日晴
流雲送客似多情
秦郵兩岸青蘆葉
不及春波一葦輕

雨中過高郵

甓社湖南雨作絲舟中無故有相思春風綠遍蕪城草畫出秦郎絕妙詞

謝薌泉漕使

振定

招遊湖上登尺五樓作

水雲輕送落花風人在絲簷繚繞中一片綠楊遮不斷和煙吹過畫樓東

窗扉斜對秣陵開誰是蕪城作賦才可惜酒香花暝地青山不肯過江來

張寶崖參軍

荃

為寫蓮隱第二圖題三絕句

閒身雅稱芰荷衣秋水當門待客歸二十四鷗花一色六年不傍海翁飛

江南花妬耶溪女海上雲迷太乙星何處林塘如許勝被君傳寫入

丹青

仲寶幕中原借住歐公堂下只閒遊荷錢已大宜歸去歸到臨川是
早秋

真州絕句

凸字城東八字橋青鸞坊裏夜吹簫詞人葬骨仙人掌殘月無情上
柳條

芳草家家綠到門城中冷落似荒村行春門外街如繡半是簾波半
水痕

黃梅時節賽都天十里鹽河塞畫船遊女衣裳都淺碧香花隊裏鬪
嬋娟

莫愁湖權歌

並序

李松雲太守

堯棟

重濬莫愁湖與諸詩人賦權歌懸之四壁

余既讀之遍乃亦作四章

莫愁湖裏開白蓮莫愁小像如花妍阿儂昨日采蓮去人道莫愁來
蕩船

湖水盈盈比鏡光朝朝湖上理新妝玉簪一股猶嫌重爭用金釵十

二行

河水東流湖不流莫愁不愁儂欲愁莫愁年紀如儂小抱得佳兒字
阿侯

莫愁湖比秦淮寬秦淮易乾湖不乾歡去秦淮登岸去儂船何處來
迎歡

過江至金陵絕句十四首

帶甲臨江阻怒濤可憐一水限孫曹子桓若是龍驤比爭怕東吳鐵
鎖牢

江左風流晉太元殘碁一局破符堅佛狸飲馬歸何幸聽唱符鳩當
凱旋

一片黃天古戰場奇功百代數蘄王夫人親打軍中鼓羞殺秦家泛
海航

紫蓋黃旗氣易消青絲白馬應童謡空勞史筆分優劣起落都如赤
岸潮

江流狹處是龍潭句曲當眉滴翠嵐貞白松風猶自響吹來仙氣滿
江南

星繁月黑近津亭水寺遙鐘隔岸聽鼓吹山中藤竹笛可能吹得老
蛟醒

客居桃葉渡西頭不見秦淮廿四樓聞道青溪明月夜小姑亦自理
瑩篴

青山無數未知名山下煙蕪一掌平
往日帝都今郡縣將軍閒領駐
防兵

烏衣燕子一雙雙帶得斜陽上客窗
今夜夢中歸較近南行不用渡
長江

長千古道綠楊灣飛去楊花酒肆間
孫楚樓邊人獨飲夕陽紅遍六
朝山

幾人搖筆感興亡漫許劉郎獨擅場
水是琉璃天卵色鬼才先有沈
青箱

迷樓辱井渾相似玉樹垂楊兩可憐
一創陳隋亡國易莫將形勝論
山川

遺宮故苑列城隍畧似咸陽與洛陽
至竟偏安輸正統新亭風景早
淒涼

豈有華裝照眼明一琴雙劍此書生水西門卒臨河坐不放輕舟亂
出城

吳娃飯牛圖為白菴題

綠竹鞭梢白木蘭山花常艷野田寬阿姨紅豆調鸚鵡不及儂看黑
牡丹

隔岸桃花紅不紅亂鴉飛傍酒旗風笛聲散在斜陽外遙看春山下
牧童

細草柔莎遶屋生一年天雨復天晴飛霜墮月長安道多少征人秣
馬行

書姑蘇女士金纖纖瘦吟樓遣集後二首

不是多才不解愁西風吹夢墮妝樓青鸞背上尋詩去曾遇騎鯨李
白不

神仙歸去恐無家終作人間夢綠華料得詩魂癡未醒月明彈淚賦梅花

題白菴蒔菜圖

畫白菴荷鴉嘴鋤其
姬人篠雲携菜籃

小園春色滿畦烟寒食初過穀雨前儂挈竹籃君荷鍤菜花黃到鬢雲邊

題新城女士魯敬莊墨雲軒詩稿後

麻姑山角黛雲低簫曲峯頭好鳥啼橋畔桃花草根蝶晚唐佳句出

深閨

集中桃花紅到竹橋邊
草根蝴蝶冷二句最佳

得蘭雪溪上晚行詩次韻却寄

寄到陰牋日正斜知君詩思在烟沙山邨面面溪流碧也蹈涼雲看

藕花

除夕

不堪寂寞追前事已覺豪華遜後生記得年時當此夕強人同坐到
天明

春池

春池日影漾簾櫳二月荷錢貼水紅回首昭王臺下草芳根猶在雪
霜中

水綿二首

晴霞千朵散長空仰面看天照眼紅大似田家操作婢濃眉廣額鬪
春風

海外曾傳吉貝衣何人擘絮上鳴機嶺南歲暮無霜霰五月晴空白
雪飛

睡起

花影橫窗近午天野人高枕尚遊仙夢中不作南柯守贏得清眠已

十年

偶贈

灼灼家原住錦城東風吹送落花輕
三生記取彈箏處珠海樓船月
半明

煮茗焚香約後期當筵先乞定情詩
可憐誤信旁人語要待裴郎及
第時

潮州雜記八首

港口空存陸厝園誰從青徑弔忠魂
可憐寒食花坑路鬼子墳頭有
子孫

神泉杯水孕神童共惜優曇一現空
文苑傳中憐孺子解吟紈扇賦
秋風

海角驚傳咏絮才青霞洞主降蓬萊
三生一念情緣在重為山郎傍

鏡臺

六曲闌干積翠亭雲簾面面遠峯青磨崖更勒西川碣水月山前是墓銘

闢佛昌黎偶愛僧留衣亭在白雲層靈山亦借韓山顯不見空門有續燈

采花田畔水沄沄白堠仙人是隱君不有蕭郎來摸壁小祠猶誤塑朝雲

西湖春水碧於天猶是文饒度嶺年玉象自沈應有意免隨草木去平原

金山盤石似山君射虎何人傍海雲莫訝姓名非李廣勒銘人是漢將軍

十一月廿五日自郡城登舟

日午脂車夜放帆朔風潑潑雨毵毵故園別却梅花去寒影隨人到
嶺南

謝埠雪行

一兒一僕一扁舟誰信先生是遠遊催換小車倉卒去一天飛霰打
征裘

柳絮

柳絮多情撲面斜東風吹去入誰家便須墮在珠簾裏莫更隨波伴
落花

朝雲墓五首

豐湖秋水綠沄沄羅帶輕拖六幅裙折取芙蓉花一帶疎風冷雨弔
朝雲

從來名士惜蛾眉况復同心患難時天女解禪先幻化可憐擇地葬

西施

六如亭下繫扁舟蘭麝千年土一坏怪底興東塋墓志埋香不載淑

人邱

廣東通志不載

墓門殘碣委烟沙荒草成窩水一涯我定報知賢太守

謂伊墨卿

勒銘兼

為種梅花

墓玉深深傍佛堂芳魂長此禮空王榴花亦是南來伴何處青山白

骨香

上元

春風剪綵作山茶燈火連城幾萬家酒醒夜窗銀燭施月波寒浸水

仙花

初六日夜至滕王閣下寄城中諸子三首

紅斷斜陽始泊船月明如水照江天滕王閣上珠簾捲不見西山又

兩年

漏鼓催頻酒盞空
微微半夜夢洲風
南雲回首都吹盡
重向東湖作寓公

蜚雨炎風送客還
舊時詩筆未曾閒
故人莫笑歸裝薄
帶得南荒萬疊山

題晴雪試馬圖四首

暖雲如絮野天寬
高柳垂絲拂繡鞍
七尺錦袍三尺劍
紅樓莫作冶遊看

天風獵獵響弓弦
攬鞚初搖剪水鞭
紅叱撥嘶花滿地
金臺只在馬蹄前

東華蹀躞盡游龍
一躍從知萬馬空
紫陌將騎銀杏葉
素縑先貌玉花驄

浪遊虛負好年華
舴艋輕舟薄笨車
玉勒金羈雲路遠
讓君先看曲江花

江行雜詩

湖煙湖水澹斜曛
九疊屏風一片雲
兩岸千山看不見
獨開青眼對匡君

虎溪閒月為誰明
夜半孤舟傍落星
家本翻經臺下住
吾郡有謝康樂翻經臺

芙蓉清漏幾時聽
女兒港口碧潺潺
破鏡飛來照髻鬟
一霎南風帆腹飽
回頭失却小姑山

大姑高髻更裁裁
不逐天孫夜渡河
應笑小姑空早嫁
彭郎猶自隔風波

戰艦如雲列皖公
永王摧敗太怱怱
可憐皖水長鳴咽
曾送婁妃返

故宮

池口初笑六出花荒州無樹宿群鴉移舟欲傍梅根浦手撥寒雲望九華

天門煙樹對江分山外青山隔暮雲好是詩人埋骨地浪仙墳傍謫仙墳

采石山頭古戰場幾家勝負各滄桑宮袍夜夜看明月只有騎鯨太白狂

輕冰夜凍玉蟾蜍叉手詩成呵手書牛渚高吟袁彥伯風流今昔定何如

未必鍾山王氣收從來天運借人謀六朝天子皆孫皓莫笑降幡出石頭

謝公不出奈情何贏得王郎月下歌携妓東山豪達事江南絲竹至

今多

潮到蕪湖城下還瓜洲回首望鄉關長江一勺無情水流斷江南萬
疊山

六載隋隄聽玉簫依稀猶憶舊虹橋重來又是春風近只待流鶯上
柳條

杭州沈秋湖贊府出其內子琬君夫人手畫蝴蝶草蟲冊子索
詩各題二絕即以易畫夫人山陰朱氏名懷蘭畫品精妙香墨
欲飛洵可寶也

半醉飛瓊踏月歸仙風吹墮六銖衣餘香化作雲千片都揀花枝好
處飛

幾點桃花幾縷煙鏡臺金粉入毫顛仙蟲未許滕王畫合借鷗波妙

手傳

右蝴蝶

金井闌干一夜風絲絲絡緯草煙中綠窗繡罷拈蘭蕊自寫秋聲課
女工

秋士愁多蟋蟀知詩懷畫景特相宜披圖搗管清吟處更是燈寒露
白時

右草蟲

蘭谿阻淺

城角沙寒水一灣
柁樓終日對蘭山
遙知昨夜隣舟女
唱過金華五百灘

悼硯并序

硯為端溪紫石肖蒲桃形曰蒲桃硯丁巳秋購自南海市故人胡果泉觀察見而愛之以琴一劍一易去余自疑於貪他日復得一硯質較良因贈之果泉笑曰是我貪也仍歸余前硯頃携來揚州為鈔胥蹉跌以碎情不能置不直為硯云爾

聞果泉將移官粵西若有便郵者當以此詩寄之

壁碎千金亦偶然難忘離合舊因緣還將宿墨修書信寄向炎風瘴雨邊

平望阻風

鶯脰湖光漲綠醅船頭忽起練花堆漁舟亦在風聲裏翻向波心打槳來

再題白菴蒔菜圖

白菴此圖作於乾隆乙卯余曾為題一絕句今年以大庾校官謝病歸南城買宅城南秋水園側頃來揚州出圖相示復題一絕

秋水園東一畝居如今真得荷長鋤可知苜蓿盤中味不及雲卿手種蔬

題白菴遊黃山圖

萬丈丹梯倚碧空，芒屨半路阻罡風。天都不到應無恨，知在雲中在海中。

冬窗雜詩和芙初四十四首

并序

頃見芙初此作，有觸予心。於是感時寓興，接近懷遠，怫然蘊發，拉雜成咏，積疊有日，不復詮次。

匝月生涯寄酒杯，黃花憔悴待紅梅。不知冷月疏煙裏，飲到開懷第幾回。

劉郎

芙初

深抱看花心眼裏，無花只苦吟幾卷書邊。成老伴一絃琴外

有知音

白翁

吳白菴近稱白翁

狂似酒中仙，醉後惟參畫裏禪。垂老胸懷有如此，已

曾坐破廣文氈

煙雲久繞題衿館竹石新開六一堂

在揚州郡齋張古餘太守建

別與此邦添故

事不教明月照垂楊

天妃閘上糧艘阻六里黃河六尺深水手嗷嗷十三萬化為鴻雁起

哀音

京兆題名帶笑看汪家兄弟貢春官

竹素竹海

淚珠更為吳生落

巢松

一笠

燕霜客路寒

新得吳生燕市書道來相見喜何如不知從水還從陸舟楫難行合

買車

汪吳雄筆今世稀彭郎還復懷珠璣

甘亭

雲中雲外皆鸞鳳可許烏鴉

接翅飛

北平學士

翁覃谿先生

老休官一飽猶輸苜蓿槃聞道著書簾不捲翟公

門外雀羅寒

萬

廉蔣師退

吾鄉兩傑才江南直北困風埃

俱為縣令

黃紬被裏眠未熟城

外督郵騎馬來

襄漢兵纏近八年鴛鴦跼跼墮狼煙繡衣使者

胡果泉廉鎮

書相報舊日

流亡漸種田

楊柳無風只自搖秋魂一縷為誰消明年桃李開時節可有流鶯識

舊條

史君

恒齋

去後尺書稀多病須君好自醫度曲論詩相憶外暑窗斜月

記圍棋

王生

甫惕

身短氣如虹不獨文章驚巨公可惜近來牙齒落飄搖江海

一衰翁

紗籠白髮兩司成

吳穀人祭酒胡西耕光祿

文字科名並可驚與我筆耕同一歎

並為揚州山長

花前賭酒不勝情

淮左英髦偶及門

桂光生談地

二子是蘭蓀相知不過憑文字莫作蘇

湖弟子論

少不窮經壯未能客遊孤負讀書燈諸生莫笑便便服原為觀潮到

廣陵

新得門生沈式

如名東鉅吾友狎漚之子

十三能讀乃翁書青箱但學休文好

慚愧言詩却起余

秋竹縱橫氣未平引杯看劍輒談兵我歌君為吹長笛猶作當年出

塞聲

蔣秋竹

七杉作令赴臨湘為我停舟淮水旁客子官人難聚首一杯溫酒淚

千行

饒七杉

湖海詩傳鏤版行

王蘭泉侍郎所輯中收鄙詩三首

侍郎持論比新城王孫偶賦高

軒過

侍郎八十子為作壽詩亦刻入

謾許韓門附姓名

兩點金焦各自尊推波激浪了難分江淮經月無新雨那个山頭能出雲

一幃蘭閣繡鳳圖王郎鐵舟妙筆寫名姝花光玉色何人似捲盡珠簾

得見無

殺賊思橫太乙槍待將真訣問江郎鄭堂包生亦解論兵法慎伯聞有心

書閱錦囊

玉管銀箏緩緩歌夜長無奈燭花何醉來消得人間住莫怪青袍酒暈多

日下仙人蔡少霞浣霞儀部袖飛五色蕊珠花騎來黃鶴常清瘦為少麻

姑擲地砂

近代歌詩推老船張船山太史醉吟不減李青蓮前年記飲歧王宅獨立

西風自放顛

楊蓉裳

戶部劉松嵐觀察

詩老鬢將皤先我同登拔萃科幸肯忘年比張陸可

能覓句敵陰何

病葉狂花醉自憐更無他物送流年漁翁又說江邊冷昨夜蘆風撼

釣船

王鈞山頭老畫師

宋芝山

却耽風月更填詞吹簫送酒紅燈夜自寫花

賤付雪兒

西甫清詩信手拈竹煙蘿月滿疎簾看渠名字兼風格可是前身白

玉蟾

胡城東名長庚

弱冠能文有陸機華亭海上聽潮歸曾添一種相思曲龍女如花鬪

舞衣

祁生客上海曾作洞庭綠院本

金線年年壓繡筐金生

山手

情緒太淒涼芙蓉已老秋林瘦落葉聲中

話斷腸

百年興廢漫傷懷一歲榮枯便可哀花事盡時湖水冷更無人棹酒船來

牛女何緣住隔河河流寒凍亦無波生憐現世為星宿愁比人間恨更多

玉堂載筆懷潘岳

紅茶

山館吟詩憶許渾

青士

往日清遊何日再琵琶船

上倒芳尊

豈有才名敵子山

吳蘭雪

斯文骨肉舊相關長卿今作貲郎去烟水南

湖一鳥間

張侯

鶴舫

詩筆鼎能扛官罷餅空滯吳邦

令天長未幾謝病今尚不能歸

料得一燈愁

坐久更無人影過西窗

二譚遊宦俱滇南

蘭楣學使子受別駕

萬疊蠻山隔笑談更憶周郎

希甫刺史

并宋

子

梅生太守

黔雲蜀雪擁征衫

隨園簫篴已無聲

袁簡齋太史

安問禪燈續禹卿

王夢樓太守

買得一杯京口

酒談詩猶為郭生

傾蘭池

詩人太半入詩龕

法時帆學士齋名

韋孟宗風五字參寒月一天松幾樹霜

雞催夢過燕南

杜牧平安夜不迷奇章相念轉清凄平生何止揚州夢留得悲吟在

竹西

題襟賓客異平津弄月嘲風各愴神除却性情成底事不辭辛苦作詩人

逐日煙雲過眼催逼人霜雪上頭來苦寒亦自無多日為報梅花緩緩開

次韻胡城東

長庚

六安溝舟次雜詩二首

錄一

眼裏江南黃葉邨秋深里社賽雞豚斜陽斷後各歸去三里蘆花白

到門

覃谿先生命題天際烏雲帖次卷中元人韻九首兼以志別

景中人與詩中畫客館疎窗眼暫明此後雲煙都入夢千秋傳得辦
香情

六橋歸路經過熟午夢春愁赴筆尖為問錢塘官閣裏他時故事倚
誰添

飛出樊籠夢不驚松巢明月照霜翎調鸚放鵲憐兒女誰讀浮邱相
鶴經

莫再東華踏軟紅西湖煙月古時同茶香一縷依稀記蘇小樓前柳
絮風

萬事濛濛過眼塵不須惆悵曲江春只餘翰墨因緣重長憶元亭識
字人

餘杭美酒味如仙
合瀉坡公藥玉船
醉卧古梅呼不醒
夢隨花影弔嬋娟

歸過平山拜醉翁
藕花深處候涼風
蘇公正有門生感
不在淮流注記中

冉冉詩魂更艷魂
梨雲幻影且休論
幾家三字元和脚
真是當年手

爪痕

山谷跋云子瞻作何事及州字宜所謂柳家新樣元和脚者乎帖中正有此三字

淋漓大筆埽鉛華
不遣人間俗口誇
凡骨自知猶可換
要從勾漏覓丹砂

六安溝夜泊

魚蝦鄉裏著人家
門外天涯即水涯
即水涯愁聽漁翁
相對語秋來無處傍蘆花

王鐵舟覺梅昆季索題其尊人益莊先生畫山水遺稿

一角雲山寫未全
石痕林影淡如煙
仰天擲筆凌風去
留與人參解脫禪

書頻伽病起懷人圖後二首

離群病鶴強昂頭
半憶鵓鶯半鶯鷗
報道沈郎腰帶緩
藥煙千縷是新愁

倚棹蕪城小雪時
高樓銀燭照深卮
相思何似長相見
未要楓青月落時

管仲姬畫蘇若蘭小像并書璿璣圖墨蹟卷子二首

人間第一掃眉才
字字天孫織出來
但要連波能悔過
何曾真妬趙陽臺

簪花妙楷出鷗波
玉管銀毫代錦梭
為憶王孫成久病
借他離恨寫愁多

揚州旅次題壁二首

盡日和衣醒復眠
麴生來索杖頭錢
東門有船不可泛
榆莢雨中啼杜鵑

已過上巳又清明
花落新城更舊城
聞說韓嫣狂欲死
彈丸無故打流鶯

為陳舉秋秀才題畫海棠便面

走馬何人到碧雞
長安花盡草萋萋
筆端留得春姿在
不逐殘紅入燕泥

四月十五日屠琴塢大令

倬

招同顧南雅

蕓

董琴南

國華

劉芙初

嗣綰

三太史吳蘭雪國博

萬梁

沈小苑孝廉

欽韓

寓齋小飲各咏瓶中芍藥

三絕句時琴塢以庶常改官予與蘭雪小宛俱罷春官試也

謫下瑤臺露未乾
一圍金帶等閒看
莫嫌開在春風尾
猶勝梅花徹

骨寒

浩態狂香對酒卮花名何故號將離黃雲低壓窗風緊正似銷魂握手時

十二珠簾六曲屏容華絕代總飄零買花也欲留春住先少閑錢市膽瓶

影心亭晚坐東姜曉泉處士

壚二首

檻外清池鏡晚空冷吟分付木樨風遙知獨坐倪高士也說秋心向碧桐

曾畫朝雲妙入神更留佳句寫酸辛與君各在西風裏都是天寒袖薄人

春陰

春陰漠漠緩琴絲冷霧霏霏溼硯池消却江南春一半梅花如夢未

曾知

往揚州將發口占

剛得吳天兩日晴
風吹鳥語作離聲
年年盼到園花發
都被春寒送出城

同胡鶴泉金手山淮陰柳衣園看花口號

湖水灣環綠進城
碧蘆風起送船輕
猶堪照取遊人影
比似淮流畧有情

往平旅夜見壁間舊題續書二首

遊蹤到處只堪驚
風又淒淒月又明
重讀舊題塵滿壁
碧紗紅袖兩無情

或通或介人皆詫
非夢非真我自疑
若住江南風信裏
此情應有落花知

聞吳白菴卒於蘇州詩以哭之得五首

死當埋骨在蘇州

白菴句

詩讖先從廿載留未必精魂歸故國只應仍

戀石湖秋

左持酒琖右揮毫詩畫聲名晚益高罷舉辭官頭未白一生奇氣吐
青袍

同作醉翁門下士

與君同受知翁覃谿先生

仍為廬嶽社中人論交已久論文細

可是他生未了因

風雨相思半死生

余丁卯四月和白菴留別句

淮南賦別各吞聲何知五載音塵

絕一曲驪駒萬古情

孤窗長夜雨瀟瀟舊館題襟燭影搖地下若逢蔣師退為言存者更

無聊

袁浦寓齋夜吟二首

殘月無光夜更寒
莫因酒後倚闌干
留將薄醉成佳夢
夢取瑤琴對客彈

譙鼓籠同畫燭明
河聲懶聽聽江聲
黃昏一陣隨陽雁
飛到天南第幾程

揚州燈市詞

月觀風亭久寂寥
只餘燈火鬧元宵
清淮凍合寒雲重
爭許魚龍趁晚潮

琴塢惠所畫山水幀子次題畫韻答之

吳山曾醉落梅天
重向鑾江話往年
他日展君圖畫看
半成山霧半江烟

丙辰五月余自揚州歸過杭與琴塢及諸同好飲於青平山寺今七年矣

題棟亭圖四首

并序

康熙中內府漢軍曹君董三官江甯織造手植棟樹於庭而

而其子荔軒繼官於此因作亭而寫圖焉韓慕廬先生為之
記今歲黃閭峯員外家荔軒自號棟亭後為兩淮鹽政

支菑園深絳雪飛當年初黜使臣衣登樓印綬傳佳夢重見郎君帥
武威

亭外花風信欲闌流蘇宮紫散春寒可憐博得韓宣譽畫入冰綃更
好看

東郭趨庭事已陳一株長殿秣陵春婆婆料得無生意送過曹家兩
代人

比似甘棠已百年洛陽忠孝至今傳千金自買姚黃貢不費官家少
府錢

病起即事三首呈繼蓮龕觀察

分曹射覆復高歌未覺筵前蠟淚多才隔一宵如隔世藥爐烟繞病

維摩

小園池館鎮虛明
面面闌干帶晚晴
風起南窗花竹響
聽來渾不似秋聲

新持酒戒不成眠
始信如今夜似年
二十五聲秋點盡
華胥迢遞隔人天

效漁洋治春詞九首

花朝已過又新寒
雨更淅淅雪未乾
風信枉教梅第一
早將春色讓盆蘭

連日看雲嬾出城
愁心寄入遠鐘聲
石根幾種無名草
綠到人邊似有情

常笑春人信自癡
不愁春短怕春遲
花開便不禁風雨
試問金鈴合得知

燕子忙時午院閒春光猶在有無間樓頭一片煙嵐色青似江南第
幾山


天甯門外早鶯啼風引垂楊綠向西正是遊人相見處畫船搖傍錦
帆隄

野水揉藍色未勻春陰濃淡隔城闌輕雷夜落雷塘岸喚起擔犁叱
犢人


金鼓從容尾鈿車少年喧笑說繁華尊前老輩翻惆悵不見蕃釐觀
裏花

九子萍開水欲波隔煙隔樹有笙歌背人選得凭闌處一蝶如花繡
綠蘿

社日停鍼百事無閨人閒打選官圖牙籌賭得金釵轉忘却香消鵲
尾爐







PL
2539
.C45X
V.2

嘉道六家絕句卷四

天真閣詩

孫原湘字子瀟江蘇昭文縣人嘉慶十年進士有天真閣集

墨林今話先生清才雅望著於未通籍時家居二十年優遊
泉石一以獎借後進為己任當事重其人或聘主講席先生
亦樂為近遊輒與門弟子偕曠覽山川風物紀之篇章而造
就人才由此益眾性高澹鶴立秀徹神骨詩合太白長吉義
山為一家著天真閣集三十二卷古文雜著若干卷讀者稱
謫仙人行楷隸古皆有法旁通畫理時寫墨梅以應人請古
雪蘊胸冷香溢紙隨意涉筆自成逸品或配水仙蘭花尤韻
絕自署姑射仙人侍者晚歲頓悟貝典頗有心得年七十以
微疾端座含笑而逝夫人席氏佩蘭號道華工詩有長真閣
集亦能為湘花寫影見畫林新詠國朝先正事畧子瀟年
十五隨父任出山海關登醫巫閭援筆賦詩已有驚人句丙
辰會試下第歸途與舒鐵雲王仲瞿同行三人者才相若唱
和無間詩名若鼎足焉聽松廬詩話天真閣詩骨力沈鬱
不及船山却無船山集中之叫囂才氣富贍不及隨園却無
隨園集中之遊戲其詩有兩種一種以空靈勝運思清而能
入運筆活而能出妙處在人意中又往往出人意外一種以精
切勝詠古必切其人論事必得其要固是應有者有却不肯
人云亦云又生平最重情字其詩有云情者萬物祖萬古情

相傳又云此生如春蠶苦受情束縛又云在我則為情及人
則為仁發揮情字簡括透關合觀贈內寄內諸作可想見閨
房之樂又可想
見伉儷之篤

春夜

夜深清影立中庭一陣濃香撲畫屏隔院有人低送語桃花扇底數
春星

抵郡

沙棠之柅木蘭舟夢逐春潮一夜流細雨輕寒人未醒落花聲裏到
蘇州

雷澤

雷澤開先一釣竿太公溪後子陵灘王師帝友皆容易第一無如大
孝難

梅

自知冷淡合時難零落空山伴雪殘縱買胭脂染顏色看花人又怪
春寒

七月初三夜

愁殺新愁接舊愁湘簾又見月如鉤秋聲不待梧桐落先自芭蕉作
起頭

家淵如茂才

星衍

雙芍藥圖用蘭韻軒主人韻

月娥楚艷鬪芳叢留殿春光屬化工怕與小桃爭賣笑故將花影背
東風

寫出交枝軟若絲春愁酒病兩難支名姬老去名花晚一樣傷心不
遇時

曉窗

風急窗櫺細雨彈起扶殘夢急憑欄平生事事緣情誤又為看花著

早寒

三橋春遊曲和竹橋丈韻十六首

有序

按朱彝尊鴛鴦湖櫂歌備述全郡之土風楊維禎西湖竹枝歌則就湖中比興各從其題也茲亦就城西言之不及他勝蹟鳴絲跕躑無當絃歌若以覽俗之取舍審音之勁柔亦畧可見已

春光多在第三橋第一橋邊放畫橈芳草自青齊女墓却輸顏色與

裙腰吳越春秋吳太子娶齊女思齊而病將死曰必葬我虞山以望齊國閭閻傷之如其言葬虞山之顛三橋一殷橋二程嫁橋三

拂水橋

山塘曲似九迴腸綠女紅男集看場誰識箇儂心事苦一生不買剪

鬆鐺自西關至湖橋十里為山塘剪鬆鐺以糖為之形似角黍

福慶橋西拂柳行春衫雅澹獨分明西湖水色猶嫌綠最好當頭月

始生

拂水橋一名福慶橋西湖即尚湖對昆城湖而言

八寶車緣石磴回隔層紕縵任人猜風飄紅袖香猶溼知看巖頭拂

水來

報國院前澗水從石橋下值東南風則倒卷如雨巖以是得名

巖墓松杉半作新高眠春草石麒麟不知却與雙翁仲閱盡朱顏綠

鬢人

明嚴文靖公訥祖墓在錦峯下

寒食東風祭掃餘中山山路並香輿誰翻新樣蘇州髻草草梳妝愧

不如

出秋報門循山足行為中山路皆冢墓所在

靚面偏逢熟客多嚴公祠畔怕經過障人虧得西施袖小立如茵軟

綠莎

西施舞袖石在嚴文靖公祠後

天女亭亭手散花維摩方丈簇紅霞小姑誤認觀音像歲歲燒香當

落伽

維摩寺在虞山之巔舊墟維摩居天女像莊嚴妙好吳下所僅見也

松下茶寮柳下壚分明一幅上河圖西城更有重樓閣小亭將軍畫

尚麓

西城樓閣虞山勝景之一

崔隱菴西竹石斑衣香不斷翠微間桃花影裏柔桑綠正是吳蠶欲

上山

崔隱菴在錦峯東麓明時建方言蠶作繭為上山

寶巖灣頭春水連落星港口缺瓜船邨姬插得滿頭柳閒趁清明穀

雨前

寶巖寺梁天監初建今廢落星港舊傳有星墜地為石俱在拂水樓西土俗清明節以楊柳插巖

華表于墳崔尚停豐碑王墓已飄零青山解護賢侯骨寂寞誰修雅

集亭

于宗堯遼東人康熙間為常熟令多惠政卒於官土民留葬山麓前明令王鐵築城禦倭死難葬拂水巖下陳瓚美其墓雅集

亭在致道觀北明宏治間邑令計宗道與蔣欽桑悅楊循吉沈周輩觴咏處

邨邨社鼓競喧闐羽蓋珠旗照水鮮一箇浜兜一彎綠燒香浜獨礙

游船

李翊俗侍綠絕潢斷港謂之浜浜兜則又方言也燒香浜在拂水橋西北

大湖田接小湖莊南北划船逐李王四月二羸三月廿年來競渡罷

端陽

李王名祿長興人宋濟郎潘壬之變示夢理宗湖州之民得全道士鄧道樞建廟於致道觀西廡鄉人歲以三月二十日迎賽

後又於四月二日賽諸
土神益增華競勝矣

春暉池館已沈湮水石還招繫纜頻莫問耦耕堂上事柳花吹殺不

重春

春暉園瞿忠烈公別墅在程稼橋西今曹節婦祠其故址也耦耕堂在拂水巖下

馬公書院醉歸遲新月彎環挂柳枝唱出湖田新樂府故鄉風景太

平時

學道書院康熙間參政馬逸安建今則為習家池矣湖田樂府吳集名

題耕虞詩卷

手君詩卷到黃昏春老江南獨閉門

集中落梅句

好句似聽吹玉笛落梅

風裏最銷魂

喜雨詩同竹橋丈作

開門正見雨如絲太史傳來喜雨詩一夜小樓春夢破關心不在否

花枝

外河水長裏河渾水柵新看漲碧痕兩岸鴨羣分浴起小舟撐綠進

城門

古意

君約歸期五載前
丁寧江水送歸船
登樓望盡征帆影
花落橫塘又一年

桃源圖

洞中只許春風住
吹出仙源一釣查
如此水清魚不見
滿溪多是碧桃花

舟行襍詩

半日不聞柔艣聲
舟人高卧看山橫
帆行南北風皆便
天亦周旋似世情

蘋花風緊艣聲遲
正是鱸魚上市時
小閣有人簾半捲
畫眉橋畔月如眉

寶帶橋頭秋水平
鱸香亭下晚風輕
片帆一霎九十里
鶯脰湖中看月明

蘇小小墳

段家橋外易斜曛
芳草淒迷綠似裙
弔罷岳王來弔汝
勝他多少達官墳

南北高峯雙翠顰
畫眉想殺冢中人
飛來一對花蝴蝶
猶認湘裙似後身

山塘雜詩

花市桃梅十月開
朱朱白白映妝臺
西風落葉聲如雨
不到美人心上來

十三女兒學畫蛾
姍姍仙骨壓輕羅
不惜金錢買絃索
儂家生計在新歌

西城

青山恰喜近城頭看盡人家屋裏樓
小立桃花紅缺處有人剛好上
簾鉤

松陵道中

楓冷吳江落照紅
李鷹曾此詠秋風
鱸香亭子依然在不入春明客
夢中

江陰陶秀才乞題補梅圖

不放孤山月色孤
手携鴉觜作花奴
勞君三十三峯裏一箇峰頭補
一銖

三十三峯峯似雲
一峯一樹雪紛紛
不知今夜澄江月何處峯頭好
著君

貧女

綫帖鍼箱鎮日依為他人製嫁時衣苦心繡出鴛鴦譜又怪鴛鴦不並飛

憚壽平秋海棠菊花小幅

同是秋花得氣遲冷香未許蜨蜂知天生一種蕭疎致多在哀蟬落葉時

春夜同道華

湘竹簾鋪淺浪紋銀鈎挂起水沈熏斷腸春色消魂語梅放三分月二分

大婢添香小婢歌水如天上月如波忍將一刻千金夜付與華胥夢裏過

小東風起玉鈎敲却下重簾護燕巢私語碧紗窗底月為儂移上杏花梢

九月晦日壬子余婦夜夢阿安曳其右袂醒而誕一女疎眉秀目宛然兒也計兒亡日亦以壬子咸謂兒再來矣夫死生夢幻之境儒者不道然折其方長則勾萌復達一氣之所化理或宜然夫子不云乎未知生焉知死謂是其再來與吾爲乎知之謂非其再來與吾爲乎知之

錦綳初脫聽啼聲嘖嘖爭看紫玉成留得前生眉目在愁他女子又聰明

新樹枝原舊樹枝妄言姑以妄聽之料應誤記金環在不作男兒作女兒

筠樵索余詩稿檢得少作一卷贈之

海內論詩幾輩同知音解惜纍餘桐西風驢背衝寒去吟向蕭蕭落

葉中

寒夜詞

龍鬚八尺錦紋鋪
活火櫻桃煖得無
妾有心中香一縷
願郎常似博山爐

海燕銀魚作錦窠
海濱滋味莫如佗
作羹與卿供朝膳
願得雙栖一燕窩

美人障子

霧鬢風鬟秀絕羣
碧天如水翦羅裙
從中看破離騷旨
只是湘江幾片雲

贈洞庭山友人

四月純香九月柑
洞庭風味甲江南
從中結箇烟波宅
分與萊妻霸子甘

洞房絃索響瓏玲
常有蛟龍出浪聽
爭道美人眉黛活
飛來七十二

峯青

消夏雜詩

竹牀冰簟恣安眠一雨涼生九夏天侵曉奚童報奇事門前新到賣書船

敲門一卷送烏絲便滴荷花露寫詩書罷任人評泊去先生只當自臨池

內人抄索笑集成戲書其後

疎影橫斜月上時蘭薰露盥寫烏絲怪君齒頰生香氣不讀梅花以外詩

題楊晉梅花卷子

耕烟入室推楊晉山水之餘及寫生帶得荆關飛動勢一枝一幹也縱橫

不多幾筆看疑麤中有詩情楮墨餘讀到橫斜水清淺始知花影只宜疎

題扇

月光到地白於雪花氣上天香作雲如此乾坤如此夜不知何處著塵氛

畫蘭

離騷一種舊根苗湘水湘雲綠共搖認取春風雙影子不聞花氣也魂消

小遊仙

彩雲飛過石無痕亂積桃花礙洞門不道玉妃幽閉久聽人小謫也消魂

金闕西廂鎖玉扉自將秀色療朝饑冲霄那用真仙骨舐著劉安藥

便飛

黃書捧出紫宸班
軋軋龍車下九關
却喜瑤宮諸女伴
更無一箇到人間

生長蓬山脚下居
何曾禁錄事清虛
閒來自喫桃花飽
冷笑先生讀道書

脫籍天魔入道遲
一篇真誥讀支離
偶來偷看人間字
開卷之無便詫奇

海上神山數點塵
飛仙驚避入青旻
三千配合童男女
從此瀛洲盡俗人

乙卯中春四日有女子扣門來年二十許
荆釵練裙光艷四照
自言南海拜佛回
隨佛光所指至此見君家雙樹五色雲作瓔珞狀
當有見女人身而吐妙蓮花舌者因令遍相家人指內子

曰是也前身為富樓那與二比丘說法簷蔔林聞蘭花香有觸
而得今相佛法無語言文字今以綺語刻畫萬象如天際飛霞
水中凝雪多此一念恐他生轉入仙人劫中不復歸嵐毗尼也
隨一女奴携紫竹二為人推休咎殊驗臨行留一偈曰紫竹生
竹林踏破鐵屨尋虛心即是佛是佛本無心其聲類魏塘東柳
間雖言語詭誕要亦奇矣

巾帔飄揚出水蓮市頭遊戲號神仙翠眉白咽桃花頰韓愈詩中謝
自然

戲語拈花見在身不妨香茗鬪清新他生小墮龍華劫尚是雙成一
輩人

春日雜詩

小屏門角畫闌東淡淡梨花淺夢中欲說生平無限事一簾飛絮又

東風

莫愁湖權歌

瓜皮小艇木蘭橈年年趕熱淮清橋
今番繫纜石城口纔覺青山似
六朝

玳瑁梁高起畫樓樓窗齊挂珊瑚鈎
登樓細數南朝事不及盧家有
莫愁

前朝有箇武寧王子孫世世管漁莊
昨日販鮮到城郭含愁怕過大
功坊

阿閣三層丹碧新中山遺像莫愁真
門前一片烟波水半屬英雄半
美人

寄壽隨園先生

先生八十索新詩舉筆多愁是舊詞
我有未經人道語展禽曾點是

公師

不持齋戒不逃禪老去風情似少年
埽盡佛經千萬字單存兩字是因緣

八十翁携十八兒恰將生日卜婚期
掃眉才子為新婦不作羹湯作壽詩

白髮齊眉老葛洪聰明福慧滿堂中
殘牙喫罷孫湯餅再喫瓊林餅餡紅

後遊仙示凌客百堂子山

飛渡銀河萬頃秋一層波涌一層樓
玉梯走到三千級還有微雲在上頭

吹氣如蘭雪作膚桃花撒手盡紅珠
劉郎早是魂消甚那暇丹臺聘鮑姑

靈璫法曲太紛紛震蕩仙人駕鶴雲下有秦簫雙管裂諸天應是不
曾聞

觀劇二首

故鄉新月菊花期莫負清歌歡酒卮八尺紅氍雙畫燭登場須有下
場時

妙舞如雲態不同衣冠偏逞滑稽雄聲音莫笑當場假正恐當場尚
未工

將返琴川留題陽羨署壁

鷺州小住又經旬繞郭烟波二月春我欲明朝挂帆去銅官山色解
留人

繞隄楊柳萬絲垂臨去東風一笛吹空載滿船詩思返不曾携得國
山碑

更有張公小洞天
隔湖空翠望如烟
山靈應笑先生嬾
只借官齋兩月眠

友人召觀女樂

三千楊柳蕩春風
十萬桃花壓水紅
我是秦樓舊簫史
人間箏笛洗都空

石屋觀楓絕句

開到黃花花事終
送秋連日雨兼風
濃霜却似還丹藥
駐得衰顏老更紅

却憶洞庭秋草黃
楚天雲樹極蒼蒼
漢皋木落人何處
腥血殷紅繡戰場

此間神女散天葩
不是尋常二月花
身坐白雲中倒聽
萬山秋響赤城霞

燕亭客任城時愛歌兒佛喜及來江南劉君六橋寫其妹四喜
小影寄贈時佛喜已嫁僖父燕亭作生祭文弔之屬余題後

輦婆一曲暗消魂司馬青衫溼淚痕可惜虎頭工點筆却遺桃葉寫
桃根

天涯倫落見何時生祭文成兩鬢絲恰似悼亡唐後主為伊尋葉又
牽枝

歲暮陽羨雜詩

銅官山色最相思放櫂重來歲晏時阮藉未歸韓偓去辦香獨拜大

蘇祠

時阮師奉調赴省韓旭亭都講已歸吳門大蘇祠在蜀山書院東偏

消息驚傳自隔江人間竟失魯靈光天教海內龍門閉纔死弇山又

小倉

燕亭自維陽來知隨園先生於十一月十七日已歸道山弇山謂秋帆尚書

護花新句達郵籤不避延年郡將嚴今日萬人同一哭獨應胡廣為

掀髯

時方傳誦隨朝毘陵太守妓禁詩有罵賊當年毛惜惜絕勝胡廣號中庸之句

罨畫溪流冷不香祇餘顏禿幾垂楊桃花從此依崔護無復天台賺

阮郎

小史慶兒役楊羨署中年今夏為吳江崔少府却去

欸到禪扉夕照遲松間啜茗更看詩阿難年少工微笑便作拈花大

導師

西菴僧貫一年十九主席已四載壁間有韓旭亭贈詩

茅籬土舍幾家同幾箇雞皮鶴髮翁單為美人名字好賺人間踏夕

陽紅

美人菴在東倉西側

小紅一樹不知名老少爰絲尚有情我是街西狂小杜看花雙眼最

分明

曲中某曾為隨園所賞寄阮師札云只此一枝可當老夫霧中之看

章江舊令最風標詞客張姜話共邀捉得謝元香玉麝費他官燭兩

三條

與胥燕亭姜勗齋張椒卿夜話燕亭舊官西江

雙鳧去日萬民傳父老排門肅餞筵祇覺此間風俗好教人忘是長

官賢

時阮師調任武進臨行
焚香設酒者按席於道

布帆臨別且遲開未必重遊第七回照影東西雙沆水髯蘇來後我

曾來

自乙卯至今遊踪六度矣
此番未卜重來書此誌感

觀荷

萬傾紅香帶笑開風裳水佩恣低徊只餘一角清波活留與傾城照

影來

蜻蜓蝴蝶兩飛忙撲葉穿花翅盡香一對閒却小兒女貪撿蓮子水

中央

春陰

斷雲殘漏幾絲明又聽蕭蕭灑葉聲却笑天公心太活竟無一刻是

真晴

晚晴門巷掩輕羅小立閒庭看鳥過貪受飛花滿身上不知殘雨溼

衣多

遊仙雜詩

敕下瑤臺埽落英
仙王羽帳綴珠璫
扶桑一樹紅霞滿
照見滄溟徹底清

五嶽圖真百寶裝
阿環手捧入瑤房
丹符玉篆都收起
親繡明霞五色囊

素書一卷太縱橫
不著何人撰姓名
玉女傳抄龍鳳篆
比他真誥轉分明

昨夜羣真解佩遊
就中萼綠最風流
無端失脚金條脫
却被湘妃笑不休

蘭香厭奉玉宸班
偷駕雲輶出九關
手把芙蓉下人世
不逢張碩竟空還

姑射慙慙瘦雪肌趙雲手進肉靈芝神仙不是凡間疾浪覓吳宮獺
髓醫

辦香詞

秦州箏柱越州絃齊唱新聲阿子筵獨把幽蘭悄無語心香一辦為
青蓮

自題畫梅絕句

拈毫隨意綴珠胎隨手圈成爛漫開開到山坳雲缺處水邊橫過一
枝來

梅花取直不取曲此理世人多未推詩人獨得花情性不畫庭梅畫
野梅

老幹縱橫直不彎點苔參用米家山儵然獨立真超絕雪月紛紛盡
可刪

戴笠圖

到處蕭然一笠輕相逢何必下車盟東坡著屐猶多事未免拖泥帶水行

詩人自號石梁子手執道書冰雪顏前身或是天台鶴來往桃花瀑布間

除夕祭詩

閒門如水上燈時祭了家祠祭我詩畢竟古人誰配享莫從人間只心知

玉壺已罄更難賒再拜惟將手八叉自笑清貧無物薦一盂涼雪一梅花

葬花圖蘭皋屬題

就使飄茵亦可憐不如埋玉付重泉清明過後無人掃蝴蝶漫山當

紙錢

徵幸芳魂得所棲一坏小築夕陽西花中亦有楊妃慘狼籍東風襯馬蹄

未乾香土已黃昏滅盡嫣紅姹紫痕賸得護花襦一扇風前猶是普招魂

了無片石誌孤墳翦葉為箋製誄文濃綠有知應自感他時誰與葬秋雲

下第後戲贈霍郎小玉

尹邢終究孰娉婷評點妍媸帶淚聽同受人間顛倒殺下場舉子上場伶

過雲清響繞空梁燕雀無聲坐滿堂唱殺碧雲天一曲北人都不愛西廂

雙髻顏雲兩眼星長亭哀怨唱旗亭明朝我亦登車去如此淒聲不忍聽

舟中書所見

缺瓜船小可容身供子荷花供美人烟水四圍風一面白鷗來往作鄉鄰

乍驚鴻影出橫塘花拂晶簾暮雨涼偷照龍宮明鏡子海雲齊學妙鬢妝

陸甫元中翰

沅

杏花書屋圖

水天如墨漏春痕翠淺紅深裏一邨中有詩人香夢穩賣花聲過不開門

金閨亭畔雨絲絲四百紅橋艣一枝都被畫工收拾去邵菴詞意放翁詩

畫梅

新年無客到山家
雨灑幽窗鼎沸茶
最是稱心清絕事
對梅花恰畫梅花

觸手春生爛熳開
勝如仙夢寄瑤臺
此生天與因緣在
除却梅花畫不來

元章妙手不肯傳
無人解畫羅浮仙
偶然興到一點筆
花壽又增三百年

華秋查司馬

瑞漢

北山旅館圖

段家橋口水彎環
十笏雲龕鶴守關
幸是無田歸未得
一生占住好湖山

菊徑荒蕪冷夕曛
西神山影遠招君
閒心一片誰留住
笑指北高峯上雲

簪花圖

摘來香帶露華新
安上雲鬟更絕塵
高下入時心自覺
莫將宜稱問旁人

雙鬟綽約助花嬌
小立風前勝步搖
若使手持明鏡照
自窺清影亦魂消

法時帆祭酒席上展閱瀛洲亭圖輒題其後

一帆飛渡到蓬萊
從此仙凡始脫胎
百六十年科目在
幾人不負此中來

自題畫梅

耐盡霜欺又雪摧
不曾借力煖風開
誰從玉性瑤情裏
寫出稜稜鐵骨來

聽鸛圖

綠陰選得最高枝偷眼看人側耳時寫出聽翁真意趣詩人聽鳥鳥聽詩

姹語閒關百轉清隔重花葉倍分明人間多少箏琶耳別有池塘鼓吹聲

雜憶寄內

賣冰聲迴小胡同隔院燕脂返照紅我是五湖鷗鷺長自溫清夢水雲中

鄉書遙憶路漫漫幽悶聊憑鵲語寬今夜合歡花底月小庭兒女話長安

隔牆笑語送燕姬却憶妝臺坐對時手爇鷓香吟字母齒音清脆帶京師

如星黃月暗房櫳怕上銀燈一點紅小朵鬢華香沁骨謝孌頭上過

來風

年時相約拜雙星
小扇輕衫倚畫屏
嬌女唐詩新上口
夜涼先背阿嬾聽

料應錦字付瑤梭
摺向雕窗一月多
半角雲灣雲抹斷
夜明簾底注橫波

秦家風調竇家情
苦為離鄉太瘦生
閒坐玉堂歸不得
悔教風引到蓬瀛

寓齋即事

小庭疊石仿烟嵐
人海幽深古佛龕
一雨苔花青亂灑
年來風氣似江南

溼天涼影弄晴霞
畫出清秋景物嘉
刪却半庭書帶草
小紅新茁數叢花

觀小女若霞畫梅

冥冥紅雪月黃昏為護狂香早閉門
開到十分全盛處女兒簾底也消魂

在翰林西堂畫梅四幀暇日各系一詩

瘦枝無力卧彎環絕似疏籬野水間
記得玉堂清夢覺郭熙屏上看春山

惆悵尋春杜牧狂歸來風落一林霜
枝頭梅子都零落賸有娟娟畫裏香

陳範川同年

鴻埽

瀛洲歸娶圖

築玉人深種玉緣玉堂歸省撒金蓮
一囊分得芸香俸便抵黃姑下聘錢

蓬山遲報海雞籌八尺香衾擁麝篝
賦慣早朝心事在合歡牀上夢

瀛洲

照映湖山蜀襜袍兩高峯對鏡臺高修完青史修眉史忙殺郎君五色毫

留別

萬疊離情酒一尊家山事事總消魂東風吹殺春帆影看過桃花始出門

十索歌成賦十離繁欽相對淚如絲玉屏東首晶簾外橫過梨花雨十枝

戲題梅花卷

仙人撒手洒珠塵添得青天月有神絕似謝娘妝閣外雪中斜出一枝春

古梅花下作

老樹著花花斌媚繁
花映樹樹玲瓏漫天
蓋地春消息只在橫
波一轉中

送兒輩就試玉山即之郡

無端趁得秀才舟
乘興來為訪戴遊看
罷玉山秋一點滿天
風雨下蘇州

一櫂寒烟破白蘋
此行端不為鱸蓴閒
雲笑我匆匆甚訪了
秋山訪美人

早春梅花下

春寒勒住玉參差
小粒明珠挂滿枝
越是折磨心越愛
恰如好事未圓時

一日巡簷十二回
月明孤影尚徘徊
靜中領中春消息
好在將開却未開

盛青嶼遺照

青嶼名錦少以白雁詩著名沈文慤詩友也

鮑溪鷗侶共周

迂朱木

壇坵風流信不虛重問月泉吟社事江南誰

是沈尚書

襟被尋詩蜀道行苦將標格鬪新城寒花衰草靈巖麓愁絕秋風白

雁聲

席上題張憶孃簪花圖

國初諸老題詩日猶見英雲未嫁身消得幾番花下醉眼前都是卷中人

杏苑春風得意遊何如紅粉此風流人間儘有聰明客盼得簪花白

了頭

餞春和韻

一蜨無聊繞畫廊綠陰新換好風光若非幾陣催花雨那得江南土

盡香

閒情纔割又牽情愁殺蝦蟆轉六更挑盡銅槃紅蠟淚推簾癡聽落花聲

蘇有山學博榛屬題陽羨探梅圖

官閣寒香戶畫局春風宜築小蘇亭新增一卷斜川集喚醒梅花讀與聽

觀釣者

檣頭艇子傍漁磯滴翠山光欲上衣昨夜江南春雨足桃花瘦了鰕魚肥

青蓮花

倒影清波不染身疑花疑葉認難真優曇悟後芳心冷不肯紅妝笑向人

水仙辦蕙蘭為改七香賦

離離玉魴樹瀟湘持較春蘭一氣香總是二妃魂魄化天風吹下水
仙妝

水佩風裳結束新碧紗烏几淨纖塵小窗相對渾無事寫罷離騷寫
洛神

遇擔花者

滿路寒香散不收拋錢誰買此風流一肩秋雨擔回去還供妻孥插
滿頭

清琴軒即事

亂落梅花綽注吟半空鸞鳳下清音夜深彈到爐灰冷消盡人間未
死心

飛興清天酒一觥滿空寒韻雪輸清十三徽上花能語倒喝明蟾不

放行

自題畫梅

不多幾筆自風神得意何須刻寫真只是嫩寒初月夜亭亭著個淡妝人

題李生畫

青林靄靄白雲流詩境空明淡不收却被小霞偷寫出化工新造一痕秋

蔣雲泉刺史

嘉瑞

抱騎省之威作僧服小影寄意

悟澈風翻柿葉斜六時清課首楞伽無端淚眼袈裟溼只道渾身是落花

漫空香雨降龍池身是拈花大導師放下拂塵藤笠子法雲枯樹又新枝

百八年尼賢手拈蒲團坐破戒香嚴竹刀重剖如何果佳蜜方知未
是甜

北山山遊絕句

罪畫芳塍幾稜斜居鄰北郭似邨家紅壤橋轉西施渡一箇柴門一
樹花

徑入松陰縱復橫撲衣空翠溼雲生籃輿省識詩人意只揀桃花礙
處行

野花無數發前邨蝴蝶偏飛近墓門宿雨昨晴芳草溼春泥已有繡
鞋痕

聽雨詞

風簾瑟瑟蕩銀鈎簷溜琤琮響瓦溝一夜春風寄何處謝娘樓角杏
梢頭

賣花聲度隔溪遙樓上春眠燭未消掛起西窗看湖水白鷗飛過赤欄橋

陰雨積旬春光去矣

潑灑花能幾日紅任教開落醉眠中無情嬾得衝泥去却怨西園一夜風

只消幾度醉逡巡艸艸心情看過春肯受滿身疎雨綠空庭一蜨一詩人

暗風吹雨過西窗自檢春衣護晚涼衣上百花香氣在忍寒依舊疊空牀

自知顚顚是清狂收拾春情檢藥方為愛綠陰牀上座見伊枝葉又思量

味霞寒林踏月圖

四天如水一珠寒獨立溪橋仰面看銀世界中同醉夢更無人倚玉
闌干

雨中自鄧尉至潭山下看梅

入山無處不花枝遠近高低路不知貪受下風香氣息離花三尺立
多時

歷遍山隈又水隈亂穿珠樹上瑤臺平生不作低眉態却為南枝俯
首來

清琴軒觀二女士作畫彈琴

姑射冰肌瘦有神瀟湘玉骨淨無塵替花寫照花應媿還是聰明自
寫真

飛瓊飛下影娟娟豆蔻梢頭月正妍一曲春風彈未了梅花如雪滿
琴絃

携琴訪琴圖為李小霞題

遙指葑溪水一條紫瓊携上木蘭橈杏花風裏春如畫尋遍紅闌四百橋

琴心只有落霞知執贄來參大導師立盡玉堦雙屐雨梨雲香夢未醒時

青綾障裏韻淒清只隔衣香不隔聲猶勝成連滄海上拍天驚浪一船橫

錄近作梅花詩數章寄蔣伯生濟南

海內齊盟久寂寥蔣侯雄辯最超超酒酣席上拋髯起不話漁洋話子瀟

十行短札墨欹斜書與新詩足自誇吾別江南了無恨聲聲只是負梅花

葉蒼芳夫人撫王若水墨筆芙蓉令嗣子謙補鴛鴦

活色生香觸手新寒塘秋影兩傳神若教福慧兼修到又是南樓一老人

吾鄉能事數扶義妙筆惟傳女畫師何似清於多逸格甌香家法授

諸兒

夫人為海簾後人子謙實得外家法乳

調胡翁

饒君妙筆會傳神顰笑終輸鏡裏真却有勝於明鏡處秋霜不點畫

中人

尋常行路貌紛紛辛苦徒誇翰墨勲畢竟佳人猶易得好拋心力畫

朝雲

方墨林秀才

維翰

讀書鍾山歲暮將歸其友端木

焯

為作風

雪歸舟圖此癸酉年事也今墨林又將赴白門以冊乞題而

予俟諸生行後亦作歸計故有第三首

衰柳千絲酒一杯
秣陵江上片帆開
此行不是風兼雪
那得扁舟入畫來

潮打船頭不可聽
歸心和雁下空冥
蔣侯山色多情甚
猶向行人艣後青

青溪重拜小姑祠
鴻爪參差認舊時
我亦秋風挂帆去
桃花潭水獨吟詩

屈子謙菊影墨戲

寒香零亂月黃昏
澹到無言賸有痕
還恐便隨烟化去
急研殘淚與招魂

墨痕花態兩朦朧
活脫渾忘畫手工
只當一枝秋影瘦
被燈移上素屏風

兜率天宮事有無流傳遺墨淚糝糊天生一管淒涼筆自寫秋風絕命圖

殘歲雜書

扣門百事集如麻手折松枝自煮茶笑語諸連忙底事且來看我畫梅花

冒雪獨行至古梅下

北風穿隙射眸酸雪房後櫳徹骨寒為惜玉梅遭凍折披衣先揭畫簾看

茫茫瑤海萬人家玉地冰天靜不譁獨立空山風雪裏一詩人與一梅花

拂了瑤花坐翠苔玉蚪枝下儘徘徊滿身擔受風兼雪值得衝寒一度來

供硯圖

宋詩人王元婦黃孃亦有才思元中夜得句黃輒起然燭供
硯以俟好事者繪圖美之陳小雲秀才與其配汪小韞夫人
琴彈瑟應較之王黃奚啻倍蓰歸佩珊女士為作供硯圖屬
予夫婦為之題詠

窈窕窗深月浸紗起來雙笑對梅花憐他繡被鴛鴦夢孤負詩情十
萬家

推枕重吹寶炬然一牀恰有兩詩仙端溪璧友辛勤甚也廢瑠璃匣
底眠

蘆簾雙管鬪生春衙溼香寒露似塵僥倖翠奩鸚鵡眼終宵長對比
肩人

我有譚言欲語君筆花誰似左家芬花前好捧紅絲硯泥把簪花教

右軍

金鈴風瘦玉繩低
吹落吟聲小閣西
驚起翠禽香夢穩
梅花枝上一雙啼

東山觀社時桃花未落杜鵑牡丹盛開識以絕句

如此谿山稱我詩
名花況值爛開時
人間何地無芳艸
不是親來却不知

胭脂染出玉玲瓏
雲樣衣裳致不同
可惜一枝紅艷好
年年開煞亂山中

偶觀放風箏

只道扶搖萬里搏
依然未極五雲端
莫嫌風力吹噓少
到得高空欲下難

欹側翩反手自知
東風太緊莫收遲
旁人只勸凌霄去
那管身輕欲

墮時

題花卉冊子

澹黃深紫夕陽開瘦石玲瓏半蘚苔
解得秋光比春艷草蟲如雨自飛來

小徑烟荒露未晞寒香冷艷總芳菲
笑他雙蝶無聊甚各揀花叢愛處飛

蕉窗聽雨圖呂生

偉山乞題

風蕩湘簾水樣搖綠天深處聽瀟瀟
燈花為結雙紅豆守盡殘更不忍挑

滴盡殘窗碎雨聲破人秋夢到天明
不知一夜詩情好轉在瀟瀟葉上生

畫梅戲題

亞檐梅葉碍果愚濃綠陰中寫折枝恰似美人生子後對伊重話女兒時

題畫

喚得輕舸似缺瓜半容人坐半容花白鷗天外瀾瀾綠數點春愁是落霞

春水如雲欲上天任流閒夢到鷗邊東風吹過谿橋去逢著桃花也住船

祭舊詩

歲晏山空人事閒寂平生交游零落殆盡扣戶者寒風入座者涼月耳感懷知己泫然流涕折庭携一枝佐以卮酒為位而祀之人系一詩亦絃神之意云

騎箕歸奉玉宸宮海內憐才失此公仰首看雲低首淚一星如月挂

寒空

太傅朱文正師

二十三房繞翠螺萬花叢擁一喬柯詩仙老去青山冷贏得秋聲撼

樹多

袁簡齋太史

一采陔蘭四十春魯靈光殿亦飛塵白雲谿水寒如鏡只照蘆花不

照人

趙甌北觀察

東閣投簪病目昏俄傳星斗落瑤闌羊曇一掬西州淚不抵瀟湘竹

上痕

劉雲房相國師

松阿草閣閉秋苔謾謾濤聲助古哀留得一房寒翠在月明仙鶴儻

歸來

邵松阿上舍

風捲靈旗海氣涼東南鐵網更誰張潮生潮落春申浦那敵孤寒淚

點長

李味莊觀察

輭紅如繡鼓樓街深鎖詩龕玉樹埋積水自流花自放一尊誰薦李

西涯

法時帆祭酒

手采珊瑚入網來，吾鄉壇坫自公開。
桐花落盡中郎死，多少人間爨

後材。

吳竹橋儀曹

卅年詩夢繞西堂，幾夕簾櫳喜對牀。
吳苑風花燕市酒，一聲仙笛易

斜陽。

家伯淵糧儲

生戴頭顱入玉關，更生齋裏慶生還。
閒雲未了為霖意，忍棄塵寰訪

海山。

洪穉存編修

幾回絲竹後堂聽，螺女江寒墜使星。
天外數峯青不了，月明何處弔

湘靈。

錢雲巖學士師

畫谿官閣嶂為屏，山眼那如阮眼青。
一夜荔枝花似雪，玉笙吹冷小

蘭亭。

阮昉巖大令師

橫湓花落水潺潺，老屋無人鶴守關。
一卷韓歐新火在，忍看零落似

馮山

馮仲康孝廉

相約歸田著述同橫戈防海太匆匆一生風月千秋事都付春明短

夢中

張子和備兵

當年詩老詠三君愧與舒王鼎足分惆悵病花殘葉裏一筇孤影立

斜曛

舒鐵雲孝廉

奇氣漫漫溢九州驚人才筆被天收紅裙包裹牀頭藁擲向東瀛定

不流

王仲瞿孝廉

鷗夢鴻泥記夜分消寒高會共論文先零最是陳驚坐墓柏蕭蕭已

拂雲

陳筠樵明經

梅骨同清訂歲寒月肥雲瘦共憑欄對花便憶當時景每到花開不

忍看

席子侃孝廉

託跡牛醫混俗塵流珠祕笈澡心神腥風滿市魚鹽裏一箇蘭薰雪

潔人 陳石泉上舍

青衫落魄未知名
白眼相遭薄俗輕
縹緲飛樓人不見
一枝玉尺最分明

友人以悼亡殤子照合卷乞題

珠字瑤琴錦字機
彩雲易散玉蟾飛
留將霧鬢風鬟影
誤被人間喚宓妃

么弦彈斷楚騷哀
珠樹文鴛信不迴
胡蝶有情偏認得
卷中飛上畫裙來

玉釵敲折鏡奩空
柿葉翩翩翻唱惱
公悔殺桃花偏結子
斷紅零粉太匆匆

珍重前圖接後圖
生綃一片淚模糊
南華作達西河痛
兩種深情畫得無

雨酌

修竹雙行雨一襟玉壺香煖且頻斟桃花彈滿清明淚蝴蝶不來春
又深

題笠畊觀察

斌良

小字蘭亭序帖

山陰繭紙入照陵響榻爭誇趙葛能妙手別摹唐粉蠟風流遙證越
州僧

褚肥歐瘦訟紛然別寫湍流帶石天移取山頭歸領上却愁豪奪米
家船

一硯楊花轉漕風吳興待闌寄情同分明虎卧龍跳勢收入蠅頭細
字中

藏如處子拙如椎退筆風神邈可追應笑貂皮王子廓苦求殘本證

金龜

波磔親鈎碧玉刊螳螂蟹爪取神難千金不換梨花雪度與人間換
骨丹

玉枕摩挲付辨才蘭亭生面拓園開香泉太守天瓶老齊捧珠槃笑
入來

晴窗風日細臨摹少箇河中馬軾圖韻事好循松雪例仙壇石上配
麻姑

仰字懸鉞列字丁飛騰虹彩掩群星吾家莘老如親見別構珠湖墨
妙亭

觀荷華歸寄家人

風裳水佩罩鴛鴦此處烟波別有鄉可惜不偕徐淑至綠盤紅露賦
瀟湘

年年買夏就烟蘿如鏡雙湖照畫蛾每到藕花生日日一雙清影並

鷗波

一篙瓜蔓水澄清
便擬歸帆片葉輕
三十六陂秋色裏
月華如水聽簫聲

言依山參軍

尚熾

才人鑑傳奇

不將花月譜西廂
埽卻溫柔說醉鄉
如此盧生真絕倒
並無骨相夢黃梁

描摹醉語近天真
付與詞場菊部新
罵坐灌夫誠快事
人間難得眇山人

千金難釋一杯嫌
園土春風十載淹
彈徹銅琶豪氣吐
酒龍詩虎盡掀髯

唾棄烏紗世局翻
排場新色動梨園
陋他李白登科記
未洗胸中一狀元

仇實父畫陶淵明歸去來圖

輕舠一葉載雲還
人在仙源杳靄間
應笑龍眠猶色相
西園塗綠上春山

一官花影過無痕
夢罷羲皇倒綠樽
松頂閒雲如我嬾
春風吹不出柴門

春風

飛來雙蝶賭身清
戲逐游絲上下行
小雨乍收風又緊
桃花無分過清明

雨中作

憑闌日日望花開
等得花開奈雨來
蝴蝶不知雙翅重
雨中飛去又飛回

寫梅

凌霜傲雲一枝斜，只在山坳與水涯。
說與時人渾不解，滿城車馬看梅花。

秋海棠

紅珠滴滴綻瑤英，回首相思渺玉京。
小雨偶彈秋夢醒，又含清淚憶前身。

黯黯秋魂欲化烟，哀螢落葉共淒然。
脂膩不是傷心色，畫到輕紅便可憐。

題黃韻山山水冊子

韻山一峯十六世孫

掉頭歸卧釣魚臺，載得峨眉片月回。
手寫芙蓉三萬朵，一峯飛去一峯來。

觀楓小雲栖得四絕句屬改七香就詩意補圖

幾日新霜下杳冥，眼前風物已凋零。
青山厭聽人間事，自入秋來醉

不醒

空翠沈沈石徑修
白雲橫斷古林幽
雲中不是仙源近
那得桃花直
到秋

春氣偏烘木落時
新妝不是鬪顰脂
難將一種殘秋恨
說與西風冷
翠知

天風如水襲衣涼
歸路詩情寄野航
越是晚山紅越艷
勸人回首有
斜陽

晚眺

一塢紅香夕照微
幽居寂寂敞柴扉
靈瓏幾筆桃花影
隨著輕雲欲
上衣

花香人影兩徘徊
隨意尋詩坐綠苔
幾縷瘦霞紅不定
晚風拖過樹
梢來

鍾映淵得姬人陳淡宜作刀尺佐觴圖索題戲成三絕句

刀尺聲中玉漏長一鉤斜月照流黃
勸郎今夜東風煖更為如花盡
一觴

鍼箱綫帖伴琴書擁髻風情倦繡餘
一縷柔絲雙剪水酒龍粗氣盡
消除

不數盧家有莫愁並頭雙影照銀甌
酒闌更泥麻姑爪繡了鴛鴦繡
醉候

落花感賦

香魂已醒夢蘧蘧隨分飄零向玉除
飛上繡茵成底事東風只道是
吹噓

題林硯莊

泰詩卷

吳下朝朝夢故鄉還鄉又苦憶金閨
西風落葉東風絮兩種離愁一

樣忙

貧却身家富却才天公為爾費安排
破窗風雨驚人句不是黃金鑄得來

太真沈醉圖

花夢沈沈紫霧冥東風扶起尚忪惺
海棠嬌態濃于酒連著君王醉不醒

許鐵山先生聽鶯圖遺照

鐵山名惟枚海鹽人以孝廉出宰上元
與袁隨園同時著有上元集行世

白門春色柳千絲畫裏仙郎瀟灑姿
想見俗淳公事少手籠艸詩散衙時

嬌喉宛轉滑銀簧醉耳聽歌砭俗腸
不信當年春兩岸南河風暖北

河霜

嘗與隨園小集秦淮座有歌郎鐵山目懾之隨園調之以詩云爾

自題畫梅

受盡嚴霜朔雪欺
孤芳全不合時宜
胎中自具調羹性
說與桃花却不知

簡眉卿探梅山中

一樹珠胎結凍雲
相思何日散氤氲
扁舟昨過杏花岸
春意枝頭已十分

得意一枝兼兩枝
便無香處可尋詩
紛紛車馬看花日
是我閉門高卧時

自題洛神硯

海上三神翠渺茫
丹誠無路獻明璫
感甄心事誰人識
自啟秋窗寫幾行

芙蓉莊看紅豆花詩

吾鄉芙蓉莊紅豆樹自順治辛丑花開後至今百六十又四
年矣乾隆時樹已枯鄉人將伐為薪發根而蛇見遂不敢伐
閱數年復榮今又幢幢如蓋矣今年忽發花滿樹玉藥檀心
中挺一莖獨如丹砂莖之本轉綠即豆莢也辛烈類丁香清
露晨流香徹數里見日即合矣王生巨川邀余往觀為乞一
枝而歸葉亦可把玩玲瓏不齊王生言至秋冬時丹黃如楓
也道光四年五月記

我聞密室照花光相映瓊匳素面妝曾是美人親采擷零香賸粉耐
思量

百年彈指劫灰寒籬落金輪湧現難已較蟠桃花信近三千年可甘
回看

休問花前白髮明平泉花木已榛荆世間惟有情堅固枯盡根株又發生

露浥辛香數里傳情根發越太纒綿天風吹過華鬘市諸佛蒲團盡破禪

檀板金尊迹已陳江南樂府又翻新風前柳眼分明甚省識看花大有人

臨池戲作

一紙書成費揣摩態嫌肥瘦勢偏頗莫將敗筆添修飾修好從來壞更多

落筆縱橫以氣行短長肥瘠任人評不如意處休回顧一著遲疑室礙生

信手揮毫不假思一逢愛好便矜持病根不在矜持處原在尋常率

意時

書陳小雲司馬晚香樓憶語

悼其亡

打槳迎來絕代姝六朝山色作眉圖量珠未許論聲價只向郎君索

慧珠

姬王姓
林陵人

雙飛烏鵲獨飛迴消息驚從白下來第一人間難得事若蘭親哭趙

陽臺

小雲配汪夫
人八詩最工

一死爭知絡秀賢情花淚葉滿湘煙朝雲嫁得才人媚諫筆何曾有

老泉

卷首有尊甫
雲伯諫詞

閉却瓊樓十二層影梅菴裏夢如冰哀絃絕調千秋兩一哭雙成一

子登

錢柳東山唱和圖

故人夢逐曉雲空回首簪裾唱惱公賸有幅巾風度在比肩雙照鏡

湖中

墨雨詩雲弄曉寒
靈心玉映照欄杆
美人肌雪才人鬢
都作南朝牒粉看

我聞祕室當詩龕
硯匣晨開筆戰酣
比得鷗波雙影否
一般春恨滿江南

楞嚴注罷出簾遲
花雨聲中殺藕絲
畢竟懺除情未了
一枝紅豆又催詩

大好湖山入醉哦
樂天高唱柳枝歌
關心只有松圓老
隔著芙蓉竊聽多

擊鉢飛牋事事清
絕勝絲竹惱春情
只除一事輸安石
少却花前折屐聲

玉樹歌殘泣故宮
自研殘墨賦春風
西山薇蕨東山柳
總在滄桑淚

眼中

錢園柳墓久榛蕪
輞水猶傳唱和圖
當取謝家山一角
黛痕青似六朝無

吳江穆辛甫茂才

秉桂

遊如皋水繪圖有感於辟疆往事作訪

影梅菴圖乞題

圖係王叔圭作

老筆蒼涼繪水痕
鷗雲鴉樹易黃昏
玉笙吹月人何處
招煞梅花扇底魂

奩艷消殘鏡粉空
青蓮小夢化西風
秋棠開遍無人管
自滴空堦冷雨紅

載書訪友圖

艣枝閒趁白鷗羣
伊軋聲柔隔浦聞
一片詩情搖蕩煞
垂虹明月剡溪雲

乙酉五月寫梅自遣

絕世丰神下筆難却思眠去夢中看如何夢也都無影一夜空騎鶴
背寒

去年伯生書來屬題東山唱和圖既成八詩今伯生携圖見示
復補兩章

絳雲簾幕控珊瑚調黛風情翠滿樓不是維摩才似海如何天女肯
低頭

畫舫迎仙出五湖催妝百韻蜀箋鋪定情合子分明在不費珍珠費
慧珠

顧橫波夫人小影

上有龔芝麓兩詩前一章云腰妬楊枝髮妬雲斷魂鶯語夜
深聞秦樓應是春風誤不遣羅敷嫁使君後一章云識盡飄

零苦而今得有家燈煤知妾喜特著並頭花玩前詩則圖作
於未歸龔時後作乃既歸而續題也

白門新柳翠籠烟乍起楊枝態尚眠委地春雲梳不得懷人心事困

人天

芝麓為作白
門柳樂府

眉樓風月易黃昏一閃星眸剪水痕除却石人心似石此中消盡幾
人魂

瑠璣硯匣鏡臺安寫罷雙蛾露未乾他日小銀缸下事並頭先兆畫
中蘭

兩首新詩為定情滄桑劫後嫁雲英稻香樓外盈盈月却比秦淮一
樣明

定山堂上怯春寒鬧埽妝慵髻百盤五萬春花齊頻首看伊加上吾

花冠

入國朝龔夫人
以冠語讓之

重携桃葉溯烟汀一角鍾山眼尚青多少南朝金粉事斷魂驚語夜

深聽

順治丁酉龔當挈之重游金陵改姓徐矣

畫蘭別有女相如錦樹林凋願竟虛占盡柔鄉香艷福江南只有雨尚書

八月十四夜夢至一山題詩翠壁之上

花裏樓臺是我家逕下花下喫桃花胸前自吐如蘭氣却被風吹作絳霞

秋思

滿徑斜陽自閉門菊花開過夢無痕西風埽地亂黃葉中有零星秋蝶魂

簾捲秋河屋角橫霜華涼逼一燈明碧空如洗鶴無語草際亂蟲三兩聲

梅不著花寫以自遣

研冰和雪寫珠胎
頃刻生香滿紙開
癡絕欲從西舍問
可曾香過隔牆來

贈雲間馬生即題其煮雪圖

生工寫生

疏瀹冰魂煉玉真
松風吹熟一爐春
梨花世界梅花味
瞞過銷金帳裏人

閉門僵卧聽春濤
一棧湘雲一葉騷
四壁萬花低不語
人間還有九方皋

南田秋海棠小景

一絲清氣九迴腸
天與幽情壓眾芳
十二珠簾風蕩颺
無人不道木犀香

皖卿畫梅第二本

公然放筆便縱橫漸悟原從頓悟生
解識羅浮真夢境最模糊處最
分明

題畫

翠靄迷離雲缺處山窗飛入一樓詩
松花埽罷日無事靜閉烟蘿拜
大癡

寄題翁秀荻塘茅舍

一港秋聲戰荻花三間茅屋鎖烟霞
何如笠澤茫茫裏逢著梅花便
是家

逃暑鐵佛寺戲題

處處烏鴉噪綠槐偶尋禪窟避塵埃
無端古佛身邊卧又惹黃金色
相來

聚鐵當年鑄佛難佛心應悔耐清寒
不如湖上秦長脚消受紅男綠

女看

周菊人學博誦其姬人同心容易並頭難之句為廣其意

無情香草兩相歡只當鴛鴦枕上看我是禪家須轉語並頭容易一
心難

花能雙笑影團圓人怕香盟轉眼寒拈出文君琴上語一心修到白
頭難

李穀齋

世倬

小像鹿樵屬題

穀齋學畫學道子佳士相逢亦寫真卻笑畫師難自畫被人偷看李
公麟

憑仗拈毫手筆工須眉長活畫圖中只愁流落人間去團扇無人識
放翁

留仙仙醉圖

水精杯小泛流霞酒力難勝倦影斜贏得一樓醒醉眼仙人頰上看
桃花

消暑詞

妝臺花露尚沾濡趁箇朝涼雲髻扶生性梳妝非草草不嫌妨却睡
工夫

翠紗衫子雪玲瓏坐背風前意態慵猶恐玉肌人看見輕綃一尺抹
當胸

細喘嬌吁出浴初雲鬟依舊似新梳香融汗粉羅巾拭越顯肌膚雪
不如

荷風幾陣引新涼吹滅熒熒畫燭光恰好紗窗開半扇額邊斜月注
嬌黃

人語花香辨不清水明簾捲夜雲輕行來仙骨姍姍甚暗裏遙聞玉

釧聲

卽事

眼耳叢中分限清
敢將平視學劉楨
低頭只作枯禪生
暗看蓮花貼地生

簪花楷格似人妍
下筆明珠箇箇圓
除却答郎詩句外
不曾輕易落雲箋

淚珠和墨寫成書
詞令風華綽有餘
但使玉臺司筆札
也應喚作女相如

情絲細剪與檀奴
纖軟纔離膩玉膚
何物生香堪配取
梅花心裏數莖鬚

寄遠

畫樓烟雨潑雙湖
六六鴛鴦對岸呼
為問語兒亭畔柳
春波綠似去

年無

閨人養病辭

工愁善病女相如暫徙瑤齋檢道書一縷藥烟清似水雲屏隔斷廣
寒居

南窗置榻北窗寬一曲書廊鏡檻安那有紅塵飛得到綠色蕉映雪
闌干

雙扉閒鎖一階苔屈膝銅鋪畫不開只有嫦娥推不去夜深還近小
窗來

刺桐清影拂簾長鼎沸松風藥透香親把銀匙調一過同心甘苦願
分嘗

暫廢椒花格律新繞房書卷尚逡巡卧中聽得秦嘉詠一字推敲又
損神

竹牀冰簟鎮相親
吟瘦身看病瘦身
聽說蓮塘遭雨打
今年花更瘦
於人

隔年情事記分明
雪梳冰盤夜話清
昨日到門親聽得
小鬟偷學誦
詩聲

妝樓畫靜簾聲無
畫稿叢殘墨未枯
等月再生人病起
拜雙星夜玉
梯扶

自題筠翠山房

四山流水應宮商
風細吹來籜粉香
生就幾枝班竹好
被人猜道是
瀟湘

昔夢

圓紋碧浪小紅槎
笑倚東南見日華
醉殺九天霞一朵
那知人世有

桃花

風輪小劫病天魔一枕頽雲散髻螺龍樹藥王醫不得手拈紅豆示維摩

生辰曲

鷗波仙館即蓮臺繡佛爐香煖不灰應有兜羅錦樣手笑持荷葉捧觴來

更有參軍小妹清藕花生日一齊生無端吹折同心蒂零落紅衣畫不成

箇人

箇人第一是青絲委地春雲挽髻遲記得刺桐花下等水晶簾外日斜時

箇人第一是雙蛾淡掃春山不費螺自識玉郎心事重展時偏少蹙時多

箇人第一是星眸載得聰明又載愁只許消魂人自覺暗傳心事不
擡頭

箇人第一是朱櫻匿笑辜憚皓齒呈翻道詩人蓮舌好願通花氣過
聰明

畫梅寄情人

人間難畫是相思只畫瑤臺絕世姿脩到佗生須記得謝娘庭院雪
來時

玉姿清瘦不禁風縞袂依稀薄霧籠記得小紅闌角事滿身香雪月
明中

紫雲樓話月

燈昏月瘦已三更聽盡瀟湘過雁聲修作佗生真姊弟相憐未必似
今生

拜梅

青蓮才思九州橫，獨對梅花傲不成。
七貴五侯供一笑，滿身風雪拜卿卿。

記憶卽書

聞郎聲息翠簾開，連日潛踪著意猜。
知道袖中藏數字，百方圖便近身來。

投瓊鬪葉兩無猜，眾裏橫波不肯擡。
挨到上燈移坐近，一鉤新月暗鉤來。

臨別貪看月下姿，黃昏風露下階遲。
知郎尚有流連意，特向明蟾立片時。

心性年來倍耐愁，沈潛聲影坐樓頭。
輕風任擊簾鉤響，不是郎來不下樓。

此生百念已灰寒薄倖休疑會合難賸有丹誠心一點可憐無計剖君看

夏詞

鸚鵡當窗不敢呼玉鉤響處卷簾無風前冉冉輕雲影一幅楊妃出浴圖

小姑新製碧筒香彊捉檀奴盡一觴親剝蓮蓬瑩似玉背燈伴置鏡臺旁

秋詞

小病慙慙過暑天嫩黃姿色謝華鉛今朝薄傅芙蓉粉省得郎看瘦可憐

洗空脂粉晚妝成真色看來倍有情更喜一彎心字月玉人眉額照秋清

書憤寄所思

怕檢羅衣舊日香
怕登樓閣睹斜陽
眼前事事皆堪哭
特借飛花慟一場

旁撓歡計阻良緣
中道風波豈偶然
我痛世人皆欲殺
不如卿有一人憐

帳簷梅花

一重霧縠一重紗
寫出前身萼綠華
畢竟惟中看不見
依然暖玉當梅花

羅帳春風偷揭開
壽陽妝額尚慵攪
玉鈎掛起分明看
也當巡檐索笑來

咏美人牒上絮

托跡紅幫繡綫邊
步來香土欲成蓮
此生不作沾泥相
慧業能參白

足禪

感蝶

莊周幻夢為蝴蝶畢竟風流夢是空爭似青陵臺下魄一生酣夢萬花中

花燭辭調張子和比部納姬

姬靜海人

剪錦為帆桂作橈渡江桃葉自吹簫儂家丁字沾邊住生小垂楊鬪細腰

銀燭生花漾翠屏桃枝扇底玉瓏玲一雙同應天邊宿郎是郎官妾小星

五更紉鼓聽蓼蓼熏罷朝衣宿火紅獨抱雲窩貪美睡賣花聲過小胡同

紅條三尺署銜頭新拜都官屬小秋左畫蛾眉石書判果然張敞最

風流

咏美人所製楊妃舌用海汁搗饴霜裹玫瑰辦為之取其形似也

西施舌好味嫌腥新剝雞頭肉比馨一種妙蓮花氣息是曾親口授心經

清品須陪雀舌茶如酥滑膩欲膠牙三郎見此應微笑親喚玫瑰解語花

入口甘酸滿上池芳津直許透詩脾華清當日真滋味只有寧王玉笛知

陽羨寒辭和張椒卿

綠波紅舫即天台花不知名爛漫開我比劉晨更無賴此番瞞過阮

郎來

時在阮昉
巖師署

輕衫如水剪柔藍占得烟波玉女潭自受東風披拂後桃花紅煞小城南

清脆鄉音畧帶蘇七條絃上住羅敷望仙橋北垂楊路認得當鑪翠

袖無

沈四常熟酒家女聲技為諸伎之冠

解畫開元桂葉蛾能酬主簿定情歌尋常一朵紅蘭影已勝粗桃俗李多

張緒依依最少年墨花狂污薛濤箋風情恰似靈和柳摇曳輕寒二

月天

杜牧尋芳歲晏時柔情消得鬢如絲秋墳欲喚陳髯起重唱迦陵絕妙詞

松陵有舊家子賣笑以養親孫子憫其志為成詩

酒龍喝月笑如雷贏得桃花上玉腮生小頌椒吟絮手紅酥渾未慣

行杯

滎陽第宅舊平泉
券寫簪花記昔年
莫話東山絲竹事
惹儂雙淚落樽前

有女郎臨死自焚其詩稿者

一方紅淚滴瓊瑰
拚把生香換死灰
留下人間誰解讀
除非儂再返魂來

爐灰撥盡尚沈吟
身死何須要賞音
還恨有情偷記去
無從灰得此人心

為蘭風題天上人間圖即以誌別

聘玉盟虛玉化烟
生天小像寫嬋娟
儂心別有蘭香影
知在華鬢第幾天

何必仙山縹緲踪
人間樓閣怕雲封
只消一片桃花紙
便隔人天萬

萬重

就使飛身入廣寒嫦娥還許夜深看卿家更在青天上要把琉璃揭去難

借君圖畫寫儂詩各種情天各樣辭亦有天台同夢處殺花聲裏呢相思

題謝孃秋影照

謝名玉所居秋影樓即以為字乾隆庚子甲辰江左兩攀

翠華目不覩荒歉耳不聞金革風氣日競華艷而金陵為尤曲中有名者指不可屈秋影獨浣妝謝客以自高聲價為隨園先生所賞一時名士翕然譽之先生死秋孃亦老矣同年陸甫元中翰沅藏其舊影屬題展北里之胭脂搗西州之馬策為書三絕句憶謝耶弔袁耶有心人自能辨之

心多力弱篆烟微隔著天河見影稀柳絮無情偏有福因風還向謝家飛

一重香霧百重門月過閒階不記痕落盡桐華深院鎖為誰風露立黃昏

秦淮昔夢散如塵太傅池臺宿草新我是東山舊賓客可堪重對卷中人

滄城花事絕句

千叢玉樹萬叢蘭曲折紅橋四百欄不是道人騎鶴去也應迷路出花難

桂葉雙眉秀絕塵飛觴喝月闌千巡彥回枉殺髯如戟沈醉東風讓

太真

秀真色藝双妙尤豪於飲褚文洲負孔思遠之量見而拜倒

仙吏栽花繡滿園風前唱煞護花幡一枝偏賞瓊林樹聽報沿街女

狀元

萬廉山大令承紀製護花幡傳奇遍賞
曲中以玉林為冠一時有狀元之稱

士龍才思枉如龍拋得明珠墮海中虧我摩抄雙醉眼親擒明月水

晶宮

去歲陸祁生寄書艷稱擎珠第一今
來祁生已歸囑七香遠峯招致之

俞生絕調太縱橫不數杭州蘇老兵博得如皋輕一笑當筵親拜女

門生

陳淑娟如皋人工絃索頗高聲價曾
于席上聽俞春浦琵琶乞為弟子

調鉛殺粉寫珠孃誰似華亭改七香喜字親書三十六他生修作紫

鴛鴦

改琦字七香工畫美人出仇實
父上所識四喜有玉簫之約

老我清狂杜牧之紫雲吹散海棠絲東風牽惹閒枝葉又值傷春病

酒時

兩年前有秀芝者傾心於余為東諸侯
劫去今來滬城見其妹玉芝為之愴然

香海天酒滿池鐵公繞指化柔絲玉皇勅賜雙飛寺醉殺偎紅倚

翠師

鐵舟曾寓南園工書畫能歌
小令酒場無鐵公不歡也

小隊羊車窄袖身銀河照耀玉精神張家世有蓮花貌也入花叢鬪

早春

張氏子名湘春者風致絕韻諸公宴賞必及焉

小部霓裳舞柘枝春燈斜映斷紅姿替他小史然眉急偏是英雄李

藥師

慶升即小伶崔松味莊觀察所賞演燈劇火然其眉公為之疾呼

為子和姬人題團扇

皎潔齊紈妙剪裁畫梅窗下影徘徊分明一個天邊月偏落嫦娥素手來

洞房秋暖不知寒莫取班姬古傳看自製合歡新樣子更無一日不團欒

石闌點筆稱題詩樹底輕涼拂面時誰唱畫屏團扇曲侍兒猶是謝芳姿

供蘭圖

三生公案證幽蘭珍重珠香白玉闌除却此花無當意春風笑折一

枝看

膽鉗欲插費商量愛好天生事審詳位置一花非草草才人文筆佛心腸

水軒紀事

銀塘急雨響颼颼水濺荷衣萬葉愁一朵玉蓮波上立天風吹殺不低頭

歸舟

艣枝搖出荻花灣隱約船頭露翠鬟料得箇人鴛枕上夢魂先我到虞山

金鳳曲為周生松疇作

迷香小洞曲瓏玲衣染幽蘭葉葉馨修到今生兼福慧親題詩上照春屏

乍拋眉眼整雲翹顧曲心魂已暗消不索泉邱帷幕聘只圖夫壻會
吹簫

手拈紅豆記琵琶的的親封捉臂紗儂自願栖金井樹不知郎可是
桐花

雙飛心事比鴛鴦誰改嬰蘭小字香怕聽躍龍宮裏曲九華深帳貯
歸郎

謝雪卿挽辭

錢子霞
姬人

逝水年華悼總筭雪堂前夢太淒迷生憎點點因風絮纔上梅花便
墮泥

芳姿格韻本如仙了却春痕玉化烟手把定情團扇子九原辛苦尚
流連

晴雪難留短命身秋風訣別太酸辛要郎記得營齋日每到生辰是

忘長

我有傷心不可言
年年腸斷水犀天
借他溼翠啼紅恨
自證幽蘭院
裏禪

嘉道六家絕句卷四終

嘉道六家絕句卷五

尚綱堂詩

劉嗣綰字醇甫號笑初江南陽湖人嘉慶十三年進士有尚

綱堂集

法式善梧門文抄醇甫少作明艷居多肄業太學以後則沈博矣故浪江湖以後則排鼻矣茲則清道駿

邁以快屬之筆達幽隱之思如水銀瀉地天馬行空聽破

盧文鈔笑初以相門子稽古績學綺歲能文乃青衫落魄破

硯依人然卒以禮闈榜首簪筆木天不可謂非達也顧中年以後身居京國心繫家園歸咏循陔出仍負米迺其生平蓋

神仙五首

翠蓋蜺旌駐羽鑾高唐朝暮侍清歡蘭臺史筆如封禪却遣襄王作

夢看

碧雞祠下祀陳倉一曲釣天聽不長十二金人真鑄錯竟無清淚憶

咸陽

世上桃源豈浪遊
仙山却向海中求
君王自要長生藥
不許童男女
白頭

甲帳丹青畫鬼神
金莖遙對柏梁新
如何天馬來西極
不使瑤池宴
一巡

一表通天弔劫灰
兩家武帝總堪哀
西池王母西天佛
看盡人間富
貴來

池上一絕

草色迢迢入謝家
小池一綠澹於紗
東風不要閒愁散
盡日堦前埽
落花

小遊仙

仙人掌冷下方諸
小駐旌幢拜玉除
金碧重重五雲閣
分明認得少
霞書

天孫嫁後剪雲羅
夜夜紅鸞會唱歌
三十六天宮漏永
不知秋思是誰多

排雲五岳劒峰開
吹落罡風總却灰
昨夜忽逢天一笑
上方是電下方雷

玉龍酣戰未曾眠
帶甲來耕月地煙
瑤草尚愁無種處
不辭東海盡成田

玉宇瓊樓徹夜寒
珠宮承露幾銅盤
水衡濫向空中瀉
却恐天河亦易乾

鳳髓麟膠壓豹胎
仙筵齊向幔亭開
扁舟又進安期棗
一朵紅雲海上來

星宮舊冊太紛如
合付天曹一埽除
却恨秦皇仙未得
不曾燒到上清書

白玉樓中住鬼才掌書今日遣誰來等閒食字都仙去十地鄉媛處
處開

珠幢玉節下雲煙謫守丹爐五百年何處鳳笙吹不斷大羅天上葬
神仙

再拜司香玉案前重來可是有情天荷巾鶴扇憑收拾留與人間作
散仙

訪白燕菴故址

寺門落日與荒煙海叟風流四百年飛到梁間灰劫盡更無燕子話
桑田

白衣宣至白衣回曾有高人共草萊昨日龍門杉下立一聲鐵笛忽

飛來

龍門寺古杉一株
相傳鐵崖手植

碧城

碧城十二最蕭寒何路天風下彩鸞獨坐春閨看月暈不分明處是
團樂

吳宮

沸天絲管在蘇臺白紵風前舞幾回恩怨不分啼笑雜美人只合捧
心來

楚宮

宮裏纖腰畫不如章華侍輦道爭除君王夜夜遊雲夢可有樊姬諫
獵書

秦宮

秦時明月滿妝臺鏡裏雲鬟迤邐開三十六宮還望幸人間何處到
蓬萊

冶春斷句

芳遊喚得總宜船為蹋春陽折簡傳一種泥金新畫藁韋家簇蝶孟
家蟬

牙籤珊格滿琳琅閣帖誰題陸女郎自對洛神臨小篆金釵斜界十
三行

青絲步障謝娘家依約屏風曲曲遮擲罷金錢成一笑背人深夜拜
燈花

雨夜

水精眠夢不曾長秋雨秋風滿曲塘一夜綠荷珠盡碎起籠銀燭照
鴛鴦

雜題

煙雨來尋十六樓情懷小極暮江頭西風斷雁拖橫幅染出金陵一
半秋

枯荷敗葦莫愁湖何處行人覓酒壚一陣暮寒江上緊白門多少欲
栖烏

疎柳蕭寒掛路歧荒煙一抹總然疑臺城無限傷心在錯向西風恨
酒旗

斷碣前頭取次經卞侯墓下草青青臨行指點梅岡路落日寒鴉木
末亭

題水閣

一程春雨一程愁小閣重簾水上頭依約曉窗人未起賣花聲裏到
蘇州

楊花曲

陌上連朝賦懊儂眉梢眼角半惺忪分明認得春歸路却隔春愁一
萬重

木綿衣重退香篝撲帳濃雲到曉留閒倚繡簾吹不斷是儂輕薄是
儂愁

絮盡湘簾燕幾雙春寒如夢隔紗窗柳絲挽不郎心住吹上征衫共
渡江

送盡香車送畫船風前那得了愁緣沾泥不作無情死要著青萍個
個圓

縈肩拂面滿晴空特地飛來正惱公滿眼綠陰都結子幾時真個嫁
東風

春愁脈脈惹斜陽人在闌干易斷腸十里紅樓魂夢遠膏騰若個不
思量

題畫扇

銷金帳子玉鈞斜風月閒尋到謝家懷裏盈盈人面樣自携宮扇仿

桃花

東風昨夜障齊紈
葉葉裁成月影團
扶近春山和病寫
不勝眉綠趙鸞鸞

雜憶

裊斷爐烟坐綺寮
花枝恰對可憐宵
相思淚似黃梅雨
著到郎衣不肯消

交疏窗子鬱金床
病服慵來改道裝
買得羅襦憑寄遠
千鍼萬縷繡鴛鴦

西簾好語喚銀鈎
剗地風來破曉愁
忽報酴醾窗外雪
朦朧睡起不梳頭

薰香小像當維摩
一卷金經禮貝多
綺語近來都懺盡
懶拋紅豆到鸚哥

舟過吳江作

鷗波春遠碧於油，取次吳山拆曉愁。
直到畫眉橋下立，桃花兩岸照梳頭。

紅樓翠箔浴吳蠶，近水人家對碧嵐。
髣髴謝娘簾閣裏，幾絲春雨溼江南。

雨中對西湖

段橋寒食草青青，依戀湖山幾曲屏。
二十四堆煙雨裏，遠天如墨畫西泠。

湖水湖雲十載思，湖天濃淡見西施。
誰憐翠被孤舟客，冷雨瀟瀟唱竹枝。

吳閶雜詩

鶯囀花枝暮復朝，家家門巷喚餽簫。
天涯被酒無情思，倚遍紅欄四

百橋

香粉凋零淚未乾夕陽酹酒倚闌干銷魂第一桃花鵝背却春風不忍看

千絲楊柳拂姑蘇眉意朝朝入畫圖舊日宮鶯都不見風前啼殺白頭烏

尋春繞遍闔闔城草色裙腰逐隊行幾點冷鴉留不住女墳湖上作清明

萬頃湖光坐渺然清歌一曲紫簫圓夜來又是瀟瀟雨愁斷吳娘六柱船

重過

亞字闌干曲永廊蓬山曾住舊劉郎等閒燕子無消息捲却珍珠十二行

東風吹送碧城鸞眼底花如霧裏看花自無言鈴自語小紅樓角訴
春寒

題徐朗齋秦淮遊草即送其再赴秦中

清淮記得卷簾波聽爾新聲子夜歌一樣柳條持送別青門愁比白
門多

吳山點點暮江頭綠酒銀尊喚客愁回首兩行箏柱雁月明飛上小
涼州

秋雨不止庭桂零落成一絕

畫闌桂樹碧周遭十日濃陰卷翠濤誰念淮南舊詞客秋山病雨續
離騷

西郭晚歸

埜興如鷗慣出城茨菇葉葉水風生櫓聲搖動月初上載得滿船山

影行

晚過雨花臺

擲拂空中笑劫灰
青鞋蹋遍草煙堆
臺城送過西天佛
又送西山老佛來

斷磬零鐘出上方
金川門事最茫茫
路旁自拜前朝碣
瓜蔓傷心滿夕陽

題秦淮水閣

金迷紙醉寫陽臺
周昉屏風面面開
還是南朝舊明月
玉簫聲裏過江來

雙河竹枝詞

河口夕陽郎未歸
河邊小雨妾沾衣
郎家妾家兩條水
鷓鴣一雙相對飛

樵唱晚歸河上翁兩頭借得水邊風妾心不共水流去妾自西流郎
自東

妾住裏河灣復灣送郎直到河外邊生來最怪雙河水流過門前下
獨山

中橋歸州作

竹籬深處似仙家賞遍朝霞與暮霞一片炊煙紅不了漁人歸去飯
桃花

秋江

山山紅葉打船窗賸得閒門古樹樁白鷺前身是漁父滿頭霜雪在
秋江

江行竹枝詞

老鴉磯畔老鴉飛山鷓坡前山鷓啼只有女郎祠下路年年不見女

郎歸

荻港人家江上樓門前江水綠於油
舟行莫宿港中去恐有荻花飛上頭

大姑彎彎眉黛齊小姑鬟子綠雲低
伊家姊妹一帆送吹到大江西更西

泊琵琶亭

青山如畫送行舟占斷孤亭一片鷗
今日蘆花如客樣不曾頭白已漂流

桐封將行少安為補晴川送別圖復題三絕

君家亭館枕江開郢雨湘煙擅別才
此去愧無香草贈詞臣名姓在蘭臺

落盡梅花坐笛牀江樓有客正思鄉
羨君飽看青山去一路題詩出

建康

桐封石林後裔
時校刊建康集

旗亭拂遍壁間塵惆悵天涯被酒身
輸與風流舊張緒盡拋金縷送行人

齋中榴花盛開賦石榴詞六章

嬌黃姹紫正憐渠又是榴花照眼餘
昨夜仙人來布葉綠天深護好樓居

濃雲匝匝幾重鋪映取闌干一兩株
名種不須誇海外石家原自有珊瑚

兒童笑插帽檐斜艷絕潘郎賦裏花
依約故園重五候一枝紅浸碧窗紗

盤中的歷迸鮫綃樺燭燒春最放嬌
自別紅紅花下曲更無消息到今朝

枝頭結子足清歡笑當孫娘齟齬看就裏相思誰識得比他紅豆更
心酸

千朵繁花千葉雲平分艷思向東君分明照見瀟湘水妬殺江邊幅
幅裙

悼蘋詞

采蘋陳納洲方伯侍兒也官杭州時徐雨珊以采蘋詞百章
易之携歸徐州今春雨珊客楚而采蘋死矣余賦悼蘋詞二
章

泥樣心腸海樣情白蘋消息可憐生叢叢香草離騷在無復毛詩喚
小名

西湖花月買胭脂費盡蠻牋百首詩今日春風圖裏看斷腸人是杜
紅兒

雨興

江天樓閣幾重嵐
秋影平臨鏡一潭
八尺桃笙涼似水
女郎山下夢江南

笛牀禪閣總無聊
閒坐湘屏看晚潮
一片楚雲留不住
隔江齊唱雨瀟瀟

途中雜詩

一鐙殘夢驛塵昏
天未明時已出門
行過斷橋愁馬滑
曉來滿地是霜痕

風沙黯澹沒征裘
帽影怱怱出裕州
多謝青山遠相送
不辭一步一回頭

舊城南去是昆陽
簫鼓叢祠十日忙
未忙門前先下馬
一盂麥飯拜蕭王

墨池別鮮訪高蹤破壁塵昏盡日封畢竟虛名誰好得世間休笑葉

公龍

葉縣城東有墨池相傳為葉公畫龍處

短長亭下雨瀟瀟為送征塵十里遙一路條枝都折盡行人空過汝墳橋

落日前山看紫雲靈衣玉劍徒紛紛清川如鏡照何許我來却憶襄城君

櫻桃花底客思家破壁留詩幾歲華誰識郵亭風雪夜有人移燭為

籠紗

襄城題壁詩憶著江南好風景櫻桃花底客思家清婉可誦

十里畬田九里橫烏犍獨立看人耕無端補出江南畫菱角湖邊上晚晴

犢鼻生涯不諱窮前村猶說阮家風當年枉自分南北總在荒煙古

道中

尉氏有阮村即南北阮舊居也

嘉道六家絕句

卷五

十

掃葉山房石印

綠楊深處憩壺觴社鼓迎神亦自忙
留得上元燈火在盲詞聽說蔡中郎

元瑜書記意如何舊宅淒涼策馬過
欲問建安埋骨地春風原上草無多

睢州城外暮雲黃更出城來十里長
兀兀騾輿行不得夕陽人影駱駝岡

讀罷殘碑立路歧睢陽廟口忽沾衣
魂歸不見神鴉到落日荒荒雀亂飛

土銼繩床不耐眠空亭一帶少人煙
松膠賦裏尋殘墨記得風流七

百年

睢州有實墨亭相傳東坡書松膠賦處

夕陽古道少人行數過郵亭第幾程
料理一鞭殘醉裏曉風時節到

蒙城

寥落人煙繞郭同
河流活活十年中
水田一片閒鷗影
誰向南湖問

晏公

南湖在歸德城南宋晏同叔放馴鷗於湖中即其處也

郭門楊柳不勝鴉
何苦東風作意斜
惆悵百花生日日
一壺濁酒在天涯

汎舟東郭外

斷雲東去有茅菴
郭外尋春路未諳
不信綠波流得到
一聲柔櫓似

江南

夕照人家半掩扉
閒尋舊苑獨沾衣
當時詞客今誰在
一路楊花作雪飛

題畫幅

葯蘭誰折殿春枝
好似沈香一捻時
不枉佳名呼素素
東風無地著

胭脂

薛素素牡丹

書格簪花擅玉臺文家女史亦仙才寒山好景無多筆莫放閨花爛

漫開

文端容
花卉

尚書佳語足風流誰遣幽蘭怨未休一翦橫波看不得斷腸人影在

眉樓

顧橫波
夫人蘭

絕句

半是陶情半是禪京華小隱只隨緣一燈秋夢關門住又上江湖聽

雨船

觀尋橦戲作

輕於梭擲疾於丸傀儡場中百尺竿拚著一身遊戲在朝朝顛倒與
人看

索上相逢馬上推郭郎舞袖小徘徊諸公只解從旁笑可曾竿頭立腳來

寒窗絕句

紙窗常似白雲封
坐撥爐灰寸寸紅
留得茶聲終日聽
居然枕上有松風

客有以楊柳青柳枝詞見示者題二絕

兩岸新烟問渡時
風波無地著漁師
一雙青眼斜陽外
手拓船唇唱柳枝

寒流七十二沽經
橋木津邊望柳星
借得春人衣上色
和煙和雨畫長亭

秋圃雜咏

瓜棚瓜圃占清幽
風露闌干入九秋
最好月明人靜夜
滿天涼影在秦樓

鳳仙

雞人借得翠雲冠
一片紅雲別作團
立盡花前花不語
自家起舞與花看

雞冠

秋光醉殺雁來前爭向花叢羨少年莫信老年真個少十分紅處是

霜天

老少年

舞來掌上翠雲袖彈罷壺中紅淚痕到底不知秋幾許堦前喚起海

棠魂

秋海棠

紅牆點綴幾分秋在人間促織家閒向西風說消息夜來滿地是

匏瓜

牽牛花

忘憂不用勸金卮且向花前立許時若使宜男真佩得生兒也是莫

愁兒

萱花

西風剪盡曲欄花新樣裁成出內家同是秋江好顏色無人解唱越

溪紗

剪秋紗

芳名可許綠天同分取蕉窗葉葉風那得美人心便死秋邊還賸一

分紅

美人蕉

白地肝腸斷幾枝搔頭記得卸妝時折花人亦如花晚愁殺香兒與

玉兒

晚香玉

淡黃一色麴衣塵畫出江南別樣春吟罷不知何處望阿儂原是此

花身

望江南

紅豆詞

一分煙月一分霞好在江南水上家怨殺東風零落甚拋將紅豆滿

天涯

院落當年種幾枝每逢花信一相思綠陰青子都刪盡可是相思結

果時

女兒箱子疊檀槽唱出鐙前髻影高多謝鸚哥偷記得一聲聲是鄭

櫻桃

明珠幾斛上吳船數到清遊最惘然昔日歌聲今日淚不知紅豆為

誰圓

惠紅豆與吳紅豆

惠定宇以紅豆詩得名稱惠紅豆吳國次有紅豆詞時亦稱吳紅豆

曾向紅紅曲裏

聽唱到山莊新樂府自彈酸淚哭東亭

吾鄉董東亭太史有紅豆莊歌盛稱於時

風雨西窗冷客氈手翻茶串夜談禪新詞譜出雙紅豆一點秋燈分外圓

題倪米樓懷儂錄後

天女因緣幾目成雪泥容易誤三生一編便是羣芳譜芳草叢叢記

小名

家住烟波第幾橋年年消息付春潮郎心不及西湖水綠到門前只

一條

空山茅屋記盟詞倚竹天寒不自知眼見妾心成古井鹿盧應有盡

頭時

薛家箋色研雲羅昨夜封題寄綠波數到翠鱗三十六玉河橋下淚珠多

紅牆回首夢參差我亦閒愁颺幾絲留得隔簾銀蒜在斷風聲裏說相思

凍雨寒雲畫壁昏情癡若個不銷魂夜深印出傷心字同撥香灰看淚痕

春城斷句

春來高卧足清酣客裏風光百不諳憶著故園櫻筍好累儂午夢到江南

桃李門前換綠陰豐臺紅藥又相尋春風值得多聲價也費吳儂一餅金

層城一帶繞垣環取道牆陰獨往還不管紅塵天半起駱駝背上看

青山

九陌車聲盡日忙
杜陵挈伴最依傍
道逢傀儡從旁看
不看登場看

下場

張旭書顛成醉癖

船山

王維畫隱得禪真

板畦

相逢便作江湖看
人海中

間有幾人

春流幾曲遶湖亭
郭外人家取次經
坐慣騾輿腰脚換
長橋十步九

鈴舫

寺門樹色倚孤筇
撥霧披煙更幾重
消得塵心如許盡
西山天外一

聲鐘

獨遊積水潭

湖橋十里路高低
溼翠飛來片片齊
手抱一株楊柳坐
相思都在水

門西

人家占得鶯絲嫩，劃破烟痕與水痕。擬結茅菴此間住，綠憎憎處不
開門。

秋日集蓮花社偕穀人先生作

綠陰城郭幕輕煙，草草尋秋駐一鞭。離得人家纔半里，等閒便是白
鷗天。

陂塘十里水雲寬，幾日西風背面寒。不看荷花看荷葉，是儂孤負曲
闌干。

朝霞過了暮霞遲，消得亭中酒一卮。忽憶江南天樣遠，五年不唱鬧
紅詞。

槐花滿路寬歸程，小扇單衫太瘦生。牽斷秋心秋不管，一絲風裏萬
蟬聲。

齋中菊花甚開故人不至

寒蠶瘦蝶總傷神
庭綠如烟畫不真
一種漢宮秋色裏
西風誰問菊夫人

題滕王閣送別圖卷

滕王閣中送客歸
滕王閣下雪沾衣
雪花一夜過江去
都作滕王蛺蝶飛

江頭見桃花

江頭不見舊青驄
忽放桃花入眼中
却怪近來人面冷
東風吹上一分紅

春來那不要妍華
半是輕烟半是霞
今日劉郎饒自在
別人栽樹我看花

湖上晚步

湖水連天綠上樓
湖亭惆悵憶清遊
蹋青過了無多日
辨得青鞋又

蹋秋

蕪湖土人以秋日出遊為蹋秋

山房雲磬不分層我亦飄然出世僧閒立上方看下界滿湖心裏綠

荷燈

是夕孟蘭會甚盛

秋日出小西湖

十日秋無五日晴滿湖煙翠不知名暮霞冷淡朝霞暖可是湖天亦

世情

長堤一帶似斜川雲白煙青處處蟬解得雲烟無字處也宜詩畫也

宜禪

一夜

一夜羈愁特地生殘燈不語背窗明到來只當山中住四壁秋蟲作

雨聲

齋中置盆菊百餘種極爛漫之勝日來風雨不止蕉萃者十之

六七矣

醉盡秋光是客中朝來莫放酒杯空青鞋滑滑自衝雨翠袖蕭蕭誰卷風

黃金浪說鑄秋煙菊亦如人肯受憐不管寄誰籬下好朝來風雨只

高眠

過金葉山

半是頑仙半謫仙出城便擬到君邊綠楊門巷渾如畫自賣丹青度

小年

湖天幾輩結鷗盟老屋西頭住馬卿

謂馬山人俊

隔著陂塘聽荷葉兩家

秋雨一家聲

歸程雜詩

堠兵吹角暮江東太白樓前憶謝公今日青山應笑我風襟雪帽夕

陽中

聽盡邨歌是牧童
田家無事只編蓬
茆亭縛得低低好
一帶高樓正畏風

過了山隈過水隈
柴門怪底水邊開
漁灣十里都安柵
也與中流作柱來

被酒風前思易昏
雲烟底處不銷魂
年來怕到登臨地
策蹇匆匆過白門

正月十三夜小西湖蹋月歸留別中江諸子

那不春城要黯然
朝來風色在吳船
客心真似剪刀碎
春夢不知簫鼓圓

小坐西湖夜色寒
綵雲飛上玉闌干
重來未必東風在
手把楊枝不忍看

雪後憩禹王廟

碑陰鎖斷古苔春，岫嶺應輸面目真。
下界一峯峯積雪，不知峯頂有紅輪。

重過石菴先生藤花書屋兼懷信芳學士

尋春何地好徘徊，第宅如雲各自開。
門外輭紅爭插脚，幾人閒踏落花來。

退朝便擬擁書城，宰相門庭似水清。
預屬青藤好料理，秋來落子和碁聲。

元都舊事說劉郎，不道重來事渺茫。
尋到古藤陰下夢，廿年三度小

滄桑

先君子及古三叔父昔年皆曾館此

金青濟屬題雪意圖

伊墨卿為青濟寫悼亡意

紙閣雲窗空所思，爐烟吹去不多時。
閨中賸有妝臺在，唱殺東風柳

絮詞

和月和風說可憐枉拋心力付金荃一鐙夜夜曾騰去還是園亭小雪天

周介夫將返楚南索詩贈別

盡日郵亭問酒旗天涯各自數歸期送君直到君山下江水聲聲古別離

諸公走馬盡蘭臺門外珊瑚鞭日幾回情盡橋邊才盡客臨行持底贈君來

通濟閘

枕底喧聞百轉雷蛟龍有夢忽驚回自家性命輕如擲却替旁人失色來

悼羅山人兩峯

湖山好處忽停柁聽說羅含已夜臺曾向生前知鬼趣哭君先要問

君來

君舊有鬼趣圖題咏最盛

剛是孟蘭作道場亂螢飛破古雷塘得歸便要揚州死何苦頻年老

異鄉

風流籜石詩皆畫跌宕逢心吏亦僂更辨青鞋過江去亂山風雨哭

張顛

張玉川洽武進人畫宗麓臺居攝山三十餘年今夏即世

理堂石琴諸君飲余湖上得斷句

離心分與碧雲寒小約湖亭放艇寬十日不來秋水長綠痕一半上

闌干

煙江零落不勝秋白鷺絲飛水盡頭涼到一花紅退處美人無數碧

天愁

秋山舊雨病蒼苔冷到天涯酒一杯不是今年叢桂晚是他招隱未

歸來

斜暉盡處各依依惜別人如落葉稀胡蝶不知秋士恨飛來還認舊
春衣

寺樓眺罷枕樓眠看盡垂楊郭外烟笑殺到來貪跨鶴吾家雞犬亦
神仙

西風幾處擢歌腔借得新涼枕水窗料理明朝聽雁去搖枝煙櫓下
空江

闌珊煙火近長街船到回燈興轉佳不要遊人便歸去一螢流下小
秦淮

鄰船何苦發嬌喉拋與珍珠不肯收那要膏騰成再憶尊前已是夢
揚州

雨後汎舟平山堂有作

剪取湖光破暝行
瓜皮艇小晚涼生
綠雲化作泠泠水
一路蟬聲唱出城

費盡秋山翠
一螺閒情拋與水
雲窩微波館裏波
如畫著得驚鴻影
幾多

湖水湖煙迴不流
將載秋思上歸舟
溼螢亂落如紅雨
中有雷塘一點愁

重宿徐氏之桐花舫
示金葉山倪米樓並東主人承伯昆仲

暝色林塘碧可憐
凭欄恰好雨餘天
桐花舫裏桐花鳳
不聽清聲已五年

閒展山屏眺翠微
薄寒一剪上生衣
小樓昨夜得秋早
風葉已成黃蝶飛

宿酒幾層三日醒
醒來不道卧空庭
竹梢搖過短牆去
直向對山樓

上青

高山流水賞來難拉得汪郎

迂古靜夜彈彈到海天愁絕處世間還有

董庭蘭

消得閒情賣得癡晴窗要度小年時黃筌舊譜天然畫白石新聲絕
妙詞

梅子青青杏子黃江南春去謝家塘無人識得文園渴自寫來禽帖
數行

書陳定生秋園雜佩後即示李馴

秋園一卷當陽秋老去青門話故侯却笑世人矜俗艷桃花扇底說
風流

鄰笛山陽聽易孤閒留史筆在葫蘆一編舊話憑收拾抵得雲林十

萬圖

定生舊藏雲林萬壑爭流萬松擁翠等十圖稱雲林十萬圖

嘉道六家絕句

卷五

二十

掃葉山房石印

廉山邀聽宛蘭彈琵琶

天半行雲夢不回
花枝還照舊樓臺
蘇州刺史江州客
聽到涼州入破來

金撥銅弦續續彈
尊前不那雙鬟柔腸斷
到無尋處又繞冰車出散關

顧影尋聲各自憐
回身還語藥珠仙
自從小謫紅塵後
不聽雲璈又幾年

效陳迦陵惆悵詞為雲衣作

藥烟日坐小樓熏
無復衣香借令君
忽地眼明書一卷
窗前吹落硯池雲

秋來鶴骨不勝寒
病起空庭綠正團
多謝一枝新竹影
朝朝搖與隔牆看

雲窗曲折不分明
合住人間太俊生
聽到讀書聲了了
滿園雛鳳與雛鶯

宮商盡日費推敲
自拍檀痕不用教
要與雲仙通一語
彩鸞韻本借伊鈔

盥手薔薇百和湯
愛儂詩似愛名香
背人偷唱燒香曲
裊出爐煙一寸腸

余舊有
燒香曲

虹橋船裏雨纖纖
不隔花香只隔簾
依約嬌郎癡坐處
有人愁在小眉尖

家近蘇州七里塘
自拋鏡子照鴛鴦
斑駁記得門前住
曳雪牽雲為陸郎

女兒箱子下江干
排著輕裝等暮寒
紅柿詩箋青李帖
一齊收拾與儂看

分身曾入洗桐圖

金山人葉山為
寫洗桐軒圖

不道庭前路易蕪袖上墨痕襟上

酒思量一味總模糊

維摩榻畔夜鐙青蘸得楊枝水滿瓶一炷心香親下拜可能替誦淨
名經

寫風寫水著衣裳懶逐遊絲照曲塘瘦到秋蘭秋也老隔簾誰護晚
來霜

衫痕扇影送流年不是吳儂易放顛生悔藕絲香裏住風風雨雨總
纏綿

酒面重開且一傾銀河不道起離情檐前怪底秋桐泣昨夜琴中是
尾聲

過高淳

衰柳絲絲雨脚懸天涯風景最悽然湖邨蝦菜無多味盡在龐家上

冢船

癡黃顛米舊名家

謂亡友顧芋莊

曾向楓林一駐車不道重來成隔世遠天

如墨上昏鴉

小峴先生見示詩文集復成二絕題後并以志別

碧山社後此宗工官興詩情淡宕中大好西湖作行卷與他蘇白當
屏風

日對清光寫楚詞舟人指點好尋詩望衡面面帆能轉只要商量到
岸時

自錢塘至桐廬舟中雜詩

柔櫓咿啞響幾枝寄書付與弄潮兒何當乞得江神便一日潮回十
二時

推蓬樹色四青蒼分得烟雲滿客囊遲我富春遊幾日不留紅葉作

輕裝

惲子風流令亦仙家傳三絕小南田官齋一掬清冷水流出寒江又

幾年

懷富陽舊令惲子居

一折青山一扇屏一灣碧水一條琴無聲詩與有聲畫須在桐廬江

上尋

估客船中習未除開窗一卷詩然書寒魚銜盡鶯絲立如此蕭閒如

不如

不厭風來是石尤人家暝色在高樓天邊牛女相看笑古木橫槎上

婺州

嚴灘口號

昨夜錢塘江上潮潮頭一路傍蘭橈分明萬古英雄恨流到嚴灘也

自消

閱盡風波是釣臺波心風定一帆開灘高灘下都隨分只愛灘聲入夢來

車行晚興

板橋西畔晚停驂貪看波光亦太慙鋪出簾紋新綠色可能借我夢江南

驛燈催起尚黃昏絲柳成煙半挂門看取日來清瘦處月銷殘魄客銷魂

過平原

且作平原半日留郵塵如夢入鄉愁一杯冷酒無澆處鞭影怱怱過趙州

走馬邯鄲已暮春不堪重拜路旁塵勞勞似此君應笑我亦當時十九人

過蔡浣霞齋憩藤花下

紫雲樓閣是仙家來訪當年蔡少霞
鋪得花茵三兩尺不妨留住輭
紅車

黃簾碧簾影玲瓏曲曲藤身入畫中
那要刻谿持作紙滿庭章草自
書空

法源寺看花戲示同遊者

尋春特為叩禪扃醉眼看花不肯醒
一例被他紅紫笑我衣還白爾
衣青

夢劉雲書示

中庭白曉樹栖鴉猶有蟲聲透綠紗
昨夜分明見元九夢中詩句寄
桐花

為董超然題琵琶俠樂府

不用霓裳滾六么不須鴟索走三條竹枝十首當筵奏抵得宮人記洞簫

紅粉青衫絕世才名心莫怨榜空開對山第一崑崙手也向江湖落魄來

題紅梅畫冊為陳石士

和成艷雪比玄霜不羨人間鐵石腸一夜東風到宮額紅羅亭是內

家妝

石士新納姬人紅梅其小名也

月淡昏黃畫不如吳儂漸覺艷情除春燈照破江南夢自寫紅梅閣上書

上巳日寒食同人汎舟通惠河

車聲轆轤破輦紅輕界路遊絲罨出城我是春來常霧眼看花不要太分明

笛牀簫譜記遊仙小別秦淮十四年柔櫓一聲春似水可能搖夢下
江天

側帽閒尋長短亭東風今日太忺惺客愁已似漫天絮纔著長條一
放青

裊腰草色綠成團悶泥春人當夢看一角孤亭三面水與誰消受幾
分寒

絲雨朝來細似塵啼鶯何苦只催人桃花流得紅都斷野水聲中哭
古春

碧空無際只宜秋橫笛聲中起暮愁一派危闌凭不得天涯何處著
高樓

風雨後偕同人至棗花寺看芍藥廢然而返

東風一碧畫亭臺牽地紅情埽不開畢竟將離離未得春人還共蝶

飛來

藍尾杯中醉幾巡不成片段是殘春
風枝雨葉渾無賴盡日離披學
酒人

五月望日距順河十里許赤日卓午紅塵沸空車中勞勞煩
渴殊甚因偕竹素口占途中斷句比至旅宿得若干首即以
書壁

門外驪駒日夜吟疲童瘦馬亦歸心
東華那不成天上一路紅塵換
綠陰

旗亭落日挂輕鞭七尺繩牀勸客眠
夢過邯鄲無好夜自携短枕攔
遊仙

白溝河畔草蕭蕭借得江南水一條
今夜客魂應斷盡鈴聲飛過十

三橋

屋角荒雞徹夜號古漳南去水如刀馬蹄得得蹋山缺城上白煙低
復高

一鞭岱色逐高低幾點青煙日觀西夢裏不知雲海濶亂峯飛上聽
鳴雞

門前雪色賣鮓回記得儂家水閣開誰識文園今渴甚梅黃甚熟未
歸來

槿籬蔬圃認依稀抱甕人來此息機歇馬豆花棚下坐新蟲如雨落
生衣

魚山落照弔陳思詞賦猶堪異代師翠羽明璫何限恨千秋空傍智
瑤祠

歌臺終古大風生置酒何當十日傾欲與故園兄弟說今宵孤夢滯
彭城

風色連天似死灰
河流嗚咽客腸迴
此間浣得衣塵否
曾照行人北渡來

西湖小泛得斷句示同人

西泠煙水隔三生
半晌扁舟又目成
畫出湖光不分曉
外湖飛雨裏湖晴

絲絲疎柳挂湖干
廿四堆前水色寒
莫問西陵松柏路
只留啼眼與人看

紅殺荷塘鬧雨天
美人一路喚田田
滿船載得跳珠去
不見東坡七百年

山上芭蕉葉葉風
山頭絃索在秋空
分明寫出清淮景
落丁家水

閣中

是日小飲
丁家山

春分日抵家

煙亭水驛落帆鐙歸叩柴扉鶴不應我中春愁如中酒東風日日與
曹騰

簾外朝來雪影微春寒未換木棉衣風光纔半已狼藉兩樹瑩桃相
對飛

石琴屬題其亡姬小像

點勘風光別愴神圖中只擬喚真真藥烟斷後爐烟起消得荀郎瘦
一春

泛湖歸舟作

曲曲虹橋記昔遊重來風色易成秋橋頭忽唱古離別橋下水看流
不流

荒隄一派夕陽寒畫出湖天十里寬牛是倒騎船倒走閒中著得幾
人看

漁舍蕭蕭唱竹枝門前閒冷費支持釣絲盡日無魚上惆悵蜻蜓立
少時

幽蘭谷裏背人芳叢桂山中獨自香不是芙蓉臨水種有誰抵死拒
秋霜

重泊橫塘

春燈風影數樓臺舵尾寒煙首重回指點楞伽落天外一聲鐘隔一
年來

橫塘十里試鞭春路上樵風陌上塵手折梅花過橋去入山僧笑出
山人

憂來

憂來傷性別傷神淺醉深眠可是真明日綠陰看不得江城攀斷一
株春

春江一首

風柳千絲綠可憐
闌干西畔易成煙
春江尚說人如月
悽斷蛾眉是下弦

閒題

東風鎮日蹋青忙
埽得閒門趣較長
一角斷垣人不到
自尋芳草過斜陽

題操柁圖

門外風波日夜潮
水東樵語水西樵
看君唱入煙霞去
雙鬢青於郭四朝

朝朝羽扇渡江秋
未必君來肯卧遊
要得帆收須柁轉
海天一淥是中流

六月二十五日夜坐得句

莽莽天風逼四更有人露坐待天明斜河西下月東上屋角片雲流有聲

七月一日湖上汎舟

一月閒階鎖綠苔生衣初換出城來西風吹得香成路纔是尋秋第一回

弄珠歸去滿船歌留與湖天夢一窩荷葉似雲花似月夜來雲月待如何

行雲

雲去雲來不自知行雲只自笑人遲將身却與行雲看更為看雲立少時

蓮裳示余句云秋來盡是無情夜那得蛩聲不斷腸余答二十八字

閒階一尺路難平總為荒寒不肯行人自無情秋自苦蛩聲訴得最分明

七月廿九歸自東郭適祁生詩至答三首

西風吹冷古城陰消得芒鞋信步尋秋草碧如人可意晚風紅到水傷心

河塘簫鼓賽叢詞遊女如花唱竹枝記得那年今日別暮帆飛盡立多時

詩箋傳得少陵筒住是愁中去病中

祁生原句

畢竟與誰商去住小樓鈴

語夜丁東

冬窗絕句

故人喚我作清遊樹樹西風寺寺樓過得江來纔幾日扇頭不是白蘋秋

三逕經年草未除
全家離索意何如
十日鯉魚風色冷
池塘不寄一封書

蕭蕭寥寥霜色天
掃空心地到庭前
白翁畫竹故可惱
今雨不來來

古煙

謂白菴

更生居士好頭銜
梭鞋桐帽芙蓉衫
長風吹夢渡淮去
烟水盡頭抽

短帆

送稚存丈之淮上

一路寒雲覆酒家
酒人幾個在天涯
尋君忽向畫中過
風竹掃門啼

亂鴉

過宋芝山不值

潑眼清光在短牆
香煙幻出影幢幢
寒花不放小春去
時有一蜂吟

紙窗

晴鳩雨鳩朝互啼
等閒又唱午時雞
爨煙橫斷小樓角
知有行廚開

竹西

小詩清絕數城東

胡城東歛人能作小詩

未得從君酒一中後夜圍爐須索句

相逢合在短屏風

楊枝柳枝湖上多也思雙槳打湖波無端憶著瀟瀟雨底處聽來緩

緩歌

一夜霜風盡倒吹閒園可得董公窺秋花只賞橫斜路籬落支撐却

要誰

身世真如惶恐灘鄉心流不到吳關彭郎磯下風波惡日日風波還

未還

謂甘亭

賣田苦早買山遲襌襪生涯百不知一事還家應較勝催租無復打

門時

四五更天醉復醒醒來一步一吟屨披衣不惜犯風露獨立天邊看

酒星

冬窗後絕句

凍雨寒雲夢不醒
勞勞盡日上江亭
夜來忽被天河笑
可有銀槎勸客星

岑華筆底海潮降
昨夜相逢倒玉缸
風笛未終人已去
卧吹橫角下

空江

吳巢松由吳門之潮州

愁寄高樓望遠天
歸林一帶起寒烟
蘆花飛白江南夜
也似春城絮

放顛

橫笛吹來蔣秋竹
一枝叫破春江綠

紀丁巳春南昌舟中事

醉倒聽渠說戰場

夜烏飛入尊前曲

短李

瘦人 髯陳

古愚

墓已乾天涯投老有方干

子雲

日來詩興能添否
埜竹

山梅破曉寒

寂寞詩城近若何
性靈到死未銷磨
生平不著推袁句
洒與倉山淚

最多

與子雲話
隨園舊遊

多謝金郎寫艷詞
鐙前自笑鬢成絲
錦囊貯得傷心集
畫壁吟殘本

事詩

二語手
山贈句

姜家公子

聽珂

亦飄蕭影似霜鴻過板橋
手出故人書一紙
重重封裏

當紅綃

繭紙烏絲拂麝煤
飄零篋衍手重開
破書如葉鐙如豆
幾處秋墳唱

過來

時方緝故
友遺稿

老大心情百事非
當年曾製七襄機
天吳紫鳳都顛倒
怕聽旁人問

嫁衣

湖海新編萬首詩
人間留得是清詞
前途也識狂瀾倒
可要篙工轉

枕時

時述菴先生
刊湖海詩傳

閒吟冷醉鬪清酣
老去風花漸不堪
明日打包今入定
一家風味兩

僧龕

示蓮裳

硯池欲冰小燈孤七尺寒衾似水鋪已是酒醒眠不得風窗一夜凍禽呼

偶題二絕句

四條絃上語春鶯半雜風聲半雨聲不信青衫還不溼楊枝淒斷似平生

隨意看花總霧中天涯只合怨飛蓬傷心一寸離筵蠟獨擁殘衾唱惱公

出都口號別同人

別酒臨歧百感生去留心事不分明
輭紅儘有清涼界笑我翻為觸熱行

青眼高歌日幾回西山送客獨遲迴
棗花一路垂鞭過傲得諸公走

馬來

半身襤褸走東西畫篋書囊只獨携料理他年偕隱事介山老母鹿
門妻

五月十一日抵里門競渡之會鐙船簫鼓轟飲達旦同人邀余
作競渡詞紀之

黃河歸路繞城腰來上西螭舊畫橈展得天中剛五日魚龍曼衍盡
迎潮

黃帽兒郎卷白波中流簫鼓應靈鼉潮頭忽憶鷗夷恨別唱吳儂小
海歌

白雲渡口綠楊樓晶箔家家上玉鉤蕩出月波三萬頃更無人解弄
珠遊

笙歌賽得語音圓十斛珍珠各自穿只我閭門腸繞慣誤尋殘夢上

吳船

謝公第手陸郎蕭

謝賜書陸開三音律為吾郡之最今俱下世矣

自過中年太寂寥擬與湘

纍同一哭客魂零落不堪招

花枝扶影下樓臺草草清歌送客回留得夢魂深夜住雲英月采獨

徘徊

晚憩題襟館雜題斷句兼寄主人泰州

一壺濁酒共誰携徹骨霜風是竹西閒殺曲闌干幾尺更無人處亂

鴉啼

園中主客最分明兩字題襟記館名問訊平泉閒草木可能片石有

三生

山骨朝來面面蒼湖天如墨儘淒涼黃梅莫便尋常落留與空庭當

夕陽

萬竈陽春苦未回
河冰凍合不曾開
雁聲一夜漂流到
知是霜蓬聽過來

立脚風波我亦愁
可知身世只如漚
此中休著登樓眼
天際黃河迸淚流

醉後霜楓看不真
衝寒約得兩三人
寒江尚有王孫路
草色今年綠過春

薛素素畫蘭卷

雨葉風條態不禁
卷中水墨亦傷心
畫蘭何似畫眉好
露眼向人啼到今

香粉叢中寫一枝
當年俠骨幾人知
携來石黛勻妝後
賽得金丸脫手時

烟月秦淮有古愁
却從縑素憶風流
湘蘭舊宅橫波閣
香草年年不

忍秋

登樓得斷句

擬向神仙借洞天山城寂寂不知年樓空盡日聞飄瓦明月清風樓二

名值幾錢

溪東溪西雙白鷗山南山北幾烏牛春風吹客太無賴時有飛花來

打頭

焚香掃地當僧寮收拾吟魂幾暮朝潑眼書中成綠字窗前新放一

叢蕉

過江劇憶舊風流翠管銀箏喚客遊拚把長條都折盡天涯何物是

離愁

晚過法源寺得斷句

野徑來尋蠟屐痕密杉稀柳總銷魂寺門一角斜陽色照上秋衣不

肯溫

階前苔色綠於水幾日不來成老蒼中有故人新病起流雲一片在

琴牀

謂同年
周稚圭

碧天吹斷玉參差吟坐秋堂有所思霜果退紅簟退粉艷情不似舊
來時

籬下尋秋叩瓦盆空庭脉脉易黃昏香泥一徑太狼籍時有賣花僧

出門

送盡翩翩白袷郎風鈴獨自語丁當遊絲橫斷闌干角不許新詩上

短牆

元淑下第將出都以詩留別書此奉慰

曉風殘月路橫斜小立門前數暮鴉髡柳亦如人中酒可知飛絮滿

天涯

覓驢即是騎驢客失馬原為得馬翁驢背也應忘去住馬蹄何必問
西東

抱得雲和寫碧天鬱輪袍曲又今年記曾共畫旗亭壁舊雨淒涼到
酒邊

玉竦橋晚歸口占斷句

天上長虹曲曲橫樓臺倒影畫初晴一層金碧一層水著個鷺絲纔
眼明

十日離懷最渺漫柳絲飛夢上闌干新蟬便有愁滋味那更朝來水
氣寒

橋西新月橋東映橋上溼雲橋下飛消受綠荷風幾日今年不忍浣
秋衣

酒帘十里不分明燈火闌珊始出城不是馬蹄偏欸段自家行路太

遲生

銷寒小集共得八人皆同年友琴鵑繪圖記之余係以詩

策蹇閉門日夕過年光那不怨蹉跎六街風雪今年少消得銷寒舊
雨多

陰何撥句易成灰不問深杯與淺杯罰酒只愁合谷數催詩先報玉
山頽

蘆簾紙帳劇清幽讀畫從君十日遊我向畫中重索畫梅花仰面竹
低頭

煙魂月魄儘模糊心畫心聲辨得無留取畫中殘燭影照君更寫祭
詩圖

為陳受生孝廉題行脚看山圖卷

黃塵烏帽太蹉跎夜夜名山入夢多一事讓人腰脚健借君卷裏枕

坡陀

寒宵一百八聲鐘問訊天涯幾短筇我欲打包尋去路亂山黃葉不知重

蒙陰道中得四斷句示元淑

山行犂确馬蹄痕綠樹陰中黯客魂欲覓那回吟睡處煙斜雨直不知村

山田顛倒安碁局野井縱橫置鹿盧但得動中參靜理眼前俱是輞川圖

落日山凹路易昏村醪如水不成溫行人風色晚來急一樹馬櫻花
在門

垂楊折盡路旁枝約畧當年鬢未絲陸續自尋車上夢零星重補壁間詩

途次偶得絕句先寄金子青刊江

離合年年馬耳風客中為爾憶江東蘇州烟月新來賤十載雷塘作

寓公

香山留得孤龕在每欲傳燈苦憶君我亦蘇齋

謂覃溪先生

詩弟子朝來

一樹一停雲

漢陽飛下一黃鶴湘水擲來雙鯉魚一自粵江風浪險經年不得子

鸞書

謂王輯國近客粵東也

子春死別子山貧絕憶江西幾故人留得子青青眼在綠楊郭外是

前身

謂周子春吳子山也

花耘艷說新詞好三十六灣題草堂

子青好譜長短調近為花耘題三十六灣草堂圖不減玉田也

我欲共君傳笛譜水雲深處結漁莊

虹橋西畔路斜斜隨意徵歌三兩家聽說疎籬重補後更無消息問

秋花

征途我最悵離群幸有清談樂令君元淑喚得亂鴉天外落不知是墨
是煙雲

憩第二泉

歸來重照故山泉面皺觀河祇自憐留得清風繼桑苧一甌寒綠似
當年

片雲只作暫時遊石上牽蘿笑未休今日塵心應洗盡山中不獨此
清流

曉望

舊夢依稀住碧城仙山路只與雲平白煙似水空中動浮出僧樓磬
一聲

孟昭宰儀徵製紡紗車數百邑民願領者設局給發更擇人教

之各上其課以察勤惰欲於所治隙地種桑興蠶織之利民甚

樂之作此以寄

鐙火機聲一萬家

民間楹句有夜夜月明無犬吠家家燈火有機聲之句

明年報政是桑麻春

風綠到江南岸却笑河陽樹樹花

江湖自笑太勞生只少陽春脚底行采得東南好謠頌水車聲與紡

車聲

同邑李申耆宰安徽之鳳臺修水利事開墾所治之地幾無曠土

題桂舫先生聽雨第三圖

謝氏池邊憶弟昆連牀情味幾朝昏西堂一昔纏綿雨留作圖中屋漏痕

長公詩酒憶筵吳下分襟已卅年一樣雨聲分兩派出山雲與在山泉

再題海喬鶯塘耦耕圖

閩城煙雨榕陰地瓊海風濤荔子天却憶半耕兼半讀龍山書屋鷺

塘田

向有龍山書屋圖

曾從燕市說朱家蓬島迴尋谷口斜渤海傲他龔太守買牛買犢占生涯

程春廬屬題其夫人花卉冊

墨圃羣芳遣歲華刪除側艷足名家玉臺打出東風譜壓倒唐昌閣體花

閒憑縑素儘綢繆畫譜翻來韻最道記取鴛湖新水色瓣香飄落在南樓

三日董晉卿招飲作

桃花艷絕傍城開幸有同人折簡催一種雲溪流水畔天教細雨被塵來

幾日清明上冢斜兒童逐隊打慈鴉門前野景多狼籍可有人挑薺菜花

小憇藤花下

雛鶯稚蝶小徘徊滿院斜陽麗屐堆唱出紫雲迴一曲美人無數驪鬟來

參空古樹最森森上有名花罨十尋天半朱霞不知處春風吹夢落

藤陰

家園有銀杏樹十數株藤花盤踞殆遍萎已久矣

楊桂堂約同汎舟秦淮作

烟波重上木蘭舟小扇單衫借早秋一種無人補圖畫鍾山清影落淮流

涼亭水閣最淒清浪得南朝冶習名他日秦淮洗羅綺青溪一曲一

書聲

舟泛五里湖

五里青溪港幾重漁莊蟹斷自從容前邨一帶稻花熟中有濤聲連
夜春

仙女墩前最有情采菱來處權歌輕隔湖水色清如許洗盡橋邊罵

蠡聲

罵蠡港西
曰罵蠡橋

千點炊烟灑碧蕪西風獵獵占菰蒲明霞繡遍斜陽外大渲邨前拓

畫圖

地有大
渲港

月夜泛舟太湖

蜻蛉艇子撲溟濛剪取輕帆漾碧空七十二峯三萬頃夜山都在月
明中

明鏡搖天盡白雲龍宮一笛不堪聞夫山斷處椒山續蔓壑枝峯總
不分

重過揚州不泊岸

舊雨魂消幾暮朝
山陽笛裏路迢迢
休攀楊柳尋門巷
不見當年廿四橋

丙子考差寓山莊之集賢院雜題斷句

暫學詩人賦瀾阿
空桑一宿戀還多
山池十畝寬如許
幾輩詞臣載酒過

當日爭誇宰相莊
此間池館此間廊
遶隄垂柳無重數
曾送鞦韆影過牆

枉渚斜川曲折分
分來活水綠氤氳
茨菇葉爛無人到
只帶西灣一片雲

翠袖遲他障楚天
曲池葉子已田田
飛來白鷺如相識
一幅江湖落眼前

欲避塵囂耐冷官門前車馬是長安隔牆冠蓋如雲鬧槐螳從他冷眼看

莫從流水數華年小院憑他喚集賢我是忙中閒手筆憑將花木記平泉

黃際清寓齋銷寒第九集賦得都城蹋鐙詞

滿城人月上燈風恰如燈聲節鼓中來與章臺鬪眉嫵即看走馬一叢叢

六街門巷記條條滾遍三弦各自招今夜金吾真不夜華鐙一路到天橋

風光那許著曹騰世界玻璃透幾層歸路蹋鐙兼蹋月中天一月是元鐙

四月六日琴南樹珊蘭風彥聞諸君招同人飲尺五莊時芍藥

開作竟日之樂

南西一綠出城闌
流水灣灣故繞邨
多謝風前舊楊柳
綰人鞭影歟
園門

湘斑退盡一枝枝
不見當年手刻詩
玉筍自留三尺節
替他籬落費支持

婪尾梧前盡一觴
當堦紅藥鬪風光
三賢祠畔年時景
金帶圍誰問短長

木瓜詞

白定黃磁記物華
略無枝葉與槎枒
門前不許芭蕉入
自對寒窗詠木瓜

瓊琚投報向來諳
取次芬芳座上探
憶得故園風味好
踈窗小雪夢江南

畢竟酸寒一味嘗生來清供出幽香海棠結果原奇事別展春陰奏

綠章

海棠木瓜
燕中有之

蘭湯風味亦清班腰脚而今病未閒不信敬亭看不厭客心酸絕木
瓜山

宣南話舊圖為祁生題

塔高題雁曲江忙看榜圖開客幾行曾是閒中能出世不妨局外更
觀場

樓臺未必水邊真說到秋來又過春欲訪昔年豪第宅前街幾個賣
花人

四月十五日宿澄懷園顧晴芬寓所二十年前舊遊地也因賦
三絕句

重重楊柳好樓臺為近天光取次開

近光樓

一帶闌干欹不穩曾經小

坐一千回

曾是湘人倚水天，
開紅無舸也流連。
當時跳雨荷珠落，
負了西風廿

四年

昔時荷花極盛相接
數畝今漸零落矣

園中會客太膏騰，
數到汪程最上層。
記得夜來酣飲處，
誰家簾外上

春鐙

曩時阿哥師傅共處者有十餘人汪雲鑒
程蘭翹兩先生每日吟詩賭酒極一時之盛

酒荔支

簇簇楓亭驛，
使催荔支譜就賽楊梅。
紅塵一騎風中笑，
真見楊妃病

齒來

仙荔枝頭住，
一鄉當時曾說宋家香。
酒中別有風情在，
白瘦紅肥十

八娘

題寒雲遠雁圖

九峯石碎雲千點，
三泖風迴雁幾行。
惆悵葦城帆正遠，
高樓不見路

茫茫

舊遊幾度至丁沽

先祖為華亭廣文時曾客此

猶向寒窗展畫圖飛到荻花如雪

樣故人猶是宿江蘆

題華亭張謹甫孝廉止止山房稿

三曹二俊遡清風四十年前似夢中

余曾隨先祖至華亭學舍

今把君詩重訪舊

虛窗依舊一燈紅

卷中詩友半黃墟

詩中如王條山年丈及荆桐軒皆余故人也

鄰笛蕭然感慨孤唱到羊

眠河畔句淒風冷雨過姑蘇

卷中有姑蘇懷古句

題湯雨生為陳雨香寫尋約圖照

令弟玉舟亦繪在圖中

梁鴻溪畔愛吟詩我亦同懷有所思

近得藉山弟書

憶著故園重話舊東風

綠遍謝家池

雨生詩畫雨香蹤夙約重遊此卷中擬向圖中分半榻朝來啜茗坐

春風

德勝門外陂池一帶荷花甚開口占二絕

車聲直到鬧紅來郭外荷花向背開
忽憶湖鄉清曉看小舟撐入綠雲堆

清流却好浣縵衣淨綠叢中唾正微
鰕菜亭前風景在當年添個鷺

鵲飛

蓮花泡上鰕菜亭為當年席地坐飲處

秋日赴陶然亭一路蘆花搖曳口占數絕

邨中何處問漁莊欲上江亭爾許忙
行近蘆花看仔細莫教添作鬢邊霜

風吹如絮最模糊遠岸亭亭認得無
却憶曩時遊覽興一菴秋雪落西湖

幾許田家斷釣綸沿城一帶爨煙貧等閒
飛入江湖夢只道蘆中自

有人

霽青出京時以時帆先生所選及見錄十六本寄郭頻迦附詩

三絕

集端卷首例科名還與方羅訴不平六十年來詩筆好沙中揀得是

金聲

袁

簡齊

趙

甌北

集中留雅意

蔣清

容

錢

蔣

稿裏去偏心人間屏却箏琶響自

出成連海上琴

故人幾輩漸迢迢展卷真如賦大招繭紙烏絲商略遍寄君篋衍為

魂消

車過德勝門外水中見殘荷口占

繞郭驅車見曲塘西風一帶冷衣裳無人識得冰心在荷葉披離向

夕陽

嘉道六家絕句卷五終

嘉道六絕句卷六

是程堂詩

屠倬字孟昭號琴塢晚號潛園浙江錢塘人嘉慶十三年進

士有是程堂集

石林今話琴塢太守工詩古文旁及書畫金石篆刻靡不深造率真州日教民用桔槔既

田又傭湖鄉老嫗數輩課民間婦女蠶績元和朱酉生曾作
儀徵令樂府越數年始於他處見之兩人初未識面及此訂
交佳話也詩有是程堂集風骨清矯在坡谷間隸篆行楷皆
妙絕山水沈鬱秀渾直追前人雖其自言老鐵所授要其筆
墨之外別有神解得於天者居多是程堂詩註有云吾鄉自
奚徵君以畫名一時同時工此者雲起花卉則江石如顧西
梅余茲柏江未山裘茶雪山水則高邁庵汪栗田姚修白徐
西澗朱閑泉周松泉陳曼生此外能手復十餘人皆澹逸可
喜予亦遊諸君間遍交之好事者往往置酒邀集出長卷合
作人各一段以雲木泉石相聯絡若出一手最快絕也故有
月夜懷人詩云一角山師馬遠沒骨花數黃筌眼中
尺幅千里卧游都化雲煙錄之以誌西泠人物之盛

南唐雜詠

承恩姊妹入深宮葉子新編內苑中一曲念家山破就丁香愁結小

重瞳

書訣妙參鍼鐵聚雲鸞新展簞文開澄心堂紙司文印若箇曾留諫
草來

新聲邀醉舞婆娑金肩琵琶正踏歌何似秦淮嗚咽水瓦官流出哭
聲多

黃花水落渡京江十萬樓船繡戟幢一卷江南歸命帖換他內庫酒
三缸

題畫絕句

數弓老屋支秋水幾個漁樵繫釣船短篷短簑籬遮不斷青山飛落草
堂前

未放詩情鎮日閒便從畫裏寫春山山迴不見谿雲起亂擁桃花打
槳還

依依涼月到池臺紅葯闌邊一半開花影無人留粉本淺深都上女牆來

六法於今更屬誰冬華菴主足吾師年來不寫黃公望便擬襄陽米虎兒

生綃八尺倚高寒解籜風梢欲畫難只恐漁樵生計薄滿山都種碧琅玕

捲幔紅亭一色秋秋光亭影落江流水流不去瓜洲樹一路浮沈到石頭

春暮雨中漫興

竹梢解籜筠粉滑花片墮地春泥香小園無事坐移日雨過不知衣袂涼

綠陰如幕四圍遮閣子三間傍水斜穉子擎來新剝果侍兒數遍未

開花

疥壁汗牆任詆訶
韞材依舊積逋多
小蓬萊墨

黃丈小松所製
予曾乞得數枚

紅絲

硯

舊為奚丈
鐵生所贈

寫出黃庭不換鶯

筠籠分焙碾新芽
折脚銅鑪煮露華
多謝山僧循舊例
及時爭餉雨

前茶

送春歸去一程程
忙煞啼鳩惱殺鶯
白白朱朱開未了
看花最好是
無名

經田家作

五日一頓有花豬
買盡材醪更買書
如此清閒消受得
愧他辛苦把
犁鋤

幾畝荒園未拋却
豆苗纔種種
王瓜殷勤且竟斯
須語老圃老農吾
一家

戲作三絕句

野濶天低雪四圍，故人不來來亦稀。莫道詩人無好語，酒錢不救萬

人飢。

東坡詩歲惡
詩人無好語

二十七種庾郎菜，百五十文蘇老錢。何必千金五花馬，呼兒換酒佐

賓筵。

陶公飲酒還止酒，有客試言君試聽。為言種秫二頃半，未許先生常

獨醒。

即事

頽雲遮斷夕陽邊，老樹寒鴉噪雪天。屋角家家收白菜，故園風味又

殘年。

送春東積堂

子規聲裏去匆匆，解得銷魂是落紅。天意人情兩無賴，落花風異釀

花風

今朝冷眼看春去深巷無人載酒過君但能來同話雨恐君愁比落花多

晚眺

扁舟初卸落帆風獨立江亭指斷虹東面夕陽西面雨春陰只在半江中

題秋江載月圖

香修一名秋月祁門人幼勝於無錫嵇相國家蕙榜娶於嵇乃謀諸中閨而牒合焉既來歸屬余為此圖而頻伽梅史竹樓積堂皆以詩紀之

牽牛花底舊柴門笑指歸橈下若村雙影照來清似水一船涼月載黃昏

種梅圖為陳四別駕

景初作

為君老筆寫橫斜曾否春風似若耶我近孤山林處士不須親手種梅花

石門舟次喜晤徐雪廬

熊飛

時雪廬將之杭州口占為別

艣搖帆駛不得語忽漫相逢在上流何似語兒溪上水送君今夜到杭州

書所見

傾脂河畔水盈盈愁水愁風泥客程才捲湘簾燈又上綠楊亭館未分明

過唐六如墓

絕代風流說此君墓門松柏一時新憑誰更訪要離塚荒草漫漫愁煞人

七月一日同黃心菴

承增

倪米樓

稿孫

朱閑泉蔣蔣村山塘訪

秋

白公隄畔柳絲柔
十二紅闌隱畫樓
纔到吳鄉聽吳語
泥人新夢入新秋

綠酒紅燈映碧紗
水晶簾外又琵琶
匆匆轉過橋西去
一角青山兩岸花

十年舊夢憶江南
此日憑闌酒正酣
輸與吳中添故事
秋光一抹寫

雲藍

余與閑泉俱作圖紀之

泊舟萬年橋米樓伯治走送別後却寄

小艇魚蝦出市橋
拍提烟水漲痕消
晚涼時候胥門外
一點疎星上

麗譙

山塘燈火橫塘月
兒女閒情狎客詩
秋老吳宮采香歇
枉教木石變

吳兒

聞說蘇州柳最多柔條無復舊婆娑離情祇挂江南樹腸斷吳歌喚奈何

洞庭三萬六千頃極目行雲與斷雲昨夜西風今夜雨烟波淼淼最思君

題頻伽靈芬館圖四首時方移居魏塘

墊巾爭識郭林宗却走天涯似轉蓬聞說年來倦行役全家移住鶴湖東

本來家具少於車不為移居賦卜居尚有隨身竿木在為君添寫入

神廬

頻伽先有神廬圖竿木菴則近來錢塘所署行館名也

阻風中酒過年年纔得空山縛一椽眼底青山篋中畫不從人乞買

山錢

蓬頭尚無王霸子赤脚惟有玉川奴雪中歸去閉門卧憐爾如今成老夫

題趙雪門花影樓

橫陳剛好第三枝惱煞輕陰又雨絲縱遣夕陽能寫影曲闌相倚不多時

碧紗虛掩一重重照不分明蠟炬紅却把湘簾都上了讓他明月坐當中

春怨二首和宋秀才

鐔

綠陰如水不能消小院悵悵鎖寂寥容易黃昏容易醉一春彈淚過花朝

沈水香溫酒未寒柳梢初褪絮成團東風吹過黃梅雨也似儂心一味酸

吳丈槎客自製一舟往來湖上舊有詩云十二橋南煙舍第三
灣口漁翁青箬綠蓑歸去桃花細雨東風奚丈鐵生為作細雨
東風圖槎翁即以榜其舟蓋已卅有三年矣今年五月與槎翁
茗話舟次見索題句越兩月秋日作四絕奉寄

八十頭顱稱老夫船頭不要小紅扶風流却似元真子來往煙波作
釣徒

最宜無雨不晴天洞口桃花一繫船我却重來迷處所短篷移泊藕

花邊

無雨不晴天先生姬人句也

桃花已過藕花開便出修門放棹回那得重呼老鐵起同携鐵笛上
船來

曾邀幾度高軒過愧我匆匆杯酒疎可惜柴門不臨水先生來訪要
籃輿

寇白門小影為李白樓題

侯家記曲總蹉跎開閣歸來奈爾何不及滎陽生好事沈香供奉一
生過

同入奚官姊妹行夜深羞過大功坊

用梅村贈寇句

梅村老去傷遲暮一樣

飄零話窈娘

石城西畔柳絲絲尚似秦淮夜舞時誰分倉黃南渡日江南重見柳
師師

南屏

塔最高層尚夕陽寺樓鐘已打昏黃南屏山作屏風立擁住排衙石
幾行

宿丹徒壩上

殘年容易旅愁增水驛風寒酒欲冰高岸如山無泊處榜人月黑指

梳鐙

諸友人相送于普濟堂口占留別二首

驚心楊柳已吹棉
吹送離愁馬足邊
芳草為人留恨跡
一痕青處一蹄圓

突兀峰巒馬首迎
風沙不動雨初晴
西山大有殷勤意
同著諸公送我行

絕句

美人駿馬難兼得
兒女英雄一例看
鐙下幾回遺玉玦
酒醒重又上雕鞍

午日蘭山客舍即事

腰鎌歸去麥登場
已覺連村餅餌香
三尺綠蒲新刺水
今年五月較秋涼

白葛輕衫試斬新
匆匆客路此佳辰
兒童艾虎當頭插
席帽黃塵笑旅人

陟岵休憐我馬虺
倚閭心重日千回
瓦盆爛醉蒲根酒
跪祝康寧進一杯

屈指歸程已半途
家山難忘是西湖
若榴花放闌干角
知道黃梅雨過無

即目

野塘水碧冒圓荷
風約波紋皺似鞞
幾點碎萍新落絮
酒家門外綠楊多

宿遷道中

軟塵吹動鬢鬢薄
笨車輕駕雨驂莽
蒼平蕪入烟靄不
分雲水是江南

三絕句

赤脚昏朝怕見人
閉門無事且三旬
壁間細仿蝸書篆
雨後閒看蟻過隣

小院愔愔暑欲消
涼棚高比屋檐高
不知門外秋聲急
可是鄰家壓酒槽

六扇紗窗拓未曾
為貪曉睡兀膏騰
却愁紫燕翻身入
尚被湘簾隔一層

東南屏心公乞方竹栽

竹因蟲蝕不教青
墜葉空梢剪一廳
須要補栽千百个
秋聲添與夜來聽

乞君分竹君應惜
償以新詩并酒材
休論值得幾錢買
明月清風同送來

江山船曲

越女如花換舵來江山船子一齊開帆從羅刹磯邊轉夢到嚴陵灘
下回

鄰舟女伴却相邀今夜收帆泊二橋絮語篷窗鐙一點西風初過滿
江潮

雜題畫梅八絕句

昨向孤山尋野梅橫枝三兩不多開一生醜直渾無用且現花身說
法來

風捲雪聲乾不起一雙老鶴唳江天曾從太僕山頭見滿地梅花種
作田

何處瓊樓玉宇寒天風吹送到江干十分清瘦無人問結子東風也
帶酸

板橋流水總相宜看到梅花例有詩斜出一枝低壓帽滿山風雪獨行時

縞袂翩翩下玉京洞天窅窅碧無聲當年萼綠華曾到已被人間識小名

春前春後幾回看不于水次便山家被儂學得新花樣一幅撐開玉畫叉

不嫌肝肺太槎枒吹到東風便發芽漫道山農能煮石也曾和雪嚼梅花

妙語拈來即化工居然解事到山童天光染作雲藍紙十萬梅花短幅中

崑山王萊畦孝廉丈寄贈仿董華亭山水小幀並耶溪漁隱圖

橫卷賦謝

欲就香光證畫禪空亭四角落秋烟當時初識王摩詰正在荒山野

水邊

余與茶畦訂交于西泠湖船

寄到耶溪漁隱卷倪黃生面別教開笑儂走慣山陰道也覺無從應
接來

湘縑一幅矮窗橫幾度看山易稿成早被先生先識破似晴似雨不
分明

河渚訪友

過三义路近西溪聞道君家更在西鄰舍無人知姓氏門前笑指采
桑梯

大雨至拂塵菴

石磴盤盤點翠苔滿身風雨入山來四圍濃綠遮門住隔著松篁一
徑開

山上白雲山下水水聲只在隔山聞看來雲水無分別便是青山亦
化雲

一把團茅淨掃除拈花笑對佛燈初何須別問安心法坐著蒲團枕
著書

尚要還山讀十年郭公頻伽贈我有新篇懷人遠道三千里同滯風塵

亦可憐謂白雲先生及梅史

晚步山徑中

白石墻低薜荔封團焦
梔子綠陰重夕陽移上樹梢去正打壽春菴
裏鐘

夏夜

雨餘山石長莓苔竹裏軒窗暑不來
一樹白薇花似雪夜深風露却
全開

十丈楸欄過屋簷風多涼透夜明簾秧田雨足知猶未看取盆池寸
許添

辟暑無方只閉門宿醒纔解又傾尊無心觀化化先及一箇流螢黏
草根

十七夜步月大觀臺復飲寶月山房

蛩聲作意送秋來晚眺還登百尺臺江面芙蓉鬧秋雨九枝鐙上一

齊開

見江干設盂蘭盆
會放荷燈甚盛

得得芒鞋破繻痕西風搖兀楚騷魂夜深絡緯啼烟歇涼月如潮吹
到門

不為尋秋不上山鐘聲送我出禪關不如公等多情甚迎我來時復

送還

時素門邁卷蘇門新樹
送余至四宜亭別去

魏秋浦先生桂巖小隱圖令嗣春松觀察屬題

獨坐疎花瘦竹間
脩然杖履足清閒
先生自著參同契
不誦淮南大小山

石壇瑤室卧仙官
金粟離離翠幹攢
香近中天原不散
年年秋到月華寒

功德何須問季方
書香都染作天香
君家況有好詩讖
犀首纍纍佩印章

一枝自擅郝林秀
諸子真如竇氏賢
他日看成一品集
剡谿紅桂賦平泉

意行山徑中採淡竹
葉花染便面題句其上

繭紙裁成月半規
搗將花汁染來宜
碧天影倒湘波滑
不許浮雲剩一絲

即事

雨氣蒸人不耐渠西風吹放木犀無晦堂解得吾無隱指點庭前開一株

小雨於人病亦宜不關心事不教知養身訣與安心法正在維摩示疾時

上後山脚望湖上

落落疎林未著霜已將慘綠變新黃湖邊塔影顏唐立伴我無聊看夕陽

湖光不定暮山顏非鬼非仙總浪猜蘆荻深深藏小艇有時搖出一鐙來

幽鳥不曾呼夢醒白雲應比我先還何人耐把秋聲聽一路草蟲啼過山

自題耶溪漁隱圖

重上耶溪舊釣灘
水天風景劇荒寒
料量魚具無他物
斫取一枝青竹竿

幾日西風蟹稻天
瓦盆沽酒一陶然
不妨生剗鱸鮓手
閒棹溪邊舫艫船

洗脚船頭看白鷗
此心較似水禽閒
朝南暮北渾無定
趁著樵風吹又還

封田菱汙積來深
嘔軋榜聲何處尋
記得小年游釣處
水楊柳外夕陽沈

僕最愛梅雪香
工畫梅嘗館余家
三歲矣乃徧張名
人畫梅以供清賞
并贈一絕

四壁寒香瘦壓肩
低頭拜倒在花前
正須題作古梅屋
供養先生住十年

雁

陣雁排雲一道斜江流昨夜洗寒沙西風旋作迴文字吹散滿天蘆
荻花

題黃丈退菴馴鹿莊圖

打門來訪老詩人人亦如詩總率真隔著市橋呼郭太
謂頻伽羨君結

得好比鄰

刻成詩稿無餘事守住梅花過一生樂志何如仲長統題碑要作趙

邠卿

先生方築生
壙于東莊

來往門前有釣徒湖莊十畝占菰蒲今宵留得酒人住紫蟹黃柑定
不無

題汪芝亭鴛湖訪酒圖

出網鱸魚不值錢小樓低靠夕陽邊樵青解得主人意有箇青帘便

繫船

真珠滴滴響糟牀曾否樽前一較量想是傾脂河水釀未開缸面已聞香

題芝亭純鄉釣師圖

生涯難忘水雲區此別君應諒我無倘遇鷺鷥相問訊道儂蹤跡又江湖

遣睡九絕句并寄魏塘諸君

聽風聽雨儂自慣步月看雲便不同料得中宵老人語朝來又是打頭風

一念思量一故人天涯何處不比鄰人生消得幾許念偏是鐙前記憶真

酒邊日日憶林宗

謂頻伽

我往江南君又東便算一年相見了別離那

說不恩恩

風流誰似張明府

謂雲藻

愛客樽前欸欸留清早放衙來送我看他一

僕一扁舟

收拾詩篇壓行李一門子弟歎多才眉山父子昌黎壻併入涪翁家

傳來

黃文退卷子霽青思未及其壻芝亭皆一時才雋酒間各辱贈詩

郭郎郭郎太郎當病向縣中求藥方長公親見子由瘦為爾十日滯

行裝

視丹叔病時頻伽越中之行亦未及發

瀕行更展玉雅又寫出林塘水一涯寒食村墟微露瓦荒灣蘆荻漫

飛花

昨夜泛圖留別諸君即解纜矣

小閣藥烟簾外鎖癡兒病婦可憐生終身笑我山中住厭了山居又

遠行

挾瑟吹竽漫爾為通賓誰是鄭當時狂歌忽動大魚聽心事終輸寒

雁知

舟中望攝山

白雲迎到十里外黃葉疎於三日前昨夜江風吹夢醒一峰如繖立船邊

題石濤蘭竹畫冊

古洞陰森悶風雨更無人向此中來薜蘿窈窕睇山鬼親見懸崖花亂開

頑礪空洞齧蟹螯苦竹根蟠石罅牢絕頂孤芳怕人採山中誰為補離騷

流雲如水壓稍重一葉一花皆倒垂此老胸中真狡獪寫來不雨不晴時

題友人四時畫幀

流雲淦淦水羅羅溪上晚風吹薜蘿笠子帶來無用處松陰遮住夕陽多

落木空江澹有無秋山平遠畫倪迂問君小立西風下可有人催橘柚租

瓦溝風雪響爬沙送喜墻頭聒暮鴉一笑開門香逆鼻有人家處有梅花

瓜洲口占

江流卅里近蕪城飽曳風帆自在行却好帆收風亦住半灘急雨點篙聲

雄縣旅舍書懷

平沙得得馬蹄閒指顧燕南趙北間喜聽村氓太平鼓西風吹滿大雄關

六十老人今抱孫貧家猶足具雞豚青紅兒女鐙前說一月前頭我出門

塵釜熟抄新脫粟瓦盆生漉凍殘渎算來未負將軍腹歲暮窮檐尚不如

曉過白溝河古木平沙殊有畫意

古木寒鴉聚遠洲畫圖誰仿李營邱更添行旅蒼茫色殘夢初醒過白溝

平沙莽蒼兼天遠病柳槎枒倒地僵一點曉星空際白最難著筆是烟光

題畫冊贈馬秋藥太常

顏峯出岸抱溪長滿地松花草屨香漫笑意行無伴侶蒼髯都是丈人行

沙痕千疊晚霞紫江影一奩寒鏡圓正好挂帆歸去穩酒瓶携在櫂頭船

前林雨意欲消時剩有流雲罨樹枝潑眼赭黃山色活晚晴天氣夕陽遲

荒亭人倚一枝筇峭壁風吹五粒松雨過白雲都散盡隔江青透雨三峯

寒林早有棲鴉集曲徑曾無蠟屐痕想見詩人貪擁被雪深尺許不開門

為歐陽梅龕農部作畫題

水鳥衝寒破夕烟滿空虛籟出松顛垂竿我自沿流去釣得溪頭縮項鰖

暮烟橫截亂山平手拓篷窗挂席行孤月倒翻江水碧十分圓處在

空明

瓶供芍藥

尚留花事一逡巡
病起看花已過春
俗吏未成仙吏謫
半年中許作閒人

繁枝和雨剪來濃
幾簇晴霞壓擔紅
催放不須搗羯鼓
沃湯先浸膽瓶銅

城南雨露足豐臺
絕艷驚從市上開
不信園丁減聲價
肩挑菜把一齊來

風搖四壁更參差
說到將離定幾時
量取腰圍約金帶
本來不稱瘦腰支

耦庚屬畫湘夢圖

墨漬君山一角秋
望雲心逐楚江流
此身忽被天風引
不到三湘到

十洲

烟雨篷窗聽鷓鴣
蘆中人語一招呼
為君寫夢吾同夢
却夢君家舊賜湖

吳蘭雪國博屬汪澣雲儀部

梅鼎

作蓮花博士圖并繪其姬人

綠春小影於上戲題二絕

雙笑盈盈鏡檻邊
分明眷屬有神仙
記從玉女窗中見
十丈花開藕似船

憑欄手把玉芙蓉
涼透生衣水面風
舉似鷗波亭故事
頭銜須換水晶宮

吳思亭

修

出示復園板橋落成詩畫冊索題冊中詩凡二十人

為樊榭堇浦諸先生皆浙東西名宿也

平泉草木儘荒蕪
雅集西園賸有圖
六十年來吾晚出
板橋雜事記

糝糊

尚留竹粉染鬚眉
裙屐風流想見之
解話襄陽耆舊錄
白頭侍講少

年時

謂梁山舟前輩

論詩三昧九絕句和翁潭溪先生并引

說詩隸事昔賢病之比附辭義終闕旨趣竊謂吟咏所託本
乎自然中孕靈秘外感哀樂貞淫之別匪可偽飾時謁覃溪
先生命同此作不欲規撫遺山掇拾阮亭聊因取譬之近未
免踏虛之誚云爾

圓靈妙覺只空明
塞斷聞根見性情
春氣漸深宜燕語
秋深先得是
蛩聲

河梁五字自千秋
特放柴桑出一頭
掬水江心弄明月
百千萬億赴
中流

北宋詩篇接盛唐歐蘇不獨以詩昌後賢苦劃鴻溝界只是時人學古裝

我患才多未是才却愁空手寶山回掌中百琲明珠子要把絲繩貫串來

宛轉心抽獨繭絲幾番叉手幾撚髭如來據地作獅吼正在垂眉歛膝時

建章長樂未央宮萬戶千門迴不同絕大經營一彈指金銀臺現五雲中

風謠政事本相關千古壽陵元次山正月繁霜雨無極特開變雅不從刪

慶歷元和聖德詩武功文教不同時太平歌詠詞臣職孰是岨峽孰退之

各承初祖各傳衣認取西來路不迷洗却六朝金粉氣一同歡喜證菩提

自題小影

也騎劣馬臂秋鷹也縛芒鞋策瘦藤位置此身都未得不成豪士不成僧

和慈仲聞笛

窗紗低掩春雲薄角枕愁聽夜雨闌擲笛聲殘重按拍燭花吹落酒波寒

題金山寺僧畫梅

胸中冰雪不能消彈指春風放一梢浮玉山高江月白暗香前夜落春潮

朗齋品劍圖

三尺吳鉤白練寒隔紗虹影燭花彈倩誰屈作團樂鏡天上蛾眉相對看

題繆香山徵士詩卷

動足真成五嶽遊日窮溫帶海西頭鄒枚賓客風騷選立馬高吟漢代秋

高臥依然鐵甕城黃門早已賦西征弓旌不換山林志芟服荷衣頌太平

湘靈峯圖

并序

石榮園舊物蘆碕竹漾間巋然屹立日與薜蘿山鬼相守也阮中丞師為題今名大書鐫刻其上伊墨卿守揚時來觀題名石於是晦而復顯矣周子松泉為余圖其狀聊繫一詩

真州城西三丈石烟鬟淨沐江天濤沙頭寒月為誰白清夜佩聲聞

漢皋

題寄公小像

阿師安穩住松寮我却天涯慣打包聽說十年前面壁台山深處小
團茅

空山古月坐深深放大光明照此心何日浮杯渡江去眼前巖壑太
寄嶽

子修作釋子像題

軟塵插脚住無住壞衲袒肩來處來何日同修釋迦譜提羅花下講
壇開

詩如食蜜徹中邊不落人間有漏禪勝力自應當七地譚鋒不合讓
彌天

為蓮裳作小畫竟偶憶丙寅春暮君由錢塘還臨川訪余清平

山中余畫便面贈行君過嚴灘却寄余三詩今此畫即寫富春
山色棖觸舊事并題一絕

偶拈秃筆寫江天詩事重尋已八年行色十分憑說與畫眉啼徹萬
山烟

淮陰

春色無多上柳梢如何春水漫平橋故應幾日通宵雨漲入淮城不
肯消

茅檐畧識此鄉貧白髮扶犁兩足皴過客據鞍忙疑語獎他辛苦勸
旁人

見小車張帆行戲作

草軟沙平大道邊獨輪車挂背篷圓從前不信張思曼真箇曾牽岸
上船

題尤水村丈畫竹

八十一翁工畫竹草堂个个集青鸞今年元日行春去更上先生卧榻看

不厭秋聲江上聽風梢雨葉憂瓏玲此番看竹兼題畫兩載真州就竹亭

七月六日重到官口號

生意依然草一庭山光重向縣樓青飢寒疾苦誰家甚父老能來說與聽

江天雨過一星飛曩余清平山中句也未成篇什旋亦棄去壬申初秋夜坐庭下忽接斯景足成一絕覺兩地情事如一日云

清平山上月常好楊子縣中人未歸猛省十年前此夜江天雨過一星飛

雷雨

不道秋深尚隱雷
驚心節序且銜杯
浮雲東上西風急
萬點寒鴉側翅來

吳門歸入三汊河見桃柳甚繁口占

春水桃花太子溝
柳烟竹漾石人頭
布帆濕透絲絲雨
趁著新晴曬舵樓

茅檐卓午鬧蜂衙
一道春江瀉白沙
粉本好從疏密見
三分垂柳七分花

題吳思翁

叔元

山水小冊為山尊前輩所藏

幾折坡陀一小亭
柳烟深幕數峯青
有人背立西風下
目極飛鴻心杳冥

過雨林巒滴翠新
暑教點染不教皴
白沙江上春如畫
偏我來遲失

此人

吳真州人

書錢孝廉

之鼎

三山草堂集後

君與瓜洲王柳村兩人騷怨擷蘭蓀記從風雪鑾江見却望三山鎮

海門

庚午冬君與柳村過訪始相識

幽懷獨向孤桐托寶氣真如古劍騰是我詩篇原有我一梳短髮卅年燈

東小獻飲泉

小園對竹對梅花檢點文章早放衙風雲圍鑪太清絕煩君來此鬪團茶

題尤水村畫梅冊十二首為賈騎尉作

硯破枯毫矮赫蹄缺脣瓶插一枝低伊誰苦索梅花句我又因誰更

著題

一隻隱几坐旁置硯瓶供梅花一枝題曰冷吟圖

不於籬落不江干老幹支離石上蟠枝太瘦生花斌媚苔錢幾個不

教剡

古梅蟠石上

臘尾春前正不遲東風有信到疏枝寒香未許詩人覺偏是雙禽聖

得知

橫枝一題曰一百五日無多候二十四番今始風疎寮晴旭翠羽喚人正余題畫時也

冰雪初消纔幾點簾櫳不捲又中宵影橫三尺分明處想見花枝近

綺寮

花影淡抹月華正圓是耶非耶如不可即

江路野梅開十分三分流水七分雲水流花放雲無跡忽地妙香空

際聞

雲水光中繁枝四出

翠袖天寒獨倚時風流如對少陵詩先生不許尋常見偏有橫枝出

短籬

雪竹冰花餘寒襲袂水村自題有竹外尋常不見花之句最可翫味

渴筆鉤鬚濕點椒水痕許久不曾消階前白鶴昂藏立作伴江天慰

寂寥

水村畫中之梅余意中之鶴牽率成篇云爾未嘗真有鶴也

清極更無高格擬歲寒差有故交存湘簾月白微波動手觸霜縑不

敢捫

梅其主水仙其賓交淡如水君子以之

不古不奇君自許偶拈小筆寫寒姿重題十五年前畫已是行事七

十時

不古不奇君自題語余解之曰苟不古便不奇也冊首更有閱十五年重題之字

彭亨想見便便腹偃蹇翻成落落交昨過半灣詩老宅飄零一把舊

誅茅

花插巨甕斜出若半落者水村歿已二年半灣其故居也

西溪不到近十載溪水自香花自開怪我平生欠清福看花未了出

山來

見水村畫西溪梅奈何使東籬之菊獨有千古

烟裊竹爐茶味清夢回官閣紙窗明春寒特甚花遲發且聽梢頭墜

雪聲

湘靈館梅纔二分花聊因題畫及之

題畫竹三首

并序

鄭板橋工畫竹余亦稍稍學之余官真州板橋亦嘗讀書真

州其題畫云余少時讀書真州之毛家橋日在竹中閒步潮去則溼泥軟沙潮來則溶溶漾漾時有鯨魚數十頭自池中溢出游戲於竹根短草間與余樂也板橋不可作矣余得讀其詩與畫而游其所嘗游之地以想見其人甚幸顧余畫竹不逮板橋又甚愧繫之以詩以識余幸且愧乎可彼鯨魚游戲以樂其樂則余與板橋既同此樂矣

水紋如縠沙如篆竹葉還成金錯刀臘雪初晴朝旭暖湘簾不捲自拈毫

六十年來板橋死真州風月太無聊麤枝大葉依然好一派秋聲學板橋

江干苦竹太離披竹實無多老鳳飢民則已肥吾竹瘦此心只有板橋知

